

Bombra Raabis ro Yesus tii Mno Kisah Para Rasul

Lukas ykom aam tiim yee k'bi Teofilus

¹ Teofilus; tkom aam ro ewok refo tiim k'nyõ.*
Tiwyia tkom aam ro tinyi to, tkyas bombra ro tii
Yesus yno tna msya bombra ro Ait watum ye.

²⁻³ Mam aam ro tinyi reto to, jõ tkom tna tkyas
tawe raa sikowah Yesus tna mame Ait yajat. Tna
Ait yrok yasen. Tna yhau mam tabam refo ti 40
naut. Mam wore weto to, raabis ro tiwyia Ait
ysok mmat Ait muhrin aro-aro ye. Tna Ait yno bo
ro msai mawat afo re ana mhar kaket mawe Ait
yrok yasen tu oh. Tna Ait ykyas bo k'ana. Ykyas
wore wo Allah yamo *Raja* ybo raa mana rAit to
k'ana. Tna Ait ysya Har ro Allah mbewok mbis
bo k'ana ye. Aam ro tinyi reto to, tkyas wore wo
Yesus yhau mam tabam refo mamo snok mam
ati ro Allah tubat Ait yaut yamo't sawro rAit.

⁴ Yesus yaut yamo fefares to, Ait ysya raabis
rAit hre sohmaam bo su. Tna Ait yawe, "Nhau
mam *kota* ro Yerusalem. Frok nbam *kota* refo
wia ma. Nhau ste bo ro tiwyia anu Bja ranu yawe
kbe yoo yee k'anu to. Bo reto tiwyia Jõ tkyas
k'anu oh:

⁵ Tiwyia Yohanes yama *baptis* raa mkah aya sai,
menohe ti baro firwas to, kbe Allah *baptis* anu
mkah Har rAit."

Allah tubat Yesus yaut yamo't sawro rAit

* **1:1** Aam ro tinyi reto to, Injil Lukas.

⁶ Ati sau to, raabis ro Yesus wAit hre su msya Ait mam faut ro Zaitun. Tna ana mtu k'Ait mawe, “*Tuhan*; mfo refo Nyō nasen nno *bangsa* Israel mros u fe mfe a?”

⁷ Menohe Yesus yawe, “Anu Bja yesait yhar bo rAit. Yno bo reto mam ayō ro meen wono naut. Menohe Ait ykyas ayō reto k’anu nhar fee.

⁸ Tkyas ti ro meen Har rAit mroh mbo anu. Ati reto to, kbe Ait yoo yatak rAit yee k’anu. Tna bo ro tiwya anu nmat Jō tno to, kbe anu nbo nkyas mam *kota* ro Yerusalem tna mam *provinsi* ro Yudea beta. Tna kbe nkyas mam rabin ro Samaria ye tna mammo snok mam tabam arin aso wefo beta ye.”

⁹ Yesus ykyas bo weto k’ana mkak. Tna fo Allah tubat Ait yaut yamo’t sawro rAit. Tna raa ro mros mam weto sor heyut nmat Ait yaut yamo. Tna ayoh mboh burut Ait wa tibyo ana mahni Ait.

¹⁰ Ana mhau mrom Ait yaut kri-kri fo, *malaikat* mabo ewok ro myum ratan mboh toni frok tubor.

¹¹ *Malaikat* mbewok mawe k’ana mawe, “Anu raa ro Galilea: Anu nros heyut nmat bawya meto? Yesus yaut yamo’t sawro rAit. Tna meen Ait hah ye yama u. Meen Ait hah ye yama u mnan bo riwai anu nmat Ait yaut yamo fetu.”

Raabis wAit mhau ste bo ro tiwya Yesus ysi k’ana

¹² Kuber wAit mbam Faut ro Zaitun me mhah me mammo’t Yerusalem. Mbam *Zaitun* mammo’t

Yerusalem to *kilo* sau bo feto.†

¹³ Tna ana me mamot amah ro ja ana mhau. Maut mamot amah hawar ro uu. Ana weto to: Petrus ysa Yohanes, Yakobus ysa Andreas, Filipus ysa Tomas, Bartolomeus ysa Matius, tna Yakobus ro bi Alfeus yare ysa Simon (Simon tait ja knait raa ro Roma mbo raa ro Israel ma.) tna Yudas ro Yakobus yare,

¹⁴ fai Maria ro Yesus yme, Yesus yao na msya fnya baro ye. Ana beta to mhaf rana sau tna ana ja hre su skabuk yoyo.

Ana msok Matias mse shauk yuk ro Yudas

¹⁵ Ati sau reto to, raa wana mabo 120 bo feto mama sired su msya ana. Tna Petrus yasen yros ykyas bo k'ana yawe,

¹⁶ "Raa wamu: Bo ro tiwya Allah yawe to, mhau rau oh. Tiwya Har rait sobu *raja* Daud. Bokyas reto ait ykom mam aam ro Mazmur. Ykom yawe, 'Ait yerif iso ro raa kbe mama mfot Yesus.' Daud ykom bo reto tiwya ooh oh.

¹⁷ Tna anu nhar nwe Yudas tiwya ysa amu yamo raabis ro Yesus wait ye. Yesus ysok ait tna yno bo ro Yesus ybis ysa amu wefo ye.

¹⁸ Menohe Yudas yno bo ro mkair. □Ait yasim Yesus. □ Mkah pitis ro raa maren ait to, Yudas yoo tabam. Tna ait btek yhaf mamot siya tna yhaf ntaba mfais yajat mam tabam reto.

† **1:12** Bokom ro Musa mawe wa mawe raa mamot fari mam ayō ro raa ntmoh (*hari Sabat*) to ma. Mbis mawe raa mamot *kilo* mara sau bo feto sai aran. Feto to, raa ro Yahudi ja mkyas bofret sau. Mkyas *jarak* reto to, mawe, '*seperjalanan Sabat jauhnya*'.

¹⁹ Tna raa ro mhau mam Yerusalem beta to, mhar bo reto. Tibyo ana mkyas tabam reto to, mawe masom *HakalDama*. ('*HakalDama*' to, mai ranu mawe, 'Tabam ro Mees').

²⁰ Watum ro Allah tiwya Daud ykom mam aam ro *Mazmur* reto mawe, 'Tabam ro yhau to, makus oh. Tna raa me mhau mam tabam reto u ma.'

Mazmur 69:26

'Hroh ro tiwya ait hre reto to, raa roto me shauk hre riryōn.' "

Mazmur 109:8

²¹ Tna Petrus ykyas yawe, "Mamyot bokom reto tawe nma, anu bsok raa sait hre mam hroh ro Yudas. Anu bsok raa ro yhau ysyā anu su mam wore wo tiwya *Tuhan* Yesus yhau su ysyā anu fares to:

²² Raa ro yhau ysyā anu maban ati ro Yohanes *baptis* raa, mamo snok mam ati ro Yesus yaut yamo't sawro rAit sikba anu beta to. Kbe ait retait kro anu tna bkyas bo ro anu bmat: Bkyas bwe Yesus yrok yasen."

²³ Tna ana beta msok raa mabo ewok. Raa mabo ewok reto, sait yasom Yusuf (ja raa mawe yasom Barsabas ye tna yasom Yustus ye), tna msok ait sait yasom Matias.

²⁴ Tna ana skabuk mayoh *Tuhan* mawe, "*Tuhan*; Nyō nhar raa mhaf wana beta. Nerif k'amu awya ro Nyō ksoh nsok.

²⁵ Raa retait shauk hroh ro Yudas yamo raabis aNyō. Kbe yno bo woNyō ro nbis. Yudas btek tna sikba hroh reto. Yamo ykair, btek kayak."

²⁶ Tna ana hre tane, he maut Matias. Tibyo ait kro raabis ro Yesus tna ana beta mabo 12.

2

Har ro Allah mroh mama

¹ Mabu ro Pentakosta to, raa ro smot Yesus beta siret mam yuk sau.

² Tna ana ro hre mam amah mato reto beta mari bo ro hmu sau. Hmu mfi foos ro msai toni mbam ayoh mama.

³ Tna ana mmat mfi bo tafoh mait feto. Tna tafoh reto mbet raa mana abyõ beta.

⁴ Tna Har ro *Tuhan* mbo ana matak. Tibyo ana masen mkyas bo mkah mai raa roto. Mkyas mamyt bo ro Har sobu ana.

⁵ Ja raa ro *agama* Yahudi mawat mama makyõ korat rana reto mam *kota* ro Yerusalem. Tna *tahun* reto ye raa *agama* Yahudi mbam rabin roto makin mama't Yerusalem ye. Ana weto to raa ro ja mur-mur skabuk Allah.

⁶ Ati ro ana mari bo ro hmu reto to, raa mhoh mama mmat. Mama mari he raa Kristen weto mkyas bo: Ana makin mari bo ro ana mkyas mkah mai wana-wana tibyo ana beta mrok.

⁷ Ana mrok ktak toni tna mawe k'anya mawe, "Ana ro mkyas bo weu beta raa mbam *provinsi* ro Galilea!

⁸ Fyi sai re ana mkyas bo mkah mai wanu beta to?

⁹ Anu fo raa ro bbam rabin ro Partia, rabin ro Media msya rabin ro Elam ye. Tna taro to raa ro mbam rabin ro Mesopotamia, *provinsi* ro Yudea, *provinsi* ro Kapadokia, *provinsi* ro Pontus, rabin ro Asia,

¹⁰⁻¹¹ rabin ro Frigia, rabin ro Pamfilia, *bangsa* ro Mesir msya raa ro mbam *bangsa* ro Libia ro kene mam *kota* ro Kirene ye. Tna anu taro fo

nbam *kota* ro Roma, tna taro to nbam sato ro Kreta, nsya rabin ro Arab bo. Anu beta fo raa bbam raa mana ro Yahudi ye tna bsya raa roto ro mrok kro *agama* Yahudi tna sai. Anu bri raa Kristen wefo mkyas bo yase ro Allah yno mkah mai wanu ro ja bmai soo.”

¹² Ana ktak beta. Tna ana mtu k’anya mawe, “Bo bawya ro mefo ee?”

¹³ Menohe ana taro sret raa Kristen wefo mawe, “Ana weto mata *anggur* ro msu tna bisir meto!”

Bokyas ro Petrus

¹⁴ Tibyo Petrus yasen yros ysya raabis mabo 11 refo tna ykyas bo mkah mai ro mase k’raa weto beta yawe, “Anu raa ro Yahudi nsya raa ro nhau mam Yerusalem sor: Nri bo ro jō tkyas k’anu fo, tna nhar kaket:

¹⁵ Raa ro mkyas bo mkah mai raa roto wefo fo, ana bisir mfi bo anu nwe to, fee! Rabu sai fares mefo.

¹⁶ Menohe bo msai ro anu bmat refo oh mi bo ro tiwya Allah ybis *nabi* Yoel yama ykom mam aam rait yawe,

¹⁷ ‘Meen, kene mam sbob rau to, Jō too Har aJō tee k’raa beta. Feto to ku ro sme wanu msya ku ro ano wanu bo to, kbe ana makah soo woJō mam mkyas k’raa. Tna ku ro tna mmat bo ro Jō terif k’ana ye. Tna raa mabi kbe smi mmat bo ro Jō tkait k’ana ye.

¹⁸ Tna mam ati reto ye, sryan woJō ro sme msya ro ano bo to, kbe Jō too Har aJō tee k’ana ye. Tna kbe ana makah soo woJō mam mkyas k’raa ye.

¹⁹ Tna kbe Jō tno bo ro msai mam ayoh. Tno bo msai mam tabam refo ye afo re raa mmat tna mhar Jō tatak aJō. Meen raa mmat mees, mmat tafoh msya wasi ro maun maut ye.

²⁰ Tna kbe ayō haberek mti mamur htoh, tna kbe snyi haberek mkek mfi mees wia, tna fo ayō ro *Tuhan* to mama. Ayō reto to, ayō ro msai toni.

²¹ Tna awya ro ksoh kro *Tuhan* kbe ykai riof.' "

Yoel 2:28-32

²² Tna Petrus yawe, "Raa ro Israel: Nri bo ro jō tawe fo: Nnaut oh: Yesus raa ro Nasaret tait, tii yno bo ro msai. Ait sair bo ro hnah re kbe raa mmat tna mrok ktak tna waa. Bo weto beta Ait yno re kbe anu nmat tna nhar nwe yatak rAit to mbam Allah.

²³ Tna Allah ysan Ait k'anu, raa ro *agama* Yahudi, re anu nsan Yesus k'raa ro wase Allah. Ana weto mame Ait yajat mam ara warok. Anu nesait oh mi nsom isti reto to. Bo weto beta mamō mamyot iso ro tiwya Allah yhar tna saim wia to.

²⁴ Menohe Allah yno Yesus yrok yasen. Yesus Raa ro yatak. Ait yhai tibyo fee. Allah yno Yesus yrok yasen.

²⁵ □Mam aam ro Mazmur□ Daud ykom □bo ro Yesus yawe *k'Tuhan* Allah□ yawe,

'Jō tmat *Tuhan* yhau kait ysya Jō yoyo. Allah yros mam ati ro Jō tatem ati tna yban Jō. Feto Jō waa bo mkair kbe raa mno mai k'Jō to fee.

²⁶⁻²⁷ Kbe thai to, tna *Tuhan* Allah beak Jō takus mam sawro ro hai fee. Jō fi Ait ro Allah ybis yama. Hai aJō, kbe Ait sayō rof makus mnis fee. Feto oh mi Jō simaut mase. Jō bibi Nyō yoyo ye.

28 Nyõ nerif iso k'Jõ re tamo tru roon ro hame wajin. Soh thau tsya anu to, kbe Jõ simaut mase.' "

Mazmur 16:8-11

29 Tna Petrus ybo ykyas renti yawe, "Raa wamu: Jõ thar tawe far-far ro riwai mkyas *raja* Daud fee. Anu hohos ranu Daud tiwya yhai oh. Tna raa moo hai rait sama mam isra mato. Tna anu bhar isra reto mhau tno fares.

30 Daud tait *nabi* ro Allah ybis yama ykyas bo wAit. Tna Allah ykyas bo k'ait yawe,

'Meen Jõ tsok Raa sait ybam ku renti wonyõ. Tna Raa retait kbe Jõ tse hre shauk hroh anyõ mkah bo yamo *Raja*.'

Mazmur 132:11; 2 Samuel 7:12-13

31 Daud yhar bo ro meen Allah yno. Feto oh mi ykyas yawe,

'*Mesias** meen yhai tna yrok yasen. Kbe Allah sikba *Mesias* yakus mam sawro ro hai fee. Tna hai rAit mhau makus mnis bo fee ye.'

Mazmur 16:10

32 Yesus oh mi Allah yno re yrok yasen to. Tna amu, raabis wait beta, tii nmat Ait mkah nsu wamu.

33 Allah tubat Yesus yse hre mam hroh ro mbe. Tna Ait yoo Har rAit yse k'Yesus mnan fi tiwya Ait yawe yno. Har rAit reto oh mi Yesus yoo yse k'amu ye. Tibyo amu nkyas Ait yasom mkah mai aro rau-rau. Bo reto anu nmat tna nri kri-kri fo. 34-35 Daud ykom bo ro Allah yawe k'Yesus:

* **2:31** Som reto to, 'Ait ro Allah ysok tna yawe yamo *Raja*'. Mai ro Ibrani mawe *Mesias*, tna mai ro Yunani raa mawe *Kristus*.

'Tuhan Allah yawe k'Tuan ajō yawe: "Nama, hre nsya Jō mam ati ro tatem ati; hroh ro mase reto. Tna raa ro byoh, raa ro srau kair k'Nyō to, meen tno ana mbtek mam mte. Kbe nyō naa nber ana weto. Tna Nyō nros natak abyō ana, nbo ana."'

Mazmur 110:1

Anu bhar bwe Daud yesait yamo't sawro tna hre ysya Allah feto fee.

³⁶ Feto to tkyas k'anu raa ro Israel beta, tawe: Nhar nwe Yesus ro anu nme yajat tait, Allah tubat Ait yse abyō, yawe Yesus fi *Tuhan*. Yawe Yesus fi *Mesias* ye."

³⁷ Ana mari feto tna bokyas reto mroh mame k'ana mhaf. Tibyo ana mtu k'Petrus ysya raabis (*rasul*) makin taro fo mawe, "Amu kbe nno bawya?"

³⁸ Tna Petrus yawe k'ana yawe, "Nashana oh! Tna nbis raa *baptis* anu mkah Yesus yasom. Afo re Ait yyon iro wanu ye. Tna kbe Ait yoo Har ro Allah yse matam anu.

³⁹ *Tuhan* Allah ranu kbe yoo Har ro rAit yse matam awya sai ro Ait ytu yama yo k'Ait: Yse k'anu raa ro *agama* Yahudi bsya kukek wanu ye, tna msya raa roto ro wase Allah ye."

⁴⁰ Tna Petrus ykyas bo taro mawat ye: Ait yawe wa k'ana yawe, "Raa ro mfo wefo mhau mam tabam refo to, ja mno bo ro mkair-kar. Kbe meen Allah ymit safo k'ana. Snok nbam k'ana weto tna nmo no k'Ait re kbe nkai riof!"

Raa jemaat ro tinyi

⁴¹ Raa ro mari bo ro Petrus ykyas tna mawe ana smot Yesus ye to, raa mabo 3000 bo feto. Ana mawe raa *baptis* ana.

⁴² Ana mari bo ro raabis mkyas to, mbo mno. Tna ana miranya kaket, tna makyō Korat ro Mait *Roti* Su afo re ana mnaut Yesus ro yhai to. Tna ana skabuk su ye. Bo weto beta to, ana mno yoyo.

⁴³ Raabis ro Yesus mno bo ro msai. Ana mno bo ro msai tna re raa mmat tna mhar Allah yatak rAit. Tna raa beta mrok ktak tna waa Allah.

⁴⁴ Raa ro smot Yesus weto to, beta msuk siret su. Tna bo bawya sai ro ana mse to, bo wana su.

⁴⁵ Ana moo bo wana masim tna moo mabyoh rau to saim k'raa kinyah wana ro mse bo mabut.

⁴⁶ Tna rabu ti wawa ana mhaf sau siret su mam Samu ro Allah. Ana siret makyō Korat ro Mait *Roti* Su, tna mait boit su mam amah aro mamomamo ye. Ana simaut mase mno bo weto. Ana aro srau ewok fee.

⁴⁷ Ana mbaut Allah yoyo. Tna raa beta ksoh ana ye. Rabu ti wawa to Allah yoo riof yee k'raa taro u. Tibyo raa mkbair ro smot Yesus to mrok mase renti.

3

Petrus yisoh ait ro yaa mhai sait

¹ Ti sau fo, Petrus ysya Yohanes mbewok mamomamo skabuk mam Samu ro Allah. Ana mamomamo mam wore ayō hawer bo feto. Ja raa ro Yahudi skabuk mam ayō reto.

² Ana mbewok mamomamo to, raa masom bi ro yaa mhai sait kri-kri mama ye. Ait retait yaa mhai. Yaban ykek to feto bait oh. Ti ro raa mabe ynan

feto oh. Tna rabu ti wawa ja raa makah bi ait mama mse mam bohra makit Samu ro Allah reto. Ana mse ait hre mam masa ro masom 'Masa ro Moof'. Ja ait hre mam yuk reto yayoh pitis k'raa ro mama twok mam Samu ro Allah.

³ Ait hre tna ymat Petrus ysya Yohanes mama twok mam bohra Samu ro Allah. Tna yayoh bo k'ana mbewok yawe, "Natmof jō, noo pitis nee mbau a!"

⁴ Ana mbewok masu sayō ait tna Petrus yawe k'ait yawe, "Nasu nmat amu wia!"

⁵ Tibyo ait yasu ymat ana tna ait ynaut yawe kbe ana moo pitis aro mee k'ait.

⁶ Menohe Petrus yawe k'ait yawe, "Jō tse pitis aro fee saut. Menohe bo ro jō tatak tno fo, tno k'nyo: Mkah Yesus *Kristus* ro Nasaret yatak rAit to, jō tbis nyō nasen namo oh!"

⁷ Tna Petrus ybo ait refi yatem ati ybo tubat yasen yros. Petrus yno feto si to, ait refi yaa masu mrok matak tna yaa beta mrok matak ye.

⁸ Ait yasen srot tna kro ana twok mamom't bohra Samu ro Allah. Ait simaut mase yamo tna tbat-tbat ybaut Allah.

⁹ Raa beta mmat he raa retait yamo tna ybaut Allah feto.

¹⁰ Ana mhar mawe ait retait ro ja soo hre yayoh pitis mam 'Masa ro Moof'. Tna mrok ktak sai mawe, "Ait ro yaa mhai retait; yaa moof yasen yamo a?"

Petrus wosa bo mam Serambi ro Salomo

¹¹ Ana mros mam Samu ro Allah amah hawar mase ro mne sau. Hawar reto masom *Serambi* ro Salomo. Ait ro riwai Petrus yisoh retait simaut

tibyoyatem ybo Petrus ysyayohanes matak fares fo. Tna raa beta mhoh beak-ak anya mama mo k'ana tna raa nmat bi ait bo yaa haberek moof to, ana ktak sai.

¹² Tna Petrus ymat raa msis-sas refo tibyo yasen yawe k'ana yawe, "Raa ro Israel, anu nmat bo ro msai refo tna nrok ktak nno fyi? Anu nmat sas amu to, nrok nwe amu nkah ntak ramu oh mi nisoh ait refi re yoof yasen yamo to ma. Bo moof ro amu nno to, mno re amu ntak nisoh ait refi fo fee ye.

¹³ Allah ro anu hohos na wanu Abraham, Ishak, ysyayakub, ja smot to, Ait oh mi yno Yesus Sryan rAit yrok yase toni to. Yesus Ait oh mi tiwya anu nsan k'Pilatus. Tna Pilatus yawe bitsre Ait he mfe, anu nwe, 'Bitsre Ait ma!'

¹⁴ Yesus, Ait yama yno bo ro Allah ybis sai, Ait yato mboh sai, menoh anu hawe Ait. Tna anu nyoh k'Pilatus nwe bitsre Barabas ro ja yame ajat riryõn k'anu.

¹⁵ Tna Yesus oh mi sair iso ro raa mhau mae tinyi tait. Anu nme Ait yajat oh. Ait yajat menoh Allah yno Ait yrok yasen yaam u. Tna amu oh mi nsu nmat bo weto beta to.

¹⁶ Anu beta nhar ait ro yaa mhai. Yesus yatak rAit oh mi mno ait refi yaa rait matak to. Amu smot Yesus. Amu nhar nwe Ait yasom rAit to matak toni. Tna bosmot reto oh mi misoh ait yaa moof matak. Anu nsu wanu beta nmat fo.

¹⁷ Raa wamu; tiwya anu nsya raa mabi wanu wase nwe Yesus tait *Mesias* fee. Tna anu nme Ait yajat. Anu wase oh mi anu nno bo ro mkair reto.

¹⁸ Tna Allah sayõ anu nno fetorof. Yawe bo reto mabo mamomnan si bokyas ro tiwya Ait

ybis *nabi* wAit mama mkyas wia. Tiwya ana mawe,
 ‘Mesias tait meen ykai bo ro samyoh mai k’Ait wia tu.’

Mazmur 2:1-2, 22:1; Yesaya 53:7-8

Bo reto mabo rau oh mefo.

¹⁹ Nri beta! Tna nashana oh! Tna haberek ne nma no k’Allah, afo re kbe Ait yyon iro wanu.

²⁰ Tna Ait yno re anu nhaf simaut. Meen *Tuhan* Allah ybis Yesus hah yama u. Tiwya Ait ysok Yesus *Kristus* yamo *Mesias* ranu.

²¹ Mfo refo Yesus yhau mam sawro ro Allah wea. Ait yhau mam beto mamo snork oon ro tiwya Allah yawe. Tna ati reto to, meen Ait yisoh bombra beta mam arin aso mrok moof wea. Tiwya Allah ybis *nabi* na wAit mam mkyas bo rAit. Ait ybis ana mkyas bo reto matim wia oh.

²² Tiwya Allah ybis *nabi* Musa yama ykyas yawe, ‘*Tuhan* Allah meen teta *Nabi* sait ybam raa wamu wefo yfi jō. Tna bo ro *Nabi* retait yawe k’anu beta to, nri kaket!

²³ Tna raa ro have bokyas rAit to, kbe Allah tufrok ana mbam k’raa wAit mam mhou mne.’
 Ulangan 18:15, 18-19

²⁴ *Nabi* beta sor tiwya mkyas oon ro meen mama reto ye. *Nabi* Samuel ye, tna ysy *nabi* taro sor ro mrof ait to ye. Ana mkyas bo ro meen mabo mam wore weto to, mkyas matim wia.

²⁵ Tna anu oh mi ku renti ro *nabi* na weto to. Bo ro Allah ysi k’ana yawe meen yno to, ykyas k’anu ye. Nnaut bo ro tiwya Allah ysi k’Abraham yawe fefo:

‘Ku renti wonyō meen sait oh mi yno re Allah yno bo ro moof k’raa ro tabam refo beta.’

Kejadian 22:18

²⁶ Tna au oh mi Allah ybis Yesus, Sryan rAit, yama yo k'anu raa ro Yahudi wia, afo re Ait yno bo ro moof k'anu. Bo moof ro Ait yno to oh mefo: Ait yno re anu sait-sait haberek kro Ait tna ne nmo iso ro mkair u fee."

4

Raa mabi ro Yahudi kmo Petrus ysa Yohanes

¹ Petrus ysa Yohanes mbewok mkyas bo kri-kri msya raa msis-sas weto fares. Tna raa mabi ro *agama* Yahudi baro mama mo k'ana mbewok. Ana ro mama to, *imam* ro Yahudi baro ye, raa ro Saduki baro msya aban mana raa sbe ro ja kmot Samu ro Allah ye.

² Ana mbewok mkyas bo k'raa weto mawe, "Yesus yrok yasen oh. Feto to, kbe raa ro mhai meen mrok masen maam u ye." Raa mabi ro Yahudi weto mari bo ro ana mkyas reto. Tibyo mrok kmo ana mbewok.

³ Tibyo ana mfot ana mbewok tna makah mamu mbu mam *bui* mato. Menohe arin fo mti oh. Tibyo ana mbewok mhau mam *bui* mato reto snok mam ayō ro menrabu.

⁴ Raa makin ro riwai mari bo ro ana mbewok mkyas weto to, mawat mama smot Yesus. Ana weto msya raa ro smot Ait wia to, raa sme beta mabo trion 5000 bo feto. (Fnya msya kukek wana raa ntuu fee.)

⁵ Rabu fo, raa manes ro *agama* Yahudi mama siret su mam Yerusalem: Raa mabi, msya *guru agama* ye hre siret beta.

⁶ Bi Hanas ro yamo *imam* yase, bi Kayafas, bi Yohanes ysa bi Aleksander tna msya raa ro mbam raa mana ro ja mammo *imam* mase wana to, ana beta mama siret ye.

⁷ Tna raa makah Petrus ysa Yohanes mammo mse mros susai mam wore ana siret fo, tna ana mtu bo k'ana mbewok mawe, "Iis anu mbewok nisoh raa retait mkah awya yasom? Iis anu nisoh ait mkah awya yatak rait?"

⁸ Tna Har ro *Tuhan* matam Petrus matak, tibyo ait yawe k'raa weto yawe, "Anu raa manes ro Yahudi nsya raa mabi sor:

⁹ Mfo anu ntu srah refo k'amu nri. Safo ro anu ntu oh mi amu mbewok nno bo moof k'ait ro kiyam sait to a? Tna anu ntu k'amu nwe fyi oh mi amu nisoh raa retait re yoof to.

¹⁰ Amu nkyas k'anu beta nsya raa ro Israel beta ye afo re anu nhar bo refo kaket: Taa ait retait yaa mhai menohe mkah Yesus *Kristus* ro ybam Nasaret yatak rait oh mi amu nisoh raa retait. Yesus tait anu nme yajat tna Allah yno Ait yrok yasen. Ait retait oh mi yno re raa retait yrok yoof tna yros re anu nsu nmat beta to.

¹¹ Bokom ro Allah mkyas Yesus mawe, 'Raa sgi samu sau mkah fraa. Ana moo fraa sau sanet. He mfe, ana hawe fraa reto tibyo mawah beak makus to. Menohe fraa reto mrok mammo fraa ro moof.'

Mazmur 118:22

Yesus tait yfi fraa reto. Tna anu fo nikyak Ait wia tinyi nfi raa ro sgi samu reto.

¹² Ait yesait aran yatak yoo riof ro mase yee k'raa. Raa roto fee. Mam tabam refo fo, Allah yno Yesus yesait aran yatak yoo riof yee k'raa."

13 Tna raa ro siret weto mhar mawe ana mbewok to, raa ro tiwya mkom bo mam *sekolah tinggi* to fee. Tibyo ana mrok ktak sai mmat bo Petrus ysya Yohanes matak mros mkyas to. Ana mhar mawe ana mbewok to tiwya msya Yesus ye.

14 Tna ana mmat bi ait ro iis Allah yisoh ye. Mmat ait retait yros yatak mam beto ysya ana ye. Tibyo ana mastako ana mbewok fee. Ana shait sai.

15 Feto to ana mbis ana mbewok frok mbam siret reto wia, tna ana saim bo k'anya mawe,

16 "Raa ro Yerusalem beta mhar mawe ana mno bo ro msai. Kbe anu btak bwaar bo reto fee ye. Feto to kbe anu bno bawya k'ana mbewok refo u?"

17 Anu hawe raa mabah msas bo refo be kbe raa beta mari. Feto to nma, anu bwe wa k'ana mbewok. Bwe ana mkyas bo mam Yesus yasom u ma."

18 Tna fo raa manes weto mtu Petrus ysya Yohanes me mama twok u. Tna ana mawe wa k'ana mbewok mawe, "Ne nkyas Yesus yasom u k'raa ma ee!"

19 Menohe Petrus ysya Yohanes mbewok mawe si k'ana mawe, "Anu nesait nnaut nwe fyi? Ja Allah ksoh yawe amu mbewok nri bo ro awya yawe? Anu beta fe bo ro Allah yawe a?"

20 Nko hawe sai amu bewok nkyas Yesus yasom renti. Bo ro amu nsu nmat msya bo ro amu nri oh to, kbe amu nbo nkyas yum!"

21-22 Ana ro mtu srah weto mkai safo makan aro fee. Tna ana mhar mawe ait ro Yesus yisoh retait, *umur 40 tahun* bo feto. Raa makin mmat bo msai reto tna bibi Allah. Feto to raa

manes weto waa mawe raa makin kbe kmo ana ye. Tibyo ana mawe wa k'Petrus ysyia Yohanes matak u ye. Tna fo bitsre ana mbewok mamu.

Raa ro smot Yesus mayoh k'Allah yoo yatak yee k'ana

²³ Raa manes ro Yahudi bitsre Petrus ysyia Yohanes. Tna ana mamu mo k'mafoh na wana ro smot Yesus. Tna bo ro riwai *imam* manes msya raa mabi ro Yahudi mkyas k'ana to, ana mbewok mkyas beta.

²⁴ Ana mafoh na wefo mari fetu, tibyo ana skabuk mawe k'Allah mawe, "*Tuhan*; Nyõ oh mi nfen ayoh, tabam, aya sawan msya bombra beta ye.

²⁵⁻²⁶ Amu nnaut bi Daud, hohos ramu. Ait yamo sryan aNyõ. Tna ait ykyas yawe,

'Raa mana makin mrok minin mno fyi? Tna ana hre saim bo mati sai mno fyi! *Raja* makin ro tabam refo siwyan mame anya oh. Tna raa manes sor berur mhau mam wo sau mno bo ro mkair mai *k'Tuhan* Allah ysyia *Mesias* rAit ye.'

Mazmur 2:1-2

Bo ro tiwya Daud ykyas reto to, bokyas aNyõ. Bokyas ro Nyõ nkyas k'ait nkah Har aNyõ.

²⁷ *Tuhan*: bo ro tiwya Nyõ nbis Daud ykom reto to, mabo oh. Bo reto oh mi *Raja* Herodes ysyia *gubernur* Pontius Pilatus sired su msya raa mana ro Israel ye tna msya raa mana roto makin ye to. Ana sired su mam *kota* refo saim bo mawe mame Yesus yajat. Yesus tait sryan aNyõ ro Nyõ nesait nbis yama. Ait tait, Nyõ nbis yamo *Mesias*.

²⁸ Amu nhar nwe bo ro ana mno reto to, Nyõ nesait saim mamyot Nyõ natak anyõ msya ksoh aNyõ matim wia oh. Tna ana mame Yesus yajat.

²⁹ *Tuhan*: Mfo wefo raa mabi ro Yahudi mawe kbe ana mno bo mkair-kar mai k'amu ye. Feto to amu nma no k'Nyõ soh-soh nwe noo natak aNyõ nee k'amu afo re amu nros ntak bito nkyas bokyas aNyõ.

³⁰ Tna nisoh raa ro kiyam mrok moof. Nno bo ro msai, sair bo ro hnah re kbe raa makin mmat tna mhar natak aNyõ. Tna mhar mawe Yesus, sryan aNyõ ro Nyõ nesait nbis yama tait, yoo yatak rAit yee k'amu afo re amu nno bo ro msai weto."

³¹ Ana skabuk mkak si to, amah ro ana skabuk reto mrok mnah-nah. Tna Har ro *Tuhan* mbo ana matak beta, tibyo ana matak mkyas Watum ro Allah. Waa fee.

Raa ro smot Yesus tiwya tinyi

³² Mam wore weto to, raa makin ro smot Yesus weto to, ana mhaf sau. Tna bombra ro ana aro mse to, ana mawe bo rana mesait kar fee. Ana mawe bo wana beta. Tibyo raa aro mse bo mabut fee. Ana ro mse bo mnan to, mabe bo wana weto fee. Moo mee sai.

³³ Tna Allah yoo yatak ro mase yee k'raabis (*rasul*) wAit. Tibyo ana ja mkyas Yesus yasom k'raa, mawe Allah yno Yesus yrok yasen yaam u. Tna Allah yoo bouum mawat yee re ana beta mhau matak mno bo wAit ye.

³⁴⁻³⁵ Ana aro mbo amah, tna aro mbo tabam. Ti aro-aro soh ana mmat raa Kristen taro mhau matem marak to, ana masen masim bo wana. Masim bo tna moo mabyoh rau to, mbo mama mee k'raabis ro Yesus. Tna raabis weto saim

k'ana ro ja mhau matem marak. Feto kbe bo wana mabut fee. Ana aro bo mhau matem marak u fee.

³⁶ Ana sait yasom Yusuf. Ait ja raabis mtu yasom Barnabas ye. (Mam mai ramu to, mawe 'raa ro ja ykyas bo moof re kbe raa sorni sraujin rana'). Ait to raa mana ro Lewi ybam sato ro Siprus.

³⁷ Ait yasim armato rait tna yoo mabyoh rau to, yama ysan k'raabis weto mbo tna saim k'raa kinyah wana ye.

5

Ananias ysya yfain Safira

¹ Ait sait yasom Ananias tna yfain masom Safira. Ana mbewok masim tabam wana baro ye.

² Menohe ait yabe mabyoh rau baro yse k'ana mesait wai. Tna yoo baro ysan k'raabis yawe, "Mabyoh rau beta oh mefo." Bo ro Ait yno reto to, yfain mhar ye oh.

³ Menohe Petrus yawe k'ait yawe, "Kabes yabi (Iblis) mbo nyõ nhaf anyõ meto! Thar tawe nyõ nabe pitis reto jaro nse k'nyõ. Nyõ nno safo meto! Sioh Har ro *Tuhan* to ma!

⁴ Ati ro nyõ nasim tabam reto fefares to, tabam reto tabam anyõ. Tna ati ro nyõ nasim to, pitis reto mhau k'nyõ beta ye. Soh riwai nyõ ksah nabe pitis beta mhau to, reto safo aro fee. Menohe nyõ sioh Allah oh meto! Nyõ sioh raa meto fee!"

⁵ Ananias yari feto tibyo yatu btek yai mam tabam yajat. Tna raa ro mari bo reto beta to, mrok waa toni.

⁶ Tibyo ku sme ro mere baro mama sro ajat refo, tna ana teta masom mamō sama.

⁷ Ayō tuuf bo fetō firwas, tna Ananias yfain mama twok. Au wase bo ro mai k'au maa Ananias to, fefares ye.

⁸ Tna Petrus ytu k'au yawe, "Sik ma nawe abyō k'jō: Tabam ro anu nsim reto to, mabyoh rau beta oh mefo a?" Tna au mawe, "Ae, pitis beta oh meto."

⁹ Menohe Petrus yawe, "Anu mbewok saim k'anya nwe sanet Har ro *Tuhan* meto a? Nmat mere ro mama fo. Riwai ana sama hai ro naa. Ana kbe teta hai anyō makah mamō sama naut."

¹⁰ Tibyo fai au matu mai mam tabam majat ye, kene kait mam wore Petrus yros to. Tna mere weto twok mmat he fai au majat. Tna ana teta ajat reto masom frok mamō sama ye mam ati ro kene maa yajoh jaro.

¹¹ Tibyo raa mana ro smot Yesus msya raa roto ro mari bo reto to, mrok waa beta ye.

Raabis ro Yesus mno bo ro msai

¹² Tna raabis ro Yesus mno bo msai, tna sair bo hnah mawat ye afo re raa makin mmat tna mhar Allah yatak rAit. Tna raa ro smot Yesus to, mhaf sau. Ana beta ja mama siret su mam '*Serambi* ro Salomo'.

¹³ Raa roto taro waa mama berur su msya raa ro smot Yesus weto. Menohe raa ksoh ana ro smot Yesus weto tna mawe ana ja mno bo moof toni.

¹⁴ Tna rabu ti wawa raa msis-sas mama smot *Tuhan* Yesus tna mama kro ana miranya su ye. Ana ro mama weto to, raa sme taro tna msya fnya taro ye.

¹⁵ Raa mmat raabis mno bo msai. Tibyo makah raa ro kiyam sor frok mama mse mam iso mabi. Ana taro raa mse mjin abyõ mam ambar tna taro mse mjin mam aam wana ye. Ana mno fetu afo re soh Petrus yama frit iti to, yawyan mai ana tna kbe mno ana mrok moof ye.

¹⁶ Tna raa mbam remo ro mhau kene mam kota ro Yerusalem sor to, mama ye. Ana makah raa ro kiyam msya raa ro kabes mbo ye mama. Tna Allah yisoh ana mrok moof beta.

Raa mfot raabis ro Yesus

¹⁷ Menohe *imam agama* Yahudi ro yase ysya raa wait ro Saduki mmat bo ro kuber ro Yesus wAit mno. Tna ana mrok mhaf kair toni.

¹⁸ Tna ana mbis raa mamu mfot raabis ro Yesus mbu mam *bui*.

¹⁹ Menohe mti rau to *malaikat Tuhan* sau mama mitrah masa ro *bui* reto sor tna tusnok ana frok. Tna *malaikat* reto mawe k'ana mawe,

²⁰ "Nmo nros mam Samu ro Allah tna nkyas bokyas ro mroon refo beta."

²¹ Ana mari fetu, tibyo rabu momo fo, ana mamu twok mam Samu ro Allah. Tna masen mkyas watum ro Yesus reto. Mam ati reto ye *imam* ro yase ysya raa wait hre mkyas bo ro iis. Tna ana mtu raa manes ro ja mtu safo raa ro Yahudi sor to, mawe mama siret su. Raa manes ro Israel beta hre su. Tna fo ana mbis raa mamu tufrok raabis ro Yesus mbam *bui* makah mama.

²² Tna raa weto mamot *bui*. Mamot tna mmatt he raabis weto marak. Tibyo raa weto me hah mamot mkyas k'raa ro siret wea weto mawe,

²³ "Amu nmo't *bui*, tna nmat mato matak wa fares tna raa ro kmot *bui* mros kmot sai fares. Menohe amu nitrah masa reto to, amu nkai raa sait bo yhau mam *bui* mato reto fee!"

²⁴ Aban mana raa sbe ro ja kmot Samu ro Allah tait ysya *imam* manes mari bo ro raa mkyas feto. Mari tna ana mrok miskawowo. Tna mawe k'anya mawe, "Bo bawya ro mabo mefo? Kbe meen sbob rau to fyi?"

²⁵ Tna fo raa sait yama yo k'raa manes ro Yahudi weto tna yawe, "Raa ro iis anu nfot nbu to, ana mros mkyas bo mam Samu ro Allah mno."

²⁶ Tibyo ait yabi ro ybo raa sbe ro ja kmot Samu ro Allah ysya aban mana wait mamot mbo raabis ro Yesus weto makah mama. Ana mbo raabis weto to, mno bo ma fee, ana waa bo kbe raa msisas refo mrok kmo mawah fraa mai ana majat.

²⁷ Raa sbe mbo raabis wefo makah mama mse mros mam wore ana ro ja mtu safo raa ro Yahudi to, hre siret wea. Tna *imam* rana ro yase ytu bo k'raabis ro Yesus yawe,

²⁸ "Tiwya amu nwe wa anu nwe anu nkyas Yesus yatak rait u ma. Menohe anu nri fee sai, tibyo beroh nmo nkyas Yesus yasom k'raa ro Yerusalem beta mari oh! Tna anu nkyas k'raa nwe amu oh mi nsom mees ro Yesus rait to."

²⁹ Menohe Petrus ysya raabis makin taro fo mawe, "Amu nri bo ro Allah yawe tu oh. Soh raa mawe bo roto hayah to, amu nri ana to fee.

³⁰ Anu nme Yesus mam ara warok yajat. Tna

Allah ro anu hohos na smot tait, yno ait yrok yasen.

³¹ Ait oh mi Allah yse hre mam hroh ro mbe re yamo aban mana ro yoo riof ro mase yee k'raa to. Yno feto afo re raa ro Israel mashana tna Ait yyon iro wana.

³² Amu nsya Har ro *Tuhan* ye oh mi nsu nmat bo weto beta. Allah ysan Har rAit k'raa ro mari bo ro Ait yawe."

³³ Bo ro raabis weto mkyas to, mame k'ana mhaf tibyo ana kmo tna mnaut mawe mfot raabis wefo mame majat to.

³⁴ Menohe raa ro *Farisi* sait yasom Gamaliel yasen yros. Bi ait tait *guru agama* ro Yahudi. Tna ja raa makin mari bo ro ait yawe. Ait yasen yros tna ybis raa tufrok raabis weto mamot mne rere wia.

³⁵ Ana frok mamot wia tna fo ait yawe, "Raa wojō: Nnaut kaket bo ro kbe anu nno k'raa weu.

³⁶ Raa wefo mno bo mnan si mfi bo ro bi ait sait yasom Teudas tiwya yno. Teudas tait frok yama tna yawe ait raa ro yase. Tna raa mabo trion 400 mari kro ait ye. Menohe ait raa mfot mame tna fo raa ro ja kro ait weto mso-sa ha-hayah ye. Tis rau to, bo ro ait ykyas to, mabo fee.

³⁷ Teudas mkak tna fo mam ati ro *Raja* Kaisar yawe ntuu raa makin wait to, raa sait naut yasom Yudas frok ye. Ait retait ybam *provinsi* ro Galilea. Ait hawe bo *raja* Kaisar ybo rabin refo tna raa msis-sas mari kro ait ye. Menohe ait raa mame, tibyo raa ro kro ait weto mso-sa ha-hayah ye.

³⁸ Feto to jō tawe k'anu tawe, nme raa ro kro Yesus wefo majat ma. Anu kbe bhau bmat rof bo

ro ana mno sai. Soh bo reto mbam k'raa to, kbe mso-sa sai akus.

³⁹ Soh bo reto mbam k'Allah to, kbe anu btai bno wa bo ro ana mno bo fee saut, tna kbe anu bfa bsya Allah yesait sai oh meto."

⁴⁰ Raa wetu srau sau mari bokyas reto. Tna ana mtu raabis wetu twok. Tna ana mbis raa moo too mok-mak ana. Tna mawe wa k'ana mawe, "Nkyas Yesus yasom u to ma ee!" Tna raa manes ro Yahudi wetu mitsre raabis ro Yesus frok mammo.

⁴¹ Raabis wetu sikba amah reto frok mammo mkah simaut ro mase. Ana mhar mawe bosmot wana kbe mno re ana mkai bo ro samyoh. Mawe, "Allah ymat amu yawe nhaf moof mnan si. Tibyo amu nkai bo reto." Mnaut fetu tna ana simaut mase.

⁴² Tna fo rabu ti wawa ana mammo mkyas Yesus yasom renti. Mawe, "Ait tait *Mesias*." Ana mkyas Bokyas Moof (*Injil*) refo yoyo mam Samu ro Allah tna mam amah aro maut mroh ye.

6

Raa mabo krema moo boit saim k'raa kinyah

¹ Ti wetu to raa taro mawat naut mama smot Yesus. Ana wetu mbam raa mana ro Yahudi beta. Ana taro ja mkyas bo mkah mai ro Yunani, tna taro to, ja mkyas bo mkah mai ro Yahudi ye. Tna mkbair ro ja mkyas bo mkah mai ro Yunani wetu mno mmai msya ana ro mkyas bo mkah mai ro Yahudi. Ana mawe, "Raa ro ja saim boit mee k'raa soo to, ana saim mee k'semit wanu kaket fee."

² Raabis mabo 12 reto mari bo raa wetu mawe. Tibyo ana mtu raa *jemaat* beta mama hre su

mkyas bo reto. Ana mawe, “Raa wamu, soh amu nesait sui saim boit nee k’raa to, amu nrero re kbe nkyas Watum ro Allah kaket fee. Feto to mkair.

³ Nma, anu bsok raa wamu mabo krema tna bbis ana saim boit mee k’semit wanu. Kbe anu saso raa ro ja raa hartu, raa ro ja Har ro *Tuhan* mbo matak, tna ro mhar bo kaket ye. Anu bsok raa ro mfi feto.

⁴ Anu bno feto afo re amu nrero mkah bo skabuk k’Allah tna nkyas watum rAit kaket.”

⁵ Tna bo ro ana mawe reto to, raa beta ksoh. Tibyo ana msok Stefanus. Ait bosmot rait matak toni, tna Har ro *Tuhan* mbo ait matak ye. Tna msok Filipus, Prokhorus, Nikanor, Timon, Parmenas, msya Nikolaus ye. Nikolaus tait raa ro Antiokhia, ybam raa mana ro Yahudi fee. Menohe tiwya ait yrok kro *agama* Yahudi.

⁶ Raa baro makah raa mabo krema refo makah mama mee k’raabis (*rasul*) weto. Ana moo matem mtor k’ana abyō skabuk ana, re kbe ana moo boit saim k’raa kaket.

⁷ Tna Watum ro Allah to, syohor yoyo mamō. Tibyo rabu ti wawa raa ro mhau mam Yerusalem taro u mawat mama smot Yesus. Tna *imam* Yahudi mawat mama msan ana mhaf smot Yesus ye.

Raa mfot Stefanus

⁸ Stefanus tait, bouum (*karunia*) ro mbam k’Allah mhau k’ait. Bi Ait ysan yatak rAit yee k’Stefanus ye. Tibyo Stefanus yno bo ro msai. Tna ysair bo ro hnah mawat ye afo re raa mmāt tna mhar Allah yatak rAit.

⁹ Stefanus ykyas Yesus yasom. Tna raa baro ro smot Yesus fee, masen besboh bo ro Stefanus yawe. (Ana to mbam samu skabuk ro Yahudi sau. Ana tiwya mamu sryan raa, tna bobot wana mitsre ana. Ana weto taro to, mbam *kota* ro Kirene msya raa ro mbam *kota* ro Aleksandria, tna taro to raa ro mbam *provinsi* ro Kilikia msya raa ro mbam rabin ro Asia taro ye.)

¹⁰ Ana weto santri bo ro Stefanus yawe. Menohe Stefanus ykyas mkah Har ro Allah matak rAu. Ait ykyas bo kaket. Tibyo ana weto mros matak santri bo msya Stefanus fee ye.

¹¹ Ana mhaf kair Stefanus. Tibyo ana masen mamu wai tna msu bo k'raa roto baro mbis ana mamu mkyas-kas Stefanus. Tna raa weto sioh mawe k'raa makin mawe, "Amu nri Stefanus yamus Musa ysa Allah."

¹² Mkah iso reto ana misti re raa makin, raa mabi ro Yahudi msya *guru agama* Yahudi mrok kmo Stefanus. Tibyo ana mfot Stefanus makah mamu mee k'raa manes ro mtu srah raa ro Yahudi.

¹³ Menohe raa ro mhaf kair Stefanus mamu wai tna mbis raa masen mkyas bo sioh mawe, "Stefanus yiwana Samu ro Allah refo yoyo tna yiwana Watum ro Musa!

¹⁴ Amu nri ait ykyas Yesus raa ro Nasaret. Yawe Yesus meen yama yihabah Samu ro Allah refo! Tna ait ykyas bo ro anu bno soo. Yawe Yesus ybis raa mno bo roto hayah ye. Ait ykyas Watum ro Musa kaket fee!"

¹⁵ Tna raa beta ro hre mam siret reto mmat Stefanus yasu rait. Mmat he yasu rait to ngkren moof, mfi *malaikat* masu to.

7

Stefanus saak ait si k'raa ro mkyas bo mai k'ait

¹ Tna *imam agama* Yahudi ro yase ytu k'Stefanus yawe, "Bo ro raa mkyas mai k'nyõ wefo fo, bokyas ro ati fe mfe a?"

² Tna Stefanus yawe, "Tafoh na nsya raa mabi wojõ: Nri, tkyas masmaid rau mefo: Tiwya tinyi anu hohos ranu Abraham yamo yhau mam Haran fefares to, Allah ro yase toni tait yerif Ait k'Abraham mam rabin ro Mesopotamia.

³ Tna Allah yawe k'ait yawe, 'Nasen sikba rabin anyõ refo namo. Sikba raa mana wonyõ akus, tna namo't rabin sau ro kbe Jõ terif k'nyõ.'

⁴ Abraham yari fetõ, tibyo ait sikba rabin raa ro Kasdim tna yamo yhau mam remo ro Haran. Yhau tna yaja yhai. Tna fo, Allah ybis ait satoh ybam rabin reto yamo't rabin ro mfo anu nhau mam Kanaan refo fo.

⁵ Mam wore wetõ to, Allah ysan bo aro k'ait fee, tabam kebet baro bo fee. Tna Abraham ait yabe ku aro fefares ye, menohe Allah ysi bo k'ait yawe,

'Meen Jõ tno rabin refo beta mhau k'nyõ nsya ku renti wonyõ nbo ye.

⁶ Tna meen ku renti wonyõ kbe mamõ raa srim mam rabin raa roto. Tna raa ro rabin reto masen mbis ana mamõ sryan wana tna mno bo ro samyoh mai k'ana ye mamõ snok mam *tahun trion* 400.

⁷ Raa ro mbo ku renti wonyõ wetõ to, kbe meen Jõ tno bo ro samyoh btek mai k'ana. Tna fo ku renti wonyõ frok mbam *bangsa* reto tna mama skabuk Jõ mam yuk refo.'

Kejadian 15:13-14

⁸ Tna Allah ybis Abraham yawe,

‘Nyõ nsya raa sme wonyõ beta kbe nkom tohmi (*sunat*) afo re raa mhar mawe anu fo raa wojõ.’

Kejadian 21:2-4, 25:26, 29:31–30:24, 35:16-18
Abraham yabe Ishak tna ti ro krentuuf to ait ykom (*sunat*) Ishak. Ti baro firwas fo Ishak tait yabi tna ait yabe Yakub. Tna Yakub yabe anu hohos na wanu mabo trion 12 ro masom to.

⁹ Tna ait sait ybam k’ana yasom Yusuf. Ait yao na mabo 11 to, mhaf kair ait. Tibyo ana moo ait masim mtai k’raa ro Ismael. Tna raa weto moo ait makah mamot rabin ro Mesir. Menohe Allah yatam ait.

¹⁰ Bombra ro mkair ro raa mno mai k’ait beta to, Allah yno riof k’ait. Tna Allah yno re *raja* Mesir ksoh ait. Ait ymat he Yusuf yhar bo kakat. Tibyo *raja* retait ysok Yusuf yamo *gubernur* ybo rabin ro Mesir msya ybo samu ro *raja* wait beta ye.

¹¹ Tna hai awyah frok mama mai rabin ro Mesir msya rabin ro Kanaan ye. Tibyo raa mkai bo ro samyoh toni. Tna anu hohos na, bo ro ana mait to mrok marak ye.

¹² Menohe ati ro Yakub yari he Mesir to, boit *gandum* mhau fares to, ait ybis anu hohos na wanu masen mamot Mesir. Tinyi rau ro ana mamot Mesir oh meto.

¹³ Tna ana hah me mamu muhrin ewok to, Yusuf yasbrah ait k’yao na. Tna ait yakah yao na wait weto yamo yerif *k’raja*, re kbe ait yhar ana.

14 Tna Yusuf ybis raa mamō mtar yaja ysyā raa wait mama't Mesir. Tibyo raa mabo trion 75 satoh bo wana mamō mhau bana mam beto.

15 Yakub yasen yamo't Mesir yhau ti baro, tna yhai mam beto. Tna anu hohos na ro masom to ana mhai mam Mesir ye.

16 Tna ati ro hohos wanu frok mbam Mesir to, ana masen moo maja rana ytai mirenti mamō mse mam isra sau ro mhau mam tabam refo. Isra reto tiwya tinyi kukek ro bi Hemor ro mhau mam remo ro Sikhem to, masim k'Abraham.

17 Tiwya Allah yawe k'Abraham yawe, 'Meen Jō takah ku renti woNyō frok sikba Mesir.' Tiwya ana frok mbam Mesir fefares to, raa mana ranu mabe ku mawat hair. Tibyo ana ro Israel weto mrok msis toni.

18 Tna fo *raja* roto sait yasen ybo rabin ro Mesir reto riryōn. *Raja* retait wase Yusuf ye.

19 Ait yasen sikowah raa mana ranu ro Israel reto. Yber kait anu hohos na tna ybis ana moo ku mees wana to, beak mne majat makus.

20 Ti weto oh mi Musa fnya mabe ye to. Musa fnya mabe to, Allah ymat yawe Musa yoof toni tna yme mtos ait snyi tuuf mam amah ro yaja.

21 Snyi tuuf weto mkak to, yme moo ait mse mam wiak maku sau yakus. Tna ku ro ano ro *raja* sau moo ait mtos mfi ku rau fetō.

22 Tna Musa ykom bo mam Mesir. Yhar bo ro Mesir kakēt. Tna ait yros yatak ykyas bo ye tna ait yatak yno bo ye.

23 Musa tait *umur* 40 *tahun* bo fetō fo, ait yawe yamo ymat raa wait ro Israel.

24 Ait yamo, tna ati reto, ait ymat raa ro Mesir

sait yai raa ro Israel sait. Musa ymat feto tibyo ait yban raa rait ro Israel retait tna yai ait ro Mesir retait yajat.

²⁵ Musa ynaut yawe, 'Raa ro Israel ana mmat feto to, kbe mhar mawe Allah ysok jō mkah tno riof k'ana.' Menohe ana mhar fee.

²⁶ Tna fo rabu ti ait frok yamo tna ymat he raa mana wait ro Israel mabo ewok mafa anya. Ait yawe yno re ana miranya. Ait bhah ana yawe, 'Anu to raa mana sau sai, nfa ma!'

²⁷ Menohe ait ro yno bo mkair k'raa roto fi besre k'Musa yawe, 'Awya oh mi ysok nyō yse nbo amu tna ntu srah ro ja amu nno fo?

²⁸ Nyō nawe name jō mfi bo iis nyō name raa ro Mesir sait yajat a?'

²⁹ Musa yari feto tibyo waa. Tna yasen ysam yamo't rabin ro Midian tna yhau bait beto yfi raa srim sai. Tna ait yabe ku sme mabo ewok mam beto ye.

³⁰ Musa yhau mam Midian *tahun* trion 40. Tna ait yamo kene mam atu ro Sinai. Tabam reto riamo. Yamo nkri-kri to, tna *malaikat* sau mbrah nenat mam tafoh ro mait mam hyoh mana sau fo.

³¹ Musa ymat bo reto tibyo yrok ktak sai. Tna yamo kait ymat kaket. He *Tuhan* yawe k'ait yawe,

³² 'Jō fi Allah ro nyō hohos na ja smot. Tiwya Abraham, Ishak, ysya Yakub ja smot Jō ye.'
Musa yrok waa tetet tibyo ait yros ymat bo reto u fee.

³³ Tibyo *Tuhan* yawe k'ait yawe, 'Jō tama terif Jō k'nyō mam yuk refo fo tibyo yuk refo mbau. Feto

to nrus *sandal* ro nyō nse to.

³⁴ Jō tmat bo samyoh ro mai k'raa woJō mam Mesir oh to. Jō tari bo ro ana mawia ye. Jō troh tama fo mkah bo too riof tee k'ana. Feto to mfo refo Jō tbis nyō nasen hah namo't Mesir.'

Keluaran 3:5-10

³⁵ Tiwya Raa ro Yahudi mikyak Musa mawe, 'Awya oh mi ysok nyō nbo amu tna ntu srah ro amu nno bo to?' Menohe ait oh mi Allah ysok yamo aban mana ro yoo riof yee k'ana. Allah ybis *malaikat* rAit mama merif au k'ait mam hyoh mana to.

³⁶ Musa oh mi yakah raa ro Allah wAit snok ybam Mesir. Ait yno bo ro msai. Ait ysair bo ro hnah afo re raa mmat tibyo mhar Allah yatak rAit ye. Ait yno bo msai weto mam rabin ro Mesir, mam sawan ro masom 'Aya Mkek' tna mam tabam ro riamo wore wo ana mam mur *tahun* trion 40 bo to ye.

³⁷ Musa ykyas yawe k'raa ro Israel* yawe, 'Meen *Nabi* sait yfi jō, kbe Allah ysok ybam raa mana wamu tna ybis Ait yama yo k'anu.'

Ulangan 18:15,18

³⁸ *Malaikat* sau moo bokyas ro mroon to, mee k'Musa mam atu ro Sinai. Tna Musa ykyas watum reto k'anu hohos na mam tabam ro riamo tna ait ykom watum reto re kbe anu bmat tna bhar ye.

³⁹ Menohe anu hohos na hawe mari bo ro ait yawe tna ana mikyak ait sai. Tna ana mnaut

* **7:37** Som 'raa ro Yahudi' tna 'raa ro Israel' mkyas raa mana sau. Mnau anyu sai.

mam mhaf mato mawe ana hah me mamu bana Mesir u sai.

⁴⁰ □Tna ti sau Musa yaut yamo't atu ro Sinai yhau baro kait tna hah ye fefares. □Tna raa weto mawe k'Harun mawe, 'Musa ro tiwya ybo amu frok nbam Mesir tait, amu wase bo ro btek mai k'ait ye. Feto to nasen nfen *dewa* sau mkah bo mira iso k'anu frok bbam tabam refo bmo. Bo weto kbe raa katar matim tna anu kro mam ttis.'

⁴¹ Tibyo ana mfen *dewa* sau mfi *sapi* maku sau feto. Tna ana moo kak baro ktan mse mkah bo ro msan re kbe *dewa* reto mhaf moof. Ana mmat bo ro ana mesait mfen moof, tibyo ana simaut mase mbaut *dewa* reto ye.

⁴² Tibyo Allah kmo tna haberek kbor rof re ana skabuk sken, snyi msya ayō bo ye. Allah yno feto mamyot bokom ro tiwya Ait ybis *nabi* na mama mkom wia mawe, 'Raa ro Israel; tiwya anu nhau mam tabam ro riamo *tahun* trion 40. Tna anu ktan kak nsan k'Jō aro fee.

⁴³ Menohe anu skabuk smot bo ro anu nesait nfen sai. Tna anu sgi samu sahfra kabes Molokh tna anu bibi smot sken ro masom Refan ye. Feto to, kbe Jō tawah anu beak, nmo't rabin ro Babel tino.'

Amos 5:25-27

⁴⁴ Tna Allah ybis Musa yfen Sbyah ro moof sau. Tna Allah yerif iso ro Musa yfen ye. Ja raa mmat Sbyah reto tna mhar mawe Allah yhau ysya ana. Tna Sbyah reto, anu hohos na wanu ja mitrah mbo makah mamu mam woyō-woya sai ana mamu mam tabam ro riamo reto.

⁴⁵ Tna anu hohos na wanu msya Yosua mbo Sbyah ro Allah reto makah mama't rabin ro

Kanaan refo fo ye. Ana mama twok to, Allah yatim yno raa mana makin ro ja mhau mam oo reto msam mbrir-brar mam o wia. Tna hohos wanu mbo Sbyah reto mam o mhau mam rabin reto riryōn. Tna Sbyah ro Allah reto mhau msya ana weto *tahun* firwas *tahun* mam o snok mam oon ro *raja* Daud ybo ana.

⁴⁶ Tna Allah Ait yhaf ksoh Daud. Tna Daud yayoh k'Allah yawe, 'Nbis re jō sgi amah sau mkah bo Nyō nhau. Nyō fi Allah ro tiwya Yakub smot.'

⁴⁷ Menohe ku rait Salomo oh mi sgi amah ro mkah bo Allah yhau reto to.

⁴⁸ Menohe Allah ro yase toni tait ja yhau mam amah ro raa sgi fee. Tiwya ybis *nabi* rAit sait yama ykyas bo reto wia yawe,

⁴⁹ 'Jō tbo raa beta ro mhau mam sawro aJō msya raa ro mhau mam tabam refo beta ye. Sawro aJō to mfi wore Jō hre wefo tna jō tawah taa skok mam tabam refo. Amah ro ma fyi kbe anu sgi k'Jō thau to? Anu wefo ntai sgi samu mkah jō tamo thau baas ye fee saut.

⁵⁰ Jō tatem aJō oh mi tno bombra wefo beta fo.' "

Yesaya 66:1-2

⁵¹ Tna Stefanus yawe k'raa ro kmo ait weto yawe, "Anu nsya anu hohos na to, nnan anya sai. Anu nhaf matak tibyo have nri bo Har ro *Tuhan* mawe k'anu. Anu nnan fi raa ro wase Allah tibyo nimara mtuk ja nri Ait fee!

⁵² *Nabi* na sor ro tiwya Allah ybis mama to, anu hohos na sikowah ana beta. Tna *nabi* weto baro mama mkyas Raa sait ro wase yber safo. Mawe kbe Ait retait yama. Menohe anu hohos

na mame *nabi* weto majat ye. Tna fo Ait retait yesait yama. Menohe anu besruf Ait, tna nsan Ait k'raa mame yajat to ye. Ait tait Yesus.

⁵³ Watum ro *malaikat* mkyas k'Musa ykom to, tiwya Musa ysan k'anu menohe anu nri Watum reto nbo nno fee ye."

Stefanus raa mai yajat

⁵⁴ Raa manes ro Yahudi mari feto, tibyo ana mhaf mrok kmo toni.

⁵⁵ Menohe Har ro *Tuhan* mbo Stefanus matak. Tna ait heyut abyõ sawro ro Allah. Tna ymat bo yase ro Allah rAit. Tna ymat Yesus yros ysyia Allah mam hroh ro mbe ye.

⁵⁶ Tibyo Stefanus yawe, "Jõ tmat sawro ro Allah mato nkro, tna tmat 'Ait ro Yroh Yama Yfi Raa Sai'. Ait yros mam ati ro Allah yatem ati ye."

⁵⁷ Ana mari feto, tibyo kmo toni msyah tna burut wa mimara wana afo re mari bo ro ait ykyas fee. Tna ana beta masen mamoo mfot Stefanus.

⁵⁸ Mfot ait tna makah frok mamoo't *kota* mne. Raa ro riwai mkyas bo mai k'Stefanus weto to, mrus ratan wana ro ja myum mne fo, mse k'raa sait ybo kmot wea. Raa retait ait yasom Saulus. Tna ana moo fraa mai ait.

⁵⁹ Ana mawah fraa mai Stefanus kri-kri fo, ait yawe, "*Tuhan* Yesus: Noo tafos ajõ!"

⁶⁰ Tna ait sisya tmi yimna tna skabuk mkah ymai ro mase yawe, "*Tuhan*; noo iro refo nse k'ana masom to ma." Ait ykyas bo weto mkak si fo tna yajat.

8

1-2 Tna raa ro mhau mrat msya Allah baro mama sama hai ro Stefanus. Tna ana sraujin ait ye.

Raa sikowah raa ro smot Yesus mam Yerusalem

Tna maban ti reto to, raa sikowah raa mana ro smot Yesus. Tibyo ana ro smot Yesus beta masen mso-sa mamō't remo aro-aro mam *provinsi* ro Yudea reto. Tna taro mamō mhau mam rabin ro Samaria ye. Raabis (*rasul*) ro Yesus wAit mesait aran mhau akus mam Yerusalem.

Tna Saulus ait srau sau ysya ana ro mame Stefanus ye.

³ Tna ait tomer yno bo mkair mai k'raa ro smot Yesus. Saulus twok mam amah aro frok-frok tna soh ykai raa ro smot Yesus aro to, ait ybis raa mfot ana weto. Ait yfot raa sme msya ro ano ye, makah mamō mbu mam *bui*.

Filipus yno bo msai mam rabin ro Samaria

⁴ Raa ro smot Yesus frok mso-sa mamō mhau mam remo aro-aro. Mhau to, ana mkyas Bokyas Moof ro Yesus (*Injil*) mam woyō-woya sai.

⁵ Ana sait ro yasom Filipus yasen yamo't *kota* sau mam rabin ro Samaria. Ait ykyas k'raa ro mhau mam *kota* reto yawe, "Yesus tait oh mi *Mesias**."

⁶ Filipus ykyas Yesus yasom tna ysair bo ro hnah re kbe raa mmat tna mhar Allah yatak rAit. Raa msis-sas mari ait tna mmat bosair ro ait yno. Tibyo ana beta mari bo ro ait ykyas to, kaket ye.

* **8:5** Som reto to, "Ait ro Allah ysok tna yawe yamo *Raja*." Mai ro Ibrani mawe *Mesias*, tna mai ro Yunani raa mawe *Kristus*.

⁷ Ait yikyak kabes frok mbam k'raa mawat. Tna kabes weto frok mamu to, wohrarar mkah mai ro mase. Tna raa ro maa msya matem mhai to mawat. Filipus yisoh ana re maa, matem me moof. Tna raa ro maa maka to, ait yisoh tibyo ana mrok masen mamu ye.

⁸ Raa ro *kota* reto mmat fetu, tibyo mrok simaut mase toni.

⁹ Tna raa sait yasom Simon ja yno bo ro hnah mam *kota* reto soo oh. Tna raa ro Samaria mmat bo ro ait yno to mrok ktak sai. Tna bi ait ynaut ait yesait yawe ait tait raa ro ati toni.

¹⁰ Raa kinyah msya raa ro bobot beta ja mari ait kaket tna mnaut mawe Allah yoo yatak rAit yee k'bi ait refi. Mnaut mawe au oh mi ait yno bo ro hnah. Ja raa mtu Simon retait mawe, 'Bi Ait ro Yatak Toni'.

¹¹ Raa makin wetu mmat ait yno bo ro hnah fetu ti ooh-oh. Tibyo ana kro ait.

¹² Menohe Filipus yama ykyas Bokyas Moof ro Yesus *Kristus*. Ykyas raa mana ro Allah yamo *Raja* ybo. Raa mari mfot bo ro Filipus yawe fetu tna smot Yesus. Smot Yesus tna raa *baptis* ana ro sme msya ro ano ye.

¹³ Tna Simon, ro ja yno bo hnah retait, yama smot Yesus ye. Tibyo raa *baptis* ait ye. Tna ait yhau kro Filipus yoyo. Tna Simon ymat bo Filipus yno bo ro msai mawat. Filipus ysair bo ro hnah re kbe raa mmat tibyo mhar Allah yatak rAit. Simon ymat bo wetu beta tna yrok ktak sai.

¹⁴ Raabis ro mhau mam Yerusalem mari bo raa ro Samaria smot bokyas ro Allah fetu, tibyo ana mbis Petrus ysya Yohanes mbewok masen

mamo't rabin reto.

¹⁵⁻¹⁶ Tiwya raa makin weto raa *baptis* ana mkah Yesus yasom sai. Menohe Har ro Allah reto mroh matam ana fefares. Tna Petrus ysy Yohanes snok mam rabin reto to, ana mbewok skabuk re kbe Allah yoo Har rAit yee k'ana makin weto.

¹⁷ Ana mawah matem mse k'raa weto, tibyo Allah yoo Har rAit yse k'ana.

¹⁸ Simon ymat he raabis weto moo matem mtor abyõ k'raa fetu, tibyo Allah yoo Har rAit yse k'raa weto. Simon ymat fetu, tna ait yhaf myoh yawe yoo pitis yee k'ana mbewok.

¹⁹ Ait yayoh yawe, "Nasim tak reto k'jõ ye, afo re awya sai ro jõ tawah tatem tse abyõ to, kbe Allah yoo Har rAit yse k'ana ye."

²⁰ Menohe Petrus yastako Simon yawe, "Nyõ nnaut nawe Allah yatak to, ja raa moo mkah pitis a? Kbe nyõ nbo pitis wonyõ namo't rabin kair ro tafoh mait yoyo rno!

²¹ Nyõ srau ewok k'Ait oh meto ma! Kbe tak refo mhau msya nyõ ye fee saut.

²² Nashana oh! Nnaut nawe noo tak ro Allah rAit mkah pitis ma! Nyõ nno iro meto! Soh-soh *Tuhan* yyon iro ro nyõ nno reto.

²³ Thar tawe nyõ nhaf mkair toni. Kabes yabi ybo nyõ tna re ja nno iro mawat."

²⁴ Menohe Simon yawe k'ana mbewok yawe, "Anu nesait soh-soh *Tuhan* afo re kbe bo ro anu nkyas k'jõ weto to, btek mai k'jõ ma."

²⁵ Petrus ysy Yohanes mbewok mkyas watum ro *Tuhan* msya bo ro tiwya ana mmat Yesus yno ye. Ana mkyas bo mkak tna fo hah me mamo't

kota ro Yerusalem. Tna mam iso ro ana mamoto, ana mkyas Bokyas ro Moof (*Injil*) reto mam remo raa ro Samaria makin ro ana mamoto.

Bi sait ro ybam bangsa ro Etiopia

²⁶ Tna *malaikat* ro *Tuhan* sau mbis Filipus mawe, “Nasen namo sia snok mam iso ro mroh mbam Yerusalem mamoto *kota* ro Gaza to.” Iso reto to, iso ro riamo sai.

²⁷ Filipus yari fetoto tibo yasen yamo. Ait yamo tna ykai raa manes sait ro ybam *bangsa* ro Etiopia. Bi ait ja ybo pitis ro *bangsa* reto. Tna fai Kandake mamoto *ratu* ro mbo *bangsa* ro Etiopia. Bi ait tiwya yamoto Yerusalem mkah bo skabuk.

²⁸ Mfo refo hah ye yamoto Etiopia yamo. Bi ait hre mam asya rait yhoh yamo kri-kri to, ait *baca* aam ro tiwya Allah ybis *nabi* Yesaya ykom.

²⁹ Tna Har ro Allah mbis Filipus mawe, “Namo oh teto, namo kene kait mam asya reto to.”

³⁰ Tna Filipus yhoh yamo mam wetoto tna yari he bi ait *baca* aam ro *nabi* Yesaya ykom. Tibo Filipus ytu k'ait yawe, “Nyõ nmat aam reto tna srau ye fe mfe a?”

³¹ Tna bi ait yawe, “Soh raa aro betoo bokom refo maja rau k'jõ fee, fyi re kbe jõ thar to? Nama naut hre nsya jõ.

³² Bokom ro bi ait *baca* reto mkyas Yesus mawe,

‘Ait yfi *domba* ro ja raa mkuk makah mamoto ktan mkah bo maboto. Tna Ait ye yfi *domba* maku ro raa ktan mawyan menohe kwek fee, shait sai. Ait retait ykyas bo aro fee ye.

³³ Tna raa sikowah Ait mfi Ait raa kair sai. Raa mtu srah rAit to hayah sai, mfi srah ja raa mtu soo to fee. Ait yabe ku fefares to, raa mame yajat oh. Feto to raa aro bo mkyas ku renti wAit fee ye.' ”

Yesaya 53:7-8

³⁴ Tna bi ait retait ytu bo k'Filipus yawe, “Bo ro *nabi* Yesaya ykom reto to, awya oh mi ait ykyas feto to? *Nabi* Yesaya ykyas ait yesait fe ykyas raa roto aro ye a?”

³⁵ Tna Filipus betoo bokom ro *nabi* Yesaya ykom reto. Tna fo ykyas Bokyas Moof ro Yesus (*Injil*) k'bi ait ye.

³⁶ Ana mbewok mamō, mamō, tna snok mam aya sau. Tibyo bi ait yawe k'Filipus yawe, “Aya saah mefo. Mfo refo nyō *baptis* jō fe mfe a?” [

³⁷ Filipus yawe, “Soh nyō smot mkah nhaf anyō kaket ee, kbe jō *baptis* nyō.” Tna bi ait yawe, “Jō thar tawe, Yesus *Kristus* tait Ku ro Allah yare.”]

³⁸ Tibyo bi ait ro ybo pitis ro Etiopia retait yawe k'ait ro ybo asya rait reto yawe, “Nros! Jō troh wia.” Tna Filipus ysya bi ait mbewok mroh mamō mros mam aya reto tna Filipus *baptis* bi refi mam aya reto.

³⁹ Ana mbewok frok mbam aya maut mros mne to, Har ro *Tuhan* tubat Filipus makah mamō. Tna bi ait ymat Filipus u fee. Tna bi yabi refi yasen yamo renti mkah simaut ro mase.

⁴⁰ Har ro *Tuhan* makah Filipus mamō't remo ro Asdod. Tna ait yasen yamo renti. Yamo ykyas Bokyas Moof ro Yesus (*Injil*) mam remo beta ro mhau mam iso ro ait yamo iti. Tna ait snok mam *kota* ro Kaisarea.

9

Saulus yashana

¹ Tii weto to, Saulus knait raa ro smot *Tuhan* Yesus. Tna ait saim bo yawe raa mame raa ro smot Yesus to majat. Tna ait yamo yo *k'imam agama* Yahudi ro yase yawe,

² “Taja; nkom aam baro k'raa mabi ro Yahudi sor ro mhau mam *kota* ro Damsyik. Mam aam weto nkom nawe nyō nbis jō tama tfot raa ro kro Iso ro *Tuhan* Yesus to. Noo aam weto nee k'jō tna tamo't Damsyik tee aam weto k'raa mabi mmat. Tna soh jō tkai raa sme msya fnya ro smot Yesus sor to, kbe jō tfot ana take takah tamo't Yerusalem.”

³ Paulus yamo't Damsyik, tna wore ait yamo kene kait mam *kota* reto to, ait ymat bo sau mfi rir ro mrir mkek to. Bo reto mbam ayoh btek mama mame mur mam wore ait yros.

⁴ Ait yatu yai mam tabam, tna yari mai sau mawe, “Saulus; nyō sikowah Jō nno fyi meto?”

⁵ Menohe Saulus ytu si yawe, “*Tuhan*; Nyō fi awya metait?” Menohe Ait yawe si yawe, “Jō fi Yesus ro ja nyō sikowah tait.

⁶ Nasen oh! Tna namo't *kota*. Mam *kota* kbe raa sait ykyas bo ro tbis tawe meen nyō nno.”

⁷ Raa ro kro ait mammo su weto to, mrok shait bana sai. Riwai ana mari mai reto, menohe ana mmat raa ro ykyas bo reto aro fee ye.

⁸ Saulus yari mai reto tibyo yasen yros, menohe yasu mti. Tibyo ana ro kro ait mammo to, mbo yatem mammo't Damsyik.

⁹ Ti ro tuuf firwas to, ait ymat bo fefares ye. Ait yait bo fee ye, tna yata aya bo fee ye.

¹⁰ Raa sait ro smot Yesus yasom Ananias. Ait yhau mam *kota* ro Damsyik. Tna *Tuhan* yinyam bo k'ait mkah bosmi yawe, "Ananias!" Tna Ananias yawe, "*Tuhan*; jō mefi!"

¹¹ *Tuhan* ybis ait yawe, "Nasen namo't iso ro ja raa mtu masom 'Iso ro Ntrot' to. Tna ntu k'raa ro mhau mam amah ro bi Yudas to, nawe nyō saso raa sait yasom Saulus ro tiwya raa mabe mam *kota* ro Tarsus. Saulus tait mfo refo skabuk kri-kri meto.

¹² Riwai Jō tinyam bo k'Saulus tna ait ymat raa sait yasom Ananias twok yama't amah mato reto. Tna ymat Ananias yawah yatem ytor kait abyō afo re ait yasu mrok maah tna ymat bo ye."

¹³ Tna Ananias yawe, "*Tuhan*; ait retait, tiwya jō tari raa msis mkyas mawe ait yno bo ro mkair mai k'raa woNyō mam Yerusalem.

¹⁴ Ait fi, *Imam* manes ro *agama* Yahudi mbis ait yama't befo. Yama mkah bo yfot yake raa ro smot Nyō beta meto."

¹⁵ Menohe *Tuhan* yawe, "Nasen namo no k'ait oh! Saulus tait raa ro Jō tsok yno bo woJō. Jō tsok ait mkah bo ykyas Jō tasom k'raa mana ro Israel ye, tna k'raa mana roto makin msya *raja* wana ye.

¹⁶ Tna meen bo ro samyoh kbe btek mai k'ait ye. Bo weto, kbe Jō tesait terif k'ait matim wia."

¹⁷ Ananias yari feto tibyo yasen yamo. Yamo't amah ro bi Yudas tna ykai Saulus. Tna Ananias yoo yatem ytor k'Saulus tna yawe, "Saulus, tao ajō; ti taa *Tuhan* Yesus yerif Ait k'nyō mam iso ro nyō nama iti to. Ait ybis jō tama to k'nyō afo re nyō nasu mrok maah tna re Har ro Allah mama

mbo nyõ matak ye.”

¹⁸ Ananias yawe feto to, bo sau mfi syoh masin btek mbam k’Saulus yasu. Tibyo ait yrok yasu maah. Ait yasen tna Ananias *baptis* ait.

¹⁹ Tna ait yait boit, tibyo yetsu matak u.

Saulus yhau berur su ysya raa ro smot Yesus

Saulus yhau ti baro ysya raa ro smot Yesus mam *kota* ro Damsyik.

²⁰ Tna mam weto si oh to, ait ja yamo wosa bokyas ro Yesus mam samu skabuk raa ro Yahudi sor yawe, “Yesus tait Ku ro Allah yare.”

²¹ Raa ro mari bo ro ait ykyas to, mrok ktak beta tna mawe, “Ait refi oh mi tiwya yhau mam Yerusalem tna sikowah raa ro smot Yesus mam tno. Tna raa mawe ait yama’t befo mkah bo yfot raa weto yakah yamo’t Yerusalem. Tna kbe ysan ana *k’imam* manes ro Yahudi.”

²² Saulus ykyas Yesus yasom k’raa ro Yahudi ro mhau mam Damsyik. Ykyas kaket. Ait betoo k’ana yawe Yesus tait *Mesias*. Mbetoo mbe toni. Tibyo ana mrok mamboi tna ana matak msya ait santri bo fee ye.

²³ Ti mawat baro firwas tna raa ro Yahudi hre siret tna saim bo su mawe kbe ana mame Saulus yajat.

²⁴ Menohe Saulus yari bo ro ana saim reto. Baas mti bo to, raa ro Yahudi ste wa mam *kota* kitana re huwya mame ait yajat. □Tiwya raa mana *tembok* muur *kota* reto mne.□

²⁵ Ana ro Yahudi ste wa Saulus feto, tibyo mti sau fo raa ro smot Yesus mse Saulus mam *keranjang* maboh sau. Tna mruk ait yroh wai mam *tembok* ti mne.

²⁶ Ait yasen frok ybam Damsyik hah ye yamo't Yerusalem. Ait snok si mam Yerusalem fo, ait yawe yiranya ysya raa ro smot Yesus. He mfe. Ana waa mtu sioh k'ait mawe, "Ait refi sne mate k'anu yawe ait smot Yesus, yawe feto to, ait sioh anu sai meto."

²⁷ Menohe Barnabas yakah ait yamo tne k'raabis ro Yesus tna ait ykyas k'ana yawe, "Saulus ro tiwya tinyi hawe kro Yesus tait, mfo refo haberek kro Yesus oh. *Tuhan* yerif Ait mam iso maka, tna ykyas bo k'ait ye. Tna fo ait yamo't Damsyik to. Mam Damsyik Ait yasen ykyas Yesus yasom k'raa. Ait waa ana fee ye."

²⁸ Feto to ana ksoh Saulus yhau mam Yerusalem ysya ana. Yhau mam Yerusalem tna ykyas Yesus yasom kaket mam beto ye.

²⁹ Ait ja santri bo ysya raa Yahudi ro ja mkyas bo mkah mai ro Yunani. Menohe ana mari Ait fee. Ana mawe mame ait yajat.

³⁰ He mfe. Kuber ro Yesus wAit ana mari bo ro ana saim reto. Tibyo ana makah ait mamot *kota* ro Kaisarea. Tna fo ana mbis ait yamo renti yamo't *kota* ro Tarsus.

³¹ Tna ti weto to, raa mkbair ro smot Yesus mam *provinsi* ro Yudea, *provinsi* ro Galilea msya rabin ro Samaria beta to, raa aro bo sikowah ana u fee ye. Ana bosmot wana mo matak renti. Mhau to waa *Tuhan*. Tna Har ro Allah mros tis ana, mban ana. Tna raa mawat ro smot Yesus fefares to, ana mama smot Yesus ye.

Petrus yisoh Eneas tna yno Tabita mrok masen

³² Petrus yamo yur ytan mam remo makin weto to, ait yamo sia yamo ymat raa ro Allah wAit mam remo ro Lida.

³³ Mam beto to, ait ykai raa sait yasom Eneas. Eneas tait, yaa msya yatem bo to mhai ye, tibyo ja yakus yjin sai bait mam aam sai *tahun* trion krentuuf oh.

³⁴ Petrus yawe k'Eneas yawe, "Eneas, Yesus *Kristus* yisoh nyō noof oh. Nasen beah aam anyō oh." Petrus yawe feto, tibyo Eneas yasen buu yros.

³⁵ Tna raa ro mhau mam Lida msya raa ro mhau mam Saron beta to, ana mmat Eneas yamo fo, feto tibyo mrok waa smot *Tuhan* Yesus ye.

³⁶ Tna fai sau ro smot Yesus mhau mam remo ro Yope. Fai au masom Tabita. (Tna mam mai ro Yunani to, raa mtu au masom Dorkas ye.) Au to ja mno bo moof tna matmof raa kinyah yoyo ye.

³⁷ Mam ati reto to, au kiyam tibyo mhai. Raa moo hai rau mse mate aya tna moo mse mam amah hawar ro uu.

³⁸ Remo ro Yope msya remo ro Lida to mhau kene sai. Tna raa mkbair ro smot Yesus tna ro mhau mam Yope mari he Petrus yhau iti mam Lida. Tibyo ana mbis raa mabo ewok masen mam mawe k'ait mawe yama fooh.

³⁹ Mamo, tna Petrus yari feto tibyo yasen kro ana mamot Yope. Ait snok si fo ana makah ait mamot amah hawar ro uu reto. Semit beta ro mhau mam beto to, hre mawia. Ana mama mo k'Petrus tna merif ratan ro tiwya Dorkas mtin mee k'ana sor fo.

⁴⁰ Petrus ybis ana ro mhau mam beto beta frok. Tna fo, ait yesait aran yhau mam amah

hawar reto. Tna ait yaka tmi yimna mte tna skabuk. Tna ait haberek ymat hai reto tna yawe, "Tabita, nasen oh!" Tibyo au mrok mmat Petrus tna masen hre ye.

⁴¹ Petrus ybo au matem teta tna au masen mros. Tna fo ait ytu semit weto msya raa ro Allah wAit mama mmat fai Dorkas ro mrok masen.

⁴² Bo ro Petrus yno reto syohor mamno snok mam rabin reto beta. Raa mawat mari fetoto tibyo mama smot Yesus.

⁴³ Tna Petrus yhau mam Yope ti baro kait ye. Yhau mam amah ro bi Simon ro ja yfen bo ro mbam kak marak tait.

10

Tiwya Allah ymat raa mana ro Yahudi hayah tna raa mana roto hayah ye

¹ Bi sait yhau mam kota Kaisarea to yasom Kornelius. Ait yamo aban mana ro ja ybo raa sbe majin sau. Raa sbe ro ybo weto mabo 100. Tna ana weto to raa mbam rabin ro Italia.

² Kornelius ja mur-mur skabuk Allah. Tna Kornelius, yfain, msya raa ro ja mhau mam amah rait to, beta waa Allah ye. Menohe ana to raa ro Yahudi fee. Ait ja yoo bo mawat yee k'raa kinyah ro Yahudi, tna ait skabuk Allah yoyo ye.

³ Baas fares mam ayō ro tuuf fetoto, ait ymat *malaikat* ro mbam Allah sau mama twok mam amah rait tna mawe k'ait mawe, "Kornelius fi!"

⁴ Ait ymat sas *malaikat* reto tna yrok waa yawe, "Tuhan; bo bawya mefo?" Tna *malaikat* reto mawe k'ait mawe, "Allah yari skabuk anyō oh

tna ymat bosan ro ja nyõ nsan k'raa kinyah ye oh. Ait ymat feto mno yhaf mnan.

⁵ Nasen nbis raa baro mamõ fooh mamõ't remo Yope. Tna mmen Simon-Petrus yama.

⁶ Ait yhau mam amah ro bi Simon ro ja yisoh kak marak. Amah reto to mhau kene mam wore aya sawan maam kait."

⁷ Tna *malaikat* reto sikba Kornelius mamõ. Tna fo ait yasen ytu sryan wait mabo ewok msya raa sbe ro ja smot Allah kaket sait mama. Ana weto ja mhau mno bo ro Kornelius ybis sai.

⁸ Ana mama tna ait betoo bo ro ait ymat weto beta k'ana. Tna fo, ybis ana mamõ't Yope tna mmen Petrus yama.

⁹ Rabu ti fo ana masen mamõ. Ayõ baas to ana mamõ kene mam remo ro Yope. Tna mam weto to, Petrus yamo yaut abyõ mam amah tna skabuk ye.

¹⁰ Petrus yhai sre tna yawe yait boit. Boit raa siwryan kri-kri fo tna Allah yinyam bo sau k'ait.

¹¹ Ait ymat ayoh mato maah, tna fo ait ymat bo sau mfi bo hawee mabuf ro maboh sau mroh mbam uu mama. Hawee reto kro mbam tuut trion jiit mroh snok mam tabam.

¹² Ymat he *binatang* aro rau-rau beta mhau abyõ mam hawee reto. *Binatang* msya aban ro mton aro rau-rau, tna msya ruu aro rau-rau ye.

¹³ Tna ait yari mai sau mawe, "Petrus: Nasen ktan bo weto nabo oh!"

¹⁴ Menohe Petrus yisboh si yawe k'Tuhan yawe, "Mfe saut! Bo ro amu nbau weto to, ja jõ tabo bo weto mafa fee!"

¹⁵ Tna mai reto mkyas k'ait muhrin ro ewok mawe, "Allah yawe, 'Mfo wefo to, tawe bo weto

bo ro mbau fee. Nabo oh. Nbau bo weto u to ma.’”

¹⁶ Bo reto Allah yno muhrin tuuf, tna fo Allah tubat hawee ro riwai reto to, maut mamō’t ayoh twok mamō marak.

¹⁷ Tna Petrus ynaut bo refo mam yhaf yawe, “Bo bawya ro jō tmat mefo ee?” Ait ynaut fetō, tna raa ro bi Kornelius ybis wetō mama. Riwai ana snok mam remo ro Yope tna mtu sas amah ro bi Simon. Ana mros mam amah mato.

¹⁸ Tna mtu mawe, “Simon-Petrus metait a?”

¹⁹ Petrus hre ynaut bo ro ymat fares. Tna Har ro Allah mawe k’ait mawe, “Nari, raa mabo tuuf saso nyō mama fo.

²⁰ Nasen tna nroh namō’t te. Tna fo nsya ana nmo. Jō oh mi tbis ana mama mmen nyō to. Feto to namo sai.”

²¹ Tna Petrus yroh yamō’t te tna yawe k’ana yawe, “Jō ro anu saso oh mefi. Bo bawya ro anu nnaut nma fo?”

²² Tna ana mawe k’ait mawe, “Amu nma fo, bi Kornelius ybis. Ait tait aban mana raa ro sbe. Ait ja yno bo ro Allah ksoh tna smot Allah ye. Tna raa ro Yahudi beta mmat bo ro ait yno to, mawe ait tait raa ro ja yno bo moof. Iis *malaikat* ro Allah rait sau mawe ait ybis amu nma nmen nyō bmo’t amah rait mam Kaisarea. Mawe nyō namo no k’ait tna kbe ait yari bo ro nyō nkyas k’ait.”

²³ Petrus yari bo ro ana mawe fetō. Tna yawe, “Nma njin nsya jō oh mam befo. Tna menrabu rabu anu bmo.”

Rabu fo, ana mabo jiiit masen mamō sikba Yope tna kro iso ro mamō’t Kaisarea. Tna raa ro Yope

ro smot Yesus taro kro ana ye.

²⁴ Mam Kaisarea to, Kornelius ytu yao na msya yafoh na bo to mama hre su msya ait ste Petrus wea. Tna rabu ti fo, Petrus ysya raa wait wefo mamam snok mam Kaisarea.

²⁵ Petrus yamo twok mam amah mato fo, Kornelius yama tna yaka yabum yawe hartu ait ye.

²⁶ Menohe Petrus ymat feto ybo ait yasen tna yawe, “Nasen oh, jō fi raa sai mefo. Tnan anya tsya nyō sai.”

²⁷ Petrus ykyas bo ysya bi ait kri-kri to, twok mam amah mato fo. Ait ymat he raa msis siret ste ait wea oh.

²⁸ Tna ait yawe k’ana yawe, “Anu fo raa ro srim. Menohe anu nhar bo mafa ramu raa ro *agama* Yahudi to. Watum ranu mkyas mawe, ‘Anu raa ro Yahudi: Nmo niranya nsya raa mana roto ma! Tna twok mam amah wana bo to ma ye!’ Menohe taa, Allah yinyam bo k’jō yawe raa mana roto to, kbe mbau k’amu, raa ro Yahudi u fee. Yawe, ‘Nnaut nwe raa mana roto to raa ro mkair ma!’

²⁹ Feto oh mi ati ro anu ntu jō tama’t befo to, jō ksoh tama sai. Tna hawe fee. Mfo, jō ksoh thar bo bawya ro mno re anu ntu jō tama’t befo fo?”

³⁰ Tna bi Kornelius yawe k’ait yawe, “Ti jiiit mam wore ayō hawer fefo fo, jō skabuk mam amah. Jō skabuk kri-kri fo, bi ro yyum ratan ro mboh kren toni sait yros tubor kene mam jō tasu.

³¹ Tna yawe k’jō yawe, ‘Kornelius, bo ro nyō skabuk k’Allah to, Ait yari oh. Tna bombra ro nyō ja nsan k’raa kinyah to, Ait yhar oh.

³² Feto to, nbis raa mamom’t Yope mmen Simon-

Petrus yama. Ait mfo yhau mam amah ro bi Simon ro ja yfen bo mkah kak marak tait. Amah reto to mhau kene mam aya sawan maam kait.'

³³ Jō tari fetō si to, t̄bis raa mamō fooh mmen nyō tna nyō nhaf moof k'jō nama fo. Tna mfo amu beta siret mam wore Allah yasu ymat refo, mkah bo nri bo ro Allah ybis nyō nkyas k'amu beta."

³⁴ Petrus ykyas bo k'ana yawe, "Mfo refo Jō srau t̄naut tawe Allah ysok raa mana sau yse hayah tna ysok raa mana roto taro yse hayah fee saut. Ait ymat beta yawe mnan anya sai.

³⁵ Ja Ait ymat raa mana ryo sai to, awya sai ro waa Ait tna yno bo ro Ait ksoh to, Allah yoo ait yamo raa mana rAit ye.

³⁶ Bokyas riwai reto Allah ykyas k'raa mana ro Israel: Ykyas yawe, 'Yesus *Kristus* tait kbe yoo riof ro mase yee k'raa beta.'

³⁷ Anu nesait nhar bo beta ro tiwya mabo mam *provinsi* ro Yudea. Tinyi rau to, Yohanes ro ja *baptis* raa to, ykyas bo mam *provinsi* ro Galilea.

³⁸ Tna fo Yesus ro ybam remo ro Nazaret yama. Allah yoo yatak yee k'Ait tna yoo Har rAit yse matam Ait ye. Allah yatam Yesus tibyo woyō-woya sai Yesus yamo to, Ait ja yno bo moof tna raa ro kabes yabi (Iblis) ybo to Ait yisoh moof ye.

³⁹ Tna amu, raabis ro Yesus wait, nmat bo ro Ait yno beta mam *kota* Yerusalem msya rabin ro Yahudi to ye. Bo reto amu nbo nkyas. Tna raa mame Ait yajat mam ara warok.

⁴⁰ Menohe mam ti ro tuuf to Allah yno Ait yrok yasen. Tna yno re raa mmat Ait ye.

⁴¹ Raa makin beta fee. Menohe amu nmat Ait, tna amu hre niit boit nsya Ait su ye. Tiwya Allah ysok amu nesait re nmat tna nkyas Ait yasom k'raa roto ye.

⁴² Ait ybis amu nmo nkyas Yesus yasom. Ybis amu nmo nkyas nwe, 'Allah ysok Ait yamo Raa ro yhau susai ytu srah raa ro mhai msya raa ro mhau fares bo yari ye.'

⁴³ Tiwya *nabi* na beta mhaf sau mkyas Ait msya bo ro kbe Ait yno. Ana mawe awya sai ro smot Ait to, kbe Allah yyon iro wana beta ye."

⁴⁴ Tna Petrus ykyas bo wefo kri-kri fo, Har ro *Tuhan* mroh mama mbo Kornelius ysya raa wait ro mari bo ro Petrus ykyas fo beta.

⁴⁵⁻⁴⁶ Tna ana mrok mkyas bo mkah mai roto ro ana wase fares, tna mbaut Allah ye. Tna raa ro Yahudi ro smot Yesus, ana ro riwai kro Petrus mama mbam Yope to, hre mmat. Ana ro Yahudi mmat Allah yoo Har rAit yuumto k'raa mana roto ye to, ana mrok ktak toni. Tna Petrus yawe k'ana yawe,

⁴⁷ "Allah yoo Har rAit yse mbo raa wefo oh. Yno mamyot mnan fi ro tiwya Ait yno k'anu ye oh. Nma, anu *baptis* raa wefo mkah aya ye! Kbe raa aro mno wa fee."

⁴⁸ Tibyo Petrus ybis raa *baptis* ana mkah Yesus *Kristus* yasom. Tna ana mabe Petrus soh-soh ait mawe, "Nyō namo wia ma. Nhau nsya amu ti baro wia rere!"

11

Petrus betoo Kornelius k'raa ro Yahudi mam Yerusalem

¹ Tna raabis (*rasul*) ro Yesus msya raa ro smot Yesus mam rabin ro Yudea beta to, tiwya mbam raa mana ro Yahudi sai aran. Tna ana mari he raa mbam raa mana roto baro mama smot bokyas ro Allah ye.

² Tna Petrus yamo't Yerusalem. Mam beto to, raa Yahudi ro smot Yesus taro mastako ait mawe,

³ "Taa nyõ twok mam amah raa mana roto to, tna sohmaam bo nsya ana su ye. Feto Allah hawe!"

⁴ Menohe Petrus betoo bo weto sau-sau k'ana kaket yawe,

⁵ "Taa jõ skabuk mam remo ro Yope kri-kri fo, Allah yinyam bo sau k'jõ. Tna jõ tmat bo sau mfi bo hawee mabuf ro maboh sau mroh mbam uu. Hawee reto kro mbam tuut trion jii, tna mroh snok mam tabam kene wore jõ hre.

⁶ Tna jõ thaninin, tmat he mato to matot mkah *binatang* ro mha, *binatang* ro rbyoh, aban ro mton, msya ruu ye.

⁷ Tna jõ tari mai sau mama mawe k'jõ mawe, 'Petrus; nasen ktan bo weto nabo oh!'

⁸ Menohe jõ tawe k'*Tuhan* tawe, 'Mfe, bo ro amu nbau mefo, ja jõ tabo fee.'

⁹ Menohe tari mai ro mbam sawro reto muhrin ro ewok. Mkyas mawe, 'Bo ro Allah yawe nyõ nabo to, ne nbau to ma!'

¹⁰ Bo reto, Allah yno muhrin ro tuuf. Tna fo Allah tubat bo weto beta yakah yamo't ayoh twok marak.

¹¹ Tna mam weto si to raa mabo tuuf snok mam amah ro amu nhau. Ana weto to, taa Kornelius ybis mbam *kota* ro Kaisarea yawe mama mo k'jõ mam remo ro Yope.

¹² Tibyo Har ro Allah mawe k'jō mawe, 'Nasen nsya ana nmo su oh! Nnaut bo myum-yam ma!' Tna raa wamu mabo ntamam refo masen kro jō mamō't Kaisarea. Amu nmo twok mam amah ro bi Kornelius.

¹³ Tna ait yawe, 'Taa *malaikat* sau frok tubor mam amah mato tna mkyas k'jō mawe jō tbis raa mamō't Yope tna mmen Simon-Petrus yama.

¹⁴ *Malaikat* reto mawe kbe amu nri bokyas ro Simon-Petrus ykyas afo re kbe Allah yoo riof ro mase yee k'jō tsya raa wojō beta.'

¹⁵ Tibyo jō taban tkyas bo fo, Har ro *Tuhan* mroh mama mbo ana mfi bo ro tiwya tinyi rau mroh mama mbo anu wia oh mefo.

¹⁶ Tna jō te tnaut bo ro tiwya *Tuhan* yawe, 'Yohanes *baptis* raa mkah aya sai, menohē anu to, kbe Allah *baptis* anu mkah Har rAit.'

¹⁷ Tiwya anu smot *Tuhan* Yesus *Kristus* tna Allah yoo Har rAit yee k'anū. Tna jō tmat tawe Allah yoo Har rAit yee k'ana ye. Ait yno mnan fi bo tiwya yno k'anū ye to. Feto tna jō thau sayō bo ro Ait yno sai. Tnaut tawe jō fi raa sei sai, kbe tno wa bo ro Allah yno reto to fee!"

¹⁸ Tna raa ro Yahudi mari bo ro Petrus betoo feto. Tibyo ana mastako ait u fee. Tna mbaut Allah mawe, "Allah yno iso ro moof afo re raa mbam raa mana roto mashana ye, tna meen ana mkai mamos mae ye."

Barnabas ysya Saulus mbewok mamō't Antiokhia

¹⁹ Maban mam wore Stefanus tiwya raa mame to, raa sikowah raa ro smot Yesus. Tibyo ana msam somya mamō snok mam rabin ro Finisia,

sato ro Siprus msya *kota* ro Antiokhia. Ana mamto, mkyas Yesus yasom k'raa ro Yahudi sai aran.

²⁰ Menohe ana makin ro sonya weto to, ana taro raa ro mbam Siprus msya raa ro mbam *kota* ro Kirene. Ana weto mkyas Bokyas ro Moof (*Injil*) mamto snok mam *kota* ro Antiokhia. Tibyo mkyas *Tuhan* Yesus yasom k'raa ro ja mkyas bo mkah mai ro Yunani ye.

²¹ Tna *Tuhan* yatam ana tibyo raa msis-sas mashana smot Ait.

²² Tna raa ro smot Yesus mam Yerusalem to, ana mari bo raa ro Yunani smot Yesus ye.* Tibyo ana weto mbis Barnabas yasen yamo't Antiokhia.

²³⁻²⁴ Barnabas tait raa ro ja yno bo moof, tna Har ro Allah ja mbo ait matak. Tna bosmot rait matak ye. Barnabas yamo't *kota* ro Antiokhia. Tna ymat bo Allah yatmof raa ro rabin roto ye feto. Ait srau bo reto, tibyo yrok simaut mase. Tna ait ykyas bo moof k'ana yawe, "Nhau to, smot *Tuhan* kaket!" Tibyo, raa msis-sas mama smot *Tuhan* Yesus.

²⁵ Tna fo Barnabas yasen yamo't *kota* ro Tarsus saso Saulus.

²⁶ Ait ykai Saulus, tna yakah ait hah yamo't Antiokhia. Ana mbewok mhau su msya raa ro smot Yesus mam beto to *tahun* sau. Ana mhau mam beto to mkyas, mbetoo bokyas ro Yesus k'raa msis. Tna mam beto ye raa maban mtu

* **11:22** Mamto snok ti weto to, raa ro Yahudi mnaut mawe Allah ysok raa mana ro Yahudi mesait aran. Ana wase bo Allah ja yatmof raa roto ye to.

raa ro smot Yesus weto, ja mtu mawe 'raa mana ro Kristen' to.

²⁷ Ti weto to, *nabi* ro Allah ja ybis mkyas bo wAit to, baro mama mbam Yerusalem mamot Antiokhia.

²⁸ Tna *nabi* weto to, sait yasom Agabus. Har ro *Tuhan* ybis ait yasen yawe, “Meen hai sre ro msai sau btek mai rabin ro wefo beta.” (Bo ro ait yawe reto mabo mam ati ro *raja* Klaudius ro yase ybo rabin weto beta.)

²⁹ Tna raa ro smot Yesus ro mhau mam Antiokhia to, ana mawe, “Boit wana ro mhau mam Yudea to mabut. Feto to bma, anu boo pitis wanu baro bee k’ana ro smot Yesus ro mhau mam beto.” Tibyo raa sait-sait yoo pitis rait yee mamot bo ro ait yse.

³⁰ Tna fo Barnabas ysya Saulus mbewok makah pitis weto mam msan *k’majelis* ro mhau mam Yerusalem mkah bo ana saim k’raa wana ro hai sre.

12

Raja Herodes sikowah raa ro Kristen

¹ Mam ti weto to *raja* Herodes ybis raa wait mam mfot raa ro Kristen baro afo re ait yno bo ro mkair btek mai k’ana.

² Tna ait ybis raa sait yoo sogi yaru Yakobus ro Yohanes yao tait yajat.

³ Raa ro Yahudi ksoh bo ro ait yno reto. Tibyo ait ybis raa mam mfot Petrus. Yfot Petrus mam wore raa ro Yahudi makyō Korat *Roti* ro *Ragi* Marak.

⁴ Raa mfot Petrus tna *raja* Herodes ybis ana mbu ait mam *bui* tna ybis raa sbe mabo trion 16

kmot ait. *Raja* Herodes ynaut yawe kbe Raa ro Yahudi makyõ Korat ro *Paskah* mkak oh tna fo, ait kbe ytu srah rait mam wore raa masu makin mmat.

⁵ Feto to Petrus, yhau mam *bui* fares, menoho raa ro Kristen mur-mur skabuk ait k'Allah.

⁶ Raa ro Yahudi makyõ Korat ro *Paskah* mkak. Tna Herodes yawe mhau rabu tna tufrok Petrus frok ybam *bui* reto. Tna mti rau fo, Petrus yjin. Raa sbe mabo ewok kmot ait. *Rantai* trion ewok make ait yatem tna mii k'ana matem ye. Tna Petrus yjin mam masuf. Tna raa sbe mabo ewok naut mros mam masa ro mne kmot *bui* reto.

⁷ Tna *malaikat* ro *Tuhan* sau frok mros tubor mam wore Petrus yjin. Tna kek sau mrok mait mram *bui* reto. Tna *malaikat* reto mti ait mawe, "Nasen fooh!" Tibyo *rantai* ro make ait yatem reto mrok ntras mbam ait yatem btek.

⁸ Tna *malaikat* reto mawe, "Noo ratan anyõ nyum tna noo *sandal* anyõ nse naa ye." Petrus yari yno bo ro *malaikat* mawe reto. Tna fo *malaikat* mawe, "Noo *jubah* anyõ to nyum naut tna kro jõ bmo."

⁹ Tna ait kro *malaikat* reto frok mammo. Mamo to mfi bo ait wase-wasa sai. Ynaut yawe yjin smi bo ymat *malaikat* reto. Ait wase yawe bo reto mabo tu oh, fe mfe a?

¹⁰ Tna ana mbewok frok miwrek raa sbe ro kmot *bui* reto, tna fo mammo miwrek raa sbe roto, tna ana snok mam masa *besi* ro muut snek reto wa. Masa reto to, mesait mato maa sai. Tna ana frok, tna mammo kro iso sau si fo, *malaikat* reto mrok marak sikba tubor sai mam weto.

¹¹ Tna ait yrok yhar kaket yawe, "Bo refo mabo oh! Mfo refo jõ thar tawe *Tuhan* ybis *malaikat*

rAit tna yno riof k'jō. Ait bitsre jō tbam *raja* Herodes yatak rait tna mbam bo ro raa ro Yahudi saim mawe mno mai k'jō bo ye."

¹² Ait yrok srau fetō tna fo, yamo't samu ro Maria ro Yohanes-Markus yme. Mam beto to, raa mawat siret tna hre skabuk.

¹³ Petrus yama yai masa ytu ana. Tna sryan ro ano sau masom Rode mama mros wane mari awya ro mii ytu mam ti masa meit.

¹⁴ Au mari he Petrus ymai tna au simaut mase tibyo sorni mitrah masa reto k'ait. Au mamō fooh mamō mabah k'ana ro mhau mam amah mato reto mawe, "Petrus yama meit!"

¹⁵ Menohe ana mawe si k'au mawe, "Nyō nker meto a?" Menohe au mawe, "Jō tker fee. Bi ait yama meit!" Tibyo ana mawe, "Tna sai nyō nmat *malaikat* ro ja kmot ait."

¹⁶ Menohe Petrus yros fares tna ytu u. Tna ana mitrah masa tna mmat he ait yesait yros. Tibyo mrok ktak sai.

¹⁷ Petrus yawe k'ana yawe, "Shait oh! *Tuhan* yakah jō frok tbam *bui* reto. Jō tkyas bo ro *Tuhan* yno wia. Tna fo nsen nmo nkyas bo weto k'Yakobus ysya raa wanu taro ye mari." Ait ykyas bo weto mkak tna ymah meen k'ana akus tna frok yamo't yuk roto.

¹⁸ Rabu fo, raa sbe wefo mrok mkyas mnin-nin mawe, "Wah, ait snok ybam woyō? Ja weno anu ste matak to re ait frok yamo woyō!"

¹⁹ *Raja* Herodes yari bo reto, tibyo ybis raa sbe roto mamō saso Petrus menohe ana mkai ait fee. Tna Herodes ytu sas k'raa sbe ro ti sai kmot Petrus weto tna ybis raa sbe roto mfot ana

mame majat. Tna fo *raja* Herodes yasen frok ybam rabin ro Yudea yamo't *kota* ro Kaisarea tna ait yhau ti baro kait mam beto ye.

Malaikat ro Allah moo saba mse mkok raja Herodes tibyo yhai

²⁰ Ti weto to *raja* Herodes kmo raa ro *kota* Tirus msya raa ro *kota* Sidon toni. *Kota* wana to ja mkai boit mbam oo ro *raja* retait ybo. Tna raa wana baro saim su tna mam mkyas bo k'ait. Ana mam tna mkai bi Blastus wia. Ait retait ja yisoh amah ro *raja* rait. Ana mawe k'ait mawe ana ksoh mrok miranya msya *raja* u. Blastus yari feto, tna yawe bo ro ana saso reto moof. Tibyo ait yamo ykyas k'*raja* Herodes.

²¹ Tna Herodes ysok ti sau yse mkah ykyas bo k'raa weto beta. Ti reto ait yyum ratan ro ja *raja* myum tna yaut hre mam ambar ro ja *raja* hre ye. Tna ykyas bo k'ana.

²² Ana mari bo ro yawe to, simaut mmai mnin mawe, "Mai reto mai ro mbam k'allah sait meto tna mai reto raa meto fee."

²³ Tna *raja* Herodes sayõ ana mbaut ait sai. Ait ywaar bo ro ana mawe fee, tna ait ybaut *Tuhan* fee ye. Tibyo mam weto si oh to, *malaikat* ro *Tuhan* sau mno ait kiyam. Moo saba mse mkok ait. Tibyo yhai.

Har ro Tuhan mbis Barnabas ysya Saulus mam mkyas Yesus yasom

²⁴ Tna watum ro *Tuhan* to syohor yum. Tibyo raa taro u mawat bo mari tna mama smot Yesus ye.

²⁵ Barnabas ysa Saulus mbewok mno bo ro raa mbis k'ana mam Yerusalem mkak. Tna fo, ana mbewok mhah mamot Antiokhia tna mmen Yohanes ro ja raa mtu yasom Markus tait ysa ana mama ye.

13

¹⁻² Ati sau fo *jemaat* ro Antiokhia siret su. Ana skabuk k'*Tuhan* tna mhau bo ro mait afo re skabuk kaket. Ana fo *nabi* ro ja Allah ybis mamom kyas bo wAit to baro msya *guru* baro ye. Ana weto to, sait yasom Barnabas tna sait yasom Simeon-Niger. Tna sait yasom Lukius ro ybam *kota* ro Kirene, tna sait yasom Menahem. (Menahem tait, Saulus ysa Herodes bo to ana tiwya raa mtos su.) Ana hre skabuk su to, Har ro *Tuhan* mawe k'ana mawe, "Jō ksoh Barnabas ysa Saulus mamom mno bo woJō."

³ Raa weto mhau bo ro mait tna moo matem mtor abyō k'ana mbewok refo skabuk mayoh Allah yatam ana. Tna fo ana mmah meen akus tna bitsre ana mbewok mamom.

Saulus ysa Barnabas mamot sato ro Siprus

⁴ Har ro *Tuhan* mbis, tibyo Barnabas ysa Saulus mbewok mamot joh ro Seleukia. Tna ana mbewok mbam Seleukia maut *kapal* mamom snok sato ro Siprus.

⁵ Ana mhau mam remo ro Salamis to, ana mkyas Watum ro Allah. Mamom kyas mam samu skabuk raa ro Yahudi sor. Tna mere sait yasom Yohanes-Markus kro ana mbewok ye mkah yno bo wana.

⁶ Ana mamō mur mtan mam sato reto, tibyo snok mam remo ro Pafos. Mam beto to, ana mkai raa ro Yahudi sait yasom Baryesus-Elimas. Ait tait raa ro ja yari botkif mafot kakat tna sioh yawe ait tait *nabi* ro Allah ybis yama ykyas bo wAit.

⁷ Ait ja yiranya ysyā *Gubernur* ro sato reto. *Gubernur* retait yasom Sergius-Paulus. Ait raa ro yhar bo toni. *Gubernur* retait ja ksoh yari Watum ro Allah. Tibyo ait ytu Barnabas ysyā Saulus mama.

⁸ Menohe Baryesus-Elimas yno wa afo re *Gubernur* retait smot Yesus ma.

⁹ Menohe Har ro *Tuhan* mbo Saulus matak. (Ja raa mtu ait yasom Paulus ye.) Mbo matak tna yasu sayō Baryesus-Elimas tna yawe,

¹⁰ “Kabes yabi (Iblis) ybo nyō matak to! Ja nyō hawe bo ro moof tna nno bo kbik-kbak sai! Nyō sioh raa yoyo tna iso moof ro Allah yerif k’raa to, nyō nno mkair sai.

¹¹ Nyō nno fetō tibyo *Tuhan* kbe yno bo ro samyoh btek mai k’nyō ye. Mfo refo nasu mrok mboh! Ti baro firwas nyō nmat bo fee ye.” Paulus yawe si fetō fo, Elimas ait yrok yasu mti. Tna ait saso ninya wore yamo tna saso raa yawe ro mbo yatem re befatu mamō.

¹² *Gubernur* retait ait ymat he Elimas yrok yasu mti tna ait yari bokyas ro *Tuhan* ana mbewok mkyas to yrok ktak. Tibyo ait yrok smot Yesus.

Paulus yamo’t kota ro Antiokhia ro mhau mam rabin ro Pisidia

¹³ Paulus ysyā yafoh na sikba Pafos tna maut kapal tna mhoh mamō’t remo ro Perga. Perga

mhau mam *provinsi* ro Pamfilia. Mam Perga Yohanes-Markus sikba ana tna hah ye yamo't Yerusalem.

¹⁴ Tna mbam Perga ana mam renti mam iso mne. Mam tna snok mam *kota* Antiokhia ro mhau mam rabin ro Pisidia. Tna mam ayõ ro raa ntmoh (*hari Sabat*) to, ana mam skabuk mam samu skabuk raa ro Yahudi.

¹⁵ Ana hre tna mari raa *mbaca* bokom ro Musa ykom baro msya bokom ro *nabi* na mkom baro ye. *Mbaca* mkak, tna raa mabi ro mbo samu skabuk reto to, mbis raa mam mtu bo k'Paulus ysya Barnabas. Mtu bo k'ana mbewok mawe, "Raa wamu: Anu ksoh nma nkyas bokyas baro k'amu ye, fe mfe a? Soh nwe nkyas meto mi nkyas oh."

Paulus ykyas masmair raa ro Yahudi

¹⁶ Paulus yasen yros. Tna yawe, "Anu raa ro Israel* nsya anu raa mbam rabin roto ro wa Allah bo nri ee:

¹⁷ Allah ro anu raa ro Israel ja smot tait, tiwya tinyi ait ysok hohos wanu. Ana mam raa srim mam Mesir. Mhau mam Mesir to, Ait yno ana mrok mriembes mase. Tna mkah Ait yatak rAit ro mase to, Ait ybo ana frok mbam Mesir mam.

¹⁸ Tna *tahun* trion 40 firwas bo fetu to, Ait yhau ymat tan bo ro ana mno mkair mam tabam ro riamo to.

¹⁹ Anu hohos na mam snok mam oo ro Kanaan tna mame anya msya raa ro mhau mam oo reto. Mame anya msya raa mana krema. Tna

* **13:16** Raa ro Israel msya raa ro Yahudi to raa mana sau, mnan anya sai.

Allah yoo yatak yee k'ana re safto tabam wana shauk riryõn k'raa wAit ro Israel.

²⁰ Allah yno bo weto beta to *tahun* trion 450 bo feto firwas wa. Mam wore wo ana mhau mam Kanaan Allah ysok raa ro ja yamo aban mana ybo ana. Aban mana weto to, aro sor mbo ana mamno snok mam wore wo *nabi* sait ro yasom Samuel yama ybo ana mtis naut u.

²¹ Tna anu hohos na mayoh k'Allah mawe, 'Noo *raja* sait nse ybo amu.' Tibyo Allah yoo Saul yse yamo *raja* ro ybo ana. Saul tait ku bi Kisy yare. Raa wait beta to ku renti-renta bi Benjamin ro tiwya tinyi bi Yakub yare. Saul yamo *raja* tna ybo ana 40 *tahun*.

²² Tna Allah beak ait yakus. Allah yawe:

'Jõ tmat sas Daud ku ro bi Isai yare tna ait yno
Jõ thaf mnan. Ait raa ro kbe yno bo ro Jõ
ksok beta.'

1 Samuel 13:14; Mazmur 89:21
Feto to Ait ysok Daud yse yamo *raja* riryõn shauk hroh ro Saul reto.

²³ Mbam ku renti ro Daud yabe oh mi, Allah siwyan Raa sait mkah bo yoo riof ro mase yee k'raa ro Israel. Ait retait yama oh. Yasom rAit Yesus.

²⁴ Yesus yasom frok fefares to, raa sait ro yasom Yohanes yama. Yohanes ykyas k'raa ro Israel makin yawe, 'Nashana oh! Tna nma re kbe jõ *baptis* anu.'

²⁵ Yohanes yno bo ro Allah ybis k'ait tna yawe, 'Anu nnaut nwe jõ fi awya? Jõ fi *Mesias* fee. Ait retait kbe yama yrof jõ. Ait yase toni syok. Menohe jõ fi raa kair sai. Tibyo jõ trus *sandal*

rAit fee.' "

²⁶ Tna Paulus ykyas bo renti naut yawe, "Raa wojō; anu taro to ku renti ro bi Abraham yabe. Tna anu taro to raa rabin roto menohē anu waa Allah bo ye. Allah tiwya ykyas yawe Raa sait meen yoo riof ro mase yee k'anu. Tiwya Allah ykyas Raa retait re kbe anu ro mfo refo bhau to bri tna kbe bkai riof.

²⁷ Tiwya raa wase mawe Yesus tait *Mesias*. Raa ro mhau mam Yerusalem msya raa mabi wana mhar bo reto fefares. Bokom ro tiwya Allah ybis *nabi* na mkom mawe, 'Meen raa mikyak Ait tna mame Ait yajat.'[†] Tna ana ro mhau mam Yerusalem to, ja *mbaca* bokom reto mam ayō ro ana ntmo (hari Sabat) soo oh. Tna ana mesait mikyak Yesus mnān si bo ro *nabi* na tii mkyas weto to, mhau rau oh. Menohē ana srau mnaut bo weto fee ye.

²⁸ Yesus yno bo ro mkair aro fee. Menohē raa sioh mawe yno bo mkair. Mawe yno safo tibyo mamō mo k'Pilatus mawe, 'Noo safo mana nmit k'Ait oh! Nbis raa wonyō nawe mame Ait yajat!'

²⁹ Ana mno bo weto beta mamyot bo ro tiwya *nabi* na mkom wia matim oh. Ana mno bo weto mkak. Tna fo, ana skur ajat rAit mbam ara warok reto mamō sama Ait mam isra mato.

³⁰ Menohē Allah yno Ait yrok yasen.

[†] **13:27** Mamō snok mam mfo refo raa ro Yahudi ja mmat Bosi ro Wia (*Perjanjian Lama*) fares ye. Feto to ana mhar bokom ro mkyas *Mesias*. Yesaya 53, Mazmur 22, Mazmur 69 msya far-far roto naut ye betoo bo ro tiwya mai k'Yesus. Wore ro raa mkom far-far weto mam aam rana reto to, bo weto mabo fefares. Raa ro Yahudi ja mmat far-far weto, menohē ana srau fefares. Masu mti fares.

³¹ Tna raa mmat Ait u ye. Raa ro tiwya kro Ait mamō mbam Galilea mamō snok mam Yerusalem to, ana wetō mmat Ait ti aro ye. Tna mfo refo ana wetō ja mkyas bo ro ana mmat Ait yno to. Ana mkyas Yesus yasom k'raa wamu ro Yahudi ye.

³² Mfo refo jō tsya Barnabas nma nkyas bokyas refo k'anū. Bokyas reto misti simaut k'raa: Au oh mi bosī ro tiwya Allah ykyas ysi k'hohos wanu.

³³ Bo ro tiwya ysi reto to, mfo refo mabo oh. Anu fo ku renti wana. Tna anu fo bmat: Allah yno Yesus yrok yasen. Yno mamyot mfi bokyas ro tiwya tinyi *Raja* Daud ykom mam *Mazmur* ro ewok to, yawe,

'Nyō tait Ku ajō tna riwai Jō tabe Nyō oh.'

Mazmur 2:7

³⁴ Tna Allah ykyas Ku rAit Yesus yawe Ait kbe yno Yesus yrok yasen tna kbe ye yhai u fee. Allah yawe,

'Tiwya tsi bo tawe tno bo moof ku renti ro Daud yabe sait to. Tna bo ro Jō tesait tsi meto kbe mabo! Au oh mi; "Meen Ku renti rait sait yasen yamo *Raja*."' "

Yesaya 55:3

³⁵ Tna tiwya Daud yawe k'Allah mam *Mazmur* far-far roto yawe,

'Ait ro Nyō Nbis Yama tait, meen Nyō sayō ajat rAit makus mnis fee.' "

Mazmur 16:10

³⁶ Tna Paulus ykyas renti yawe, "Bokyas reto to, Daud ykyas ait yesait fee. Daud yno bo ro Allah ybis k'ait yno mam wore wo tiwya ait yhau fares to. Ait yno bo wetō mkak tna ait yhai. Tna raa

makah hai rait mamō sama mam yuk ro tiwya raa sama hohos na wait ye. Tna hai rait mrok mnis.

³⁷ Menohe hai ro Yesus mnis makus mfi Daud fee: Allah yno Yesus yrok yasen.

³⁸ Taja, tano na; nri oh. Nhar oh. Bo ro Yesus yno oh mi mno re Allah yyon iro raa to.

³⁹ Tna awya ro smot Ait to, kbe Allah yyon iro wait beta. Tibyo Allah yawe ait retait raa ro yhaf moof ati. Menohe Watum ro Musa mno raa mhaf wana moof ati fetō fee.

⁴⁰⁻⁴¹ Tiwya Allah ybis *nabi* wAit mama mkom mawe,

‘Meen, mam wore wo anu nhau to, kbe Jō tno bo ro msai sau. Kbe raa betoo bo reto k’anu. Menohe kbe anu nri tna nfot fee. Kbe anu nmus-amas Ait. Kbe anu nrok ntak ye. Tna kbe anu nhai beta.’ ”

Habakuk 1:5

Nri smot Yesus be kbe bokyas reto mai k’anu ye.

⁴² Paulus ysya Barnabas mkyas bo mkak. Tna raa frok samu skabuk reto mamō. Mamō tna raa wetō soh-soh ana mbewok mawe, “Amu ksoh anu mbewok ne nma nkyas bo reto u k’amu. Nma nkyas mam ayō ro raa ntmoh (*hari Sabat*) ro rouu ro mama naut.”

⁴³ Raa skabuk mkak. Tna raa mawat kro Paulus ysya Barnabas mamō. Ana wetō to, raa ro Yahudi ye tna msya raa ro mbam rabin roto menohe ro kro *agama* ro Yahudi ye. Tna ana mbewok reto mkyas k’ana mawe, “Mkah tak ro Allah rAit to, nhau smot Ait yoyo.”

⁴⁴ Ayō ro raa ntmoh rouu to, raa ro *kota* reto beta mama siret mari bokyas ro Allah.

⁴⁵ Menohe raa ro Yahudi mmat raa msis weto mari bo ro Paulus ykyas to, ana hawe. Tna mrok mhaf mkair. Tibyo ana mamus ana mbewok. Tna besboh bo ro ana mawe.

⁴⁶ Menohe Paulus ysya Barnabas waa fee. Ana me mawe k'ana ro Yahudi weto mawe, "Allah ybis amu nkyas watum rAit k'anu wia matim. Menohe anu hawe bo nri. Anu nnaut nwe anu noof nnan si, tibyo meen nkai nmos mae fe mfe a? Anu hawe bo nri Watum ro Allah feto to, kbe amu haberek kbor wamu tna nmo nkyas k'raa mana roto.

⁴⁷ Feto ye *Tuhan* ybis amu yawe,
'Jō tsok nyō mkah namo nnan nfi kek. Kbe nyō nram iso k'raa rabin roto makin. Re kbe nyō nakah riof ro mase namo nee k'raa ro mhau mam arin aso beta.' "

Yesaya 49:6

⁴⁸ Raa mbam raa mana roto mari feto, tibyo mrok simaut mase. Ana mawe bokyas ro *Tuhan* reto moof syok. Tna raa ro tiwya Allah ysok yawe meen mkai mamos mae to, ana mama smot Yesus beta.

⁴⁹ Tna bokyas ro *Tuhan*, raa makah mamom kyas mam rabin reto beta.

Paulus ysya Barnabas mamom't remo roto

⁵⁰ Menohe raa ro Yahudi mkyas-kas Paulus ysya Barnabas. Ana mkyas k'fnya manes ro mhau mam kota reto tna ro ja waa Allah ye. Tna mamus ana mbewok k'raa ro mase ye. Tibyo fnya msya raa wefo sikowah Paulus ysya Barnabas tna mikyak ana mbewok frok mamom mbam oo rana ye.

⁵¹ Paulus ysa Barnabas ngkaru bohasyaf ro mhau k'ana mbewok maa to war feto.‡ Tna mbewok masen mamó't remo ro Ikonium.

⁵² Raa ro smot Yesus mam Antiokhia simaut mase tna Har ro Allah mbo ana matak ye.

14

¹ Mam remo ro Ikonium Paulus ysa Barnabas mno bo ro ja ana mno soo oh: Ana mbewok twok mam samu skabuk ro raa Yahudi tna mkyas Yesus yasom. Mkyas bo kakat, tibyo raa ro Yahudi msya raa ro Yunani ye msis-sas mama smot Yesus.

² Menohe raa ro Yahudi taro hawe smot Yesus. Ana weto mkyas-kas ana mbewok k'raa ro wase Allah. Mno raa mrok kmo ana ro smot Yesus.

³ Paulus ysa Barnabas mbewok mhau ti mawat baro kait ye mam beto. Ana mbewok mkyas *Tuhan* yasom k'raa. Ana waa fee. Ana mkyas boatmof ro *Tuhan*. Tna Ait yoo yatak rAit yee k'ana re mbewok mno bo ro msai. Ana sair bo ro hnah re kbe raa mmat tibyo mhar mawe ana mkyas bo ati, ana sioh fee.

⁴ Raa ro mhau mam remo reto to, mhaf sau fee: Taro ksoh Paulus ysa Barnabas. Tna taro ksoh raa Yahudi ro hawe smot Yesus.

⁵ Ana ro hawe smot Yesus weto to taro raa ro Yahudi msya raa manes wana. Tna taro to, raa mana roto tna msya raa manes wana. Ana weto beta saim bo su mawe mfot ana mbewok afo re

‡ **13:51** Raa ro Yahudi ja mnaut mawe ana raa ro moof. Tna mawe raa roto taro to, raa ro mkair. Feto to soh ana mamó mam wore wo raa ro wase Allah mhau to, ati ro ana frok mbam amah reto soh mfe remo reto to, ja ana ngkaru bohasyaf ro mhau k'ana maa to war feto.

ana mno bo ro mkair mai k'ana. Mawe mawah fraa mai ana majat bo ye.

⁶⁻⁷ Ana mbewok mari feto, tibyo ana msam mamot rabin ro Likaonia. Ana mamot remo ro Listra, remo ro Derbe msya tabam ro kene mam remo weto. Mamot rabin ro Likaonia reto tna mkyas Bokyas Moof ro Yesus (*Injil*) renti.

⁸ Ana mamot snok mam remo ro Listra to, ait ro yaa mhai sait hre. Ait tait, tii tinyi fnya mabe to, yaa mhai oh. Tna ja yamo fefares.

⁹ Ait hre yari bo ro Paulus ykyas. Paulus yasu sayō ait tna ynaut yawe bosmot rait matak. Bosmot rait matak re kbe Allah yisoh yaa rait moof matak.

¹⁰ Paulus ymat feto, tibyo yawe mkah ymai ro mase yawe, "Nasen nros ntrot." Tibyo ait retait yrok sontor yasen yros tna yamo ye.

¹¹ Raa msis-sas mmat bo ro Paulus yno feto. Tibyo masen mmai mnin. Ana mkyas mkah mmai rana ro Likaonia mawe, "Ana mbewok refo raa sai fee. Ana mbewok refo allah mefo. Ana haberek mamot mfi raa sai tna mbam sawro wana mama mo k'anu oh mefo!"

¹² Ja Barnabas ykyas bo kebet sai, tibyo ana mtu yasom Zeus mfi allah rana sait. Tna Paulus ja ykyas bo mawat tibyo ana mtu yasom allah Hermes.

¹³ Tna *imam* yanes sait yama ye. *Imam* retait tait, yoo tafuf fayir *sapi* ro sme baro. Fayir tna yakah *sapi* weto yamo frok remo kitana wore samu sahfra ro Zeus rait mhau. Ait ysya raa msis-sas mawe ktan *sapi* weto mee k'Paulus ysya Barnabas. Mawe mee mkah bo mbaut ana mbewok.

14 Ana mbewok mari fetu tna hawe. Hawe tibyo ana mbewok mhah ratan wana ro mesait myum mawe, “Raa wefo mnaut mawe amu fo mfi allah sor ro ja ana smot!” Tna ana mbewok mhoh mamō mbukak iti mam raa msis-sas wefo masuf susai tna mtu mawe,

15 “Anu nkin; nri oh! Nno bo refo nno fyi? Nhar nwe amu fo Allah fee. Amu fo raa sai, nnan anu ye. Bokyas Moof ro mkyas Yesus (*Injil*) to, amu nkyas k’anu afo re anu sikba bosmot wanu ro mkair weto tna nma smot Allah ro yaam. Ait oh mi yfen ayoh msya tabam refo tna yfen aya sawan msya bombra ro mhau mam wore weto beta to.

16 Ti bese oh to, Ait yhau sayō raa mana sau-sau beta mamō iso wana mamytō bo ro ana mhaf wana ksoh sai.

17 Ait sayō raa mno fetu to, menohe Ait sikba ana makus fee. Ait yerif Ait k’raa mam bo moof msis-sas ro Ait yno k’anu. Bo moof ro Ait yno k’anu oh mefo: Ait yno oom mais mbam ayoh tna yno boit msya bobat moo moof mam armato wanu ye. Tna yoo boit yee k’anu niit re nhaf mnan tna yno anu simaut mase ye.”

18 Ana mbewok mkyas fetu re mno wa raa makin weto kbe mno bo reto ma tna mbaut ana fetu ma. Raa weto mawe beroh msan bo k’ana mbewok menohe mfe.

19 Ti baro firwas, tna raa ro Yahudi baro mbam kota ro Antiokhia msya remo ro Ikonium mama. Mama, tna mkyas bo haberek hren msya myoh moo raa makin refo afo re ana haberek knait Paulus. Tibyo ana mai ait mkah fraa. Mai mkak oh tna ana mrok mawe ait yajat oh. Tibyo mkuk

ajat rait frok mamu beak mam remu mne.

²⁰ Menohe raa ro smot Yesus mama mros murmtan k'ait, tna ait yrok yasen tna twok mam remu reto u. Tna rabu ti fo ait ysya Barnabas mbewok masen frok remu reto mamu renti remu ro Derbe.

Paulus ysya Barnabas mamu't kota ro Antiokhia

²¹ Paulus ysya Barnabas ana mamu't remu ro Derbe, tna mkyas Bokyas Moof ro Yesus (*Injil*) mam beto. Tna raa msis mama smot Yesus. Tna ana mbewok mhah mamu't Listra, Ikonium msya Antiokhia mam rabin ro Pisidia ye.

²² Tna mam *kota* wetu to, ana mkyas bo k'raa ro smot Yesus mawe, "Nros natak nbo bosmot wanu matak. Soh anu ksoh bmo raa mana ro Allah yamo *Raja* ybo to, kbe anu bkai bo ro samyoh mawat."

²³ Tna mam *jemaat* sau-sau Paulus ysya Barnabas msok *majelis* taro mkah bo kmot raa ro smot Yesus mam *kota* wana. Ana mbewok mhau bo ro mait tna skabuk msan *majelis* wetu *k'Tuhan* ro ana smot. Tna ait yayoh yawe *Tuhan* yatam *majelis* wetu.

²⁴ Ana mbewok mamu mur mam rabin ro Pisidia mkak, tna twok mam rabin ro Pamfilia.

²⁵ Tna ana mkyas watum ro *Tuhan* mam remu ro Perga. Mkyas mkak, tna mamu siya snork mam remu ro Atalia.

²⁶ Tna ana mbam beto maut *kapal* hah me mamu't *kota* ro Antiokhia mam *provinsi* ro Siria. (Tiwy *jemaat* ro mhau mam Antiokhia oh mi ro mbis Paulus ysya Barnabas mamu mkyas Yesus yasom mam rabin roto taro to. Tiwy

ana skabuk mayoh Allah mawe Ait yatam ana mbewok wore woyõ-woya sai mamõ. Tna mayoh mawe Allah yoo bouum ye k'ana mbewok, yno re raa mari bokyas ro ana mkyas, tibyo mama smot Yesus. Paulus ysy Barnabas mkyas Yesus yasom mam rabin roto mkak.)

²⁷ Tna ana snok si mam *kota* ro Antiokhia. Ana mbewok mtu raa *jemaat* reto beta mama sired su. Tna fo ana mbewok mkyas bombra beta ro ana mno mkah tak ro Allah rAit. Tna mawe Allah yitrah amah rait tna yawe raa mbam raa mana roto ye mama smot *Tuhan* ye.

²⁸ Tna fo ana mbewok mhau baro kait msya raa ro smot Yesus mam beto ye.

15

Raabis sired su mam Yerusalem

¹ Raa baro mbam Yudea mama't Antiokhia tna mkyas k'raa Kristen ro mhau mam beto mawe, "Soh anu *sunat* fee mamyt watum ro Musa kyas fetõ, kbe anu nkai riof fee ye."

² Menohe Paulus ysy Barnabas ana mbewok hafrah bo ro ana mkyas reto. Ana masen santri bo msya raa wetõ. □Tna *jemaat* ro Antiokhia wase kbe Allah yawe ana *sunat* ku sme wana fe mfe a?□ Wase, fetõ mnaut mawe ana mtu k'raa ro mhar bo reto. Tna ana msok raa baro mbis ana mamõ't Yerusalem. Mbis ana mamõ mkyas bo reto su msya raabis (*rasul*) ro Yesus wAit msya raa manes roto. Tna ana msok Paulus ysy Barnabas msya raa baro mbam Antiokhia ye. Msok ana wetõ to, mbis mamõ't Yerusalem

tna mtu mawe, “Kbe anu, raa Kristen *sunat* ku sme wanu fe mfe a?”

³ Raa Kristen ro Antiokhia to, ana mkyas bo reto mkak tna masen mammo betne Paulus ysyaa raa weto sor mammo snok *kota* rana reto makit.

Paulus, Barnabas msya raa *jemaat* ro kro ana mammo iso rabin ro Fenisia msya *provinsi* ro Samaria. Mam iso maka iti to, ana fri raa Kristen ro mbam raa mana ro Yahudi baro. Paulus ysyaa raa ro kro ait mkyas bo k’ana mawe, “Raa ro mbam raa mana roto to, ana taro mashana tna smot *Tuhan* Yesus oh!” Raa Kristen mari feto tibyo simaut mase toni ye.

⁴ Paulus ysyaa Barnabas msya raa Kristen ro mbam Antiokhia weto mammo snok mam Yerusalem. Tna raa Kristen ro mhau mam Yerusalem mmah meen k’ana. (Raa weto oh mi raabis ro Yesus wAit, raa ro *majelis*, msya raa Kristen taro ye.) Paulus ysyaa Barnabas mkyas bo ro Allah yno to. Mawe ja ana mammo mkyas Yesus yasom, tna raa rabin roto, ro Yahudi fee, ana to mawat mama smot Yesus ye.

⁵ Menohe raa ro *Farisi* baro ro smot Yesus mari bo reto ye. Ana mari feto tna masen mros mawe, “Raa ro Yahudi fee, ro mama smot Yesus ye oh to, *sunat* ana ye! Tna nbis ana kro Watum ro Musa ye!”

⁶ Raabis weto msya raa *majelis* taro hre su mkyas bo reto mawe, “Allah yawe kbe raa beta *sunat* ku sme wana fe mfe a?”

⁷ Ana hre mkyas bo reto baro kait ye oh. Tna Petrus yasen yros yawe, “Taja nsya tao na; anu nhar nwe tiwya Allah ysok jō tbam k’anu mkah bo jō tamo tkyas Bokyas ro Moof (*Injil*) k’raa

mana roto makin. Yno afo re ana mama smot Yesus ye.

⁸ Allah yhar raa mhaf mato beta. Tna Ait yawe Ait ksoh ana ye. Tna yoo Har rAit yse k'ana ye mnan fi Ait yse Har rAit yse k'anu raa ro Yahudi to. Yno re kbe anu bhar bwe Ait ksoh ana weto ye.

⁹ Allah ysok anu hayah tna ana hayah fee. Ana smot Yesus tibyo Ait yisoh ana mhaf mato wana moof ye.

¹⁰ Kaket anu! Sanet Allah ma! Anu besait bsya hohos wanu hrowyõ bhai kro bo mafa ranu kaket to. Fyi re anu nnaut nwe Ait ksoh raa rabin roto masom bo fanes reto ye?

¹¹ Riof ro anu bkai to mbam boatmof ro *Tuhan Yesus Kristus* rAit sai. Mbam bo mafa ramu to fee! Tna ana weto mkai riof mam iso ro bosmot ye mnan anya!"

¹² Tna Paulus ysya Barnabas masen mkyas bo. Ana mkyas mawe "Allah yoo yatak rAit yee k'amu mbewok re nno bo ro msai. Amu sair bo ro hnah re kbe raa mana roto mmat tna mhar Ait yase rait." Raa ro siret weto hre shait sai mari.

¹³ Paulus ysya Barnabas mkyas bo wana mkak. Tna fo Yakobus yasen yawe, "Taja nsya tao na; nri oh!

¹⁴ Simon-Petrus riwai ykyas bo ro tna sai tinyi rau! Ait betoo yawe Allah yatmof tna ysok raa taro mbam raa mana roto mamoo raa wAit ye.

¹⁵ Bo reto mamoo mamyo to bo ro tiwya Allah ybis *nabi* na mama mkom mawe,

¹⁶ 'Meen Jõ thah te tama tiso samu* ro Daud

* **15:16** Mam bokom refo 'samu' reto to bofret. *Nabi* Amos fret bo ykyas 'raa ro Daud'. Au oh mi raa ro Yahudi.

rait. Samu rait reto tiwya matu tna kbe te
sgi u. Bombra ro tiwya nsasi beta meen
me mros matak.

¹⁷ Jō tno fetō afo re raa ro Yahudi, tna msya raa ro
rabin roto beta kbe saso Jō. Ana wetō tiwya wase
Jō. Menohe jō ttu ana wetō ye, tawe ana mamō
ku woJō to. Kbe meen ana saso Jō ye. *Tuhan*
Allah yesait ykyas bo reto.

¹⁸ Tiwya tinyi ykyas bo reto beta re kbe raa
mhar.’ ”

Amos 9:11-12

¹⁹ Tna Yakobus yawe, “Feto to jō tnaut tawe,
raa ro rabin roto wetō, anu bbis bwe ana kro bo
mafa wanu beta ma, ana ksoh rana sai. Kbe anu
bno bo ro nririt wa iso k’ana mama mo k’Allah
to ma.

²⁰ Jō tnaut tawe anu bkom aam sau tee k’ana.
Bkom aam bwe:

1. Sohmaam bo ro raa moo msan *k’berhala*
oh to ma.
2. Tna nwyah bo to ma ye.
3. Nbo kak kwiyan ro mees mhau fares to
ma.
4. Nta mees ro kak raa ktan to ma.

□Soh ana kro bo mafa wanu wetō sai to, kbe
moof. Kbe anu ro Yahudi hrenaut fee. Tna kbe
anu biranya moof sai.□

²¹ Watum ro Musa mkyas mawe bo wetō beta raa
ro Yahudi mbau. Mam woyō-woya sai tiwya bose
oh, ja raa wanu bkyas bo reto. Feto to raa mhar
oh. Tna anu raa ro Yahudi bmat bokyas reto
mam samu skabuk wanu ye. Anu bmat bokom
reto mam ayō ro raa ntmoh (*hari Sabat*) yoyo.”

²² Tna fo raabis ro *Tuhan* wAit, raa *majelis*
msya raa ro ja smot *Tuhan* taro ye, ana beta

hre mkyas bo su. Tna ana mawe msok raa mabo baro mbam ana makin weto tna mbis ana mamot *kota* ro Antiokhia. Ana msok raa manes mabo ewok: Yudas-Barsabas ysy Silas. Tna mbis ana mbewok kro Paulus ysy Barnabas mhah me mamot Antiokhia.

²³ Tna ana weto sor mkom aam sau mee k'Yudas ysy Silas mbewok mbo makah mamot. Aam reto mkyas mawe,

“Taja, tme, tao, tano na ro nbam raa mana roto; amu nkom aam refo nee k'anuro nhau mam Antiokhia, tna ro nhau mam remo taro mam *provinsi* ro Siria, msya *provinsi* ro Kilikia ye. Meen oh k'anuro beta.

²⁴ Amu nri raa mabo baro mama mo k'anuro, tna ana mkyas bo ro mno anuro nrok susit ye. Amu aro nbis ana nwe ana mama mkyas bokyas fetofee.

²⁵ Riwai amu nhau mam Yerusalem to, sired su tna nkyas bo reto. Tna amu nsok Yudas-Barsabas ysy Silas tna nbis ana mbewok refo mama mo k'anuro. Ana kro Paulus ysy Barnabas, ro ja amu ksoh to, mama.

²⁶ Yudas ysy Silas ja mros mana matim mno bo ro *Tuhan* ybis k'ana sai.

²⁷ Feto oh mi amu nbis ana mbewok mamot mo k'anuro to. Ana oh mi kbe mama mkyas watum ramu reto k'anuro kait mamyot si aam ro amu nkom refo fo.

²⁸⁻²⁹ Amu hawe bo nbis anuro nno bo ro samyoh. Tna Har ro *Tuhan* mkyas bo reto k'anuro ye mnananya. Feto to amu nsi bo wefo k'anuro sai:

1. Sohmaam boit ro raa moo msan *k'berhala* oh to ma.
2. Nta mees ro kak raa ktan to ma.

3. Nbo kak kwiyan ro mees mhau fares to ma.
4. Tna nwyah bo to ma ye.

Bokom wamu kebet sai oh mefo, mkah bo watum anu afo re anu nberhasyoh raa ro Yahudi to ma. Meen oh k'anu beta."

³⁰ Raa Kristen ro mhau mam Yerusalem weto ana mmah meen k'ana mabo jiiit reto. Tna fo ana masen mamot Antiokhia.

Raa mabo jiiit reto snok mam Antiokhia. Tna ana mtu raa Kristen beta ro mhau mam beto sor mawe mama sired beta. Tna ana *mbaca* aam reto k'ana beta.

³¹ Raa mari bokyas ro aam reto to, ana simaut mase.

³² Yudas ysya Silas to, mbewok *nabi* ro ja Allah ybis mkyas bo wAit to ye. Tna wore wo ana mhau mam beto to, ana mkyas bo k'raa ro smot Yesus. Bo ro mbewok mkyas reto to, mno bosmot wana matak.

³³ Ana mbewok mhau mam Antiokhia ti baro firwas. Tna ana masen mawe hah me mamot Yerusalem. Tna raa Kristen mmah meen k'ana mbewok tna mawe kbe ana mbewok mmah meen k'raa Kristen ro mhau mam Yerusalem ye. Tna mawe mayoh asik mase k'raa ro mbis ana mbewok mama to ye. [

³⁴ Menohe Silas yawe ait yhau wia fares mam Antiokhia.]

³⁵ Paulus ysya Barnabas mhau mam Antiokhia ti baro naut mkah bo mkyas watum ro *Tuhan* k'raa ro mhau mam beto ye. Tna raa Kristen mawat taro ye mkyas watum ro *Tuhan* mam beto ye.

Paulus ysa Barnabas mbewok betne-tna anya mam

³⁶ Mhau ti baro naut tna Paulus yawe k'Barnabas yawe, "Anu mbewok hah be bmo't kota ro tiwya bkyas *Tuhan* yasom sor to no. Tawe anu be bmo bmat raa ro mama smot Yesus tna sor to. Feto kbe anu bhar soh ana mhau smot Yesus matak fe mfe a?"

³⁷ Barnabas ait ksoh ymen Yohanes ro ja raa mtu yasom Markus tait, kro ana mam

³⁸ Tiwya Markus yasen sikba ana mam Pamfilia. Feto oh mi Paulus ait hawe bo ymen Markus kro ana mam u fee.

³⁹ Feto tibyo Paulus ysa Barnabas kmo anya toni tibyo ana mbetne-tna anya: Sait yasen yamo hayah-hayah. Barnabas ait ymen Markus kro ait maut wiak (*kapal*) mamot sato ro Siprus.

⁴⁰ Tna Paulus ymen Silas kro ait mam

⁴¹ Paulus ysa Silas mbewok mam mur mtan mam *provinsi* ro Siria msya *provinsi* ro Kilikia. Ana mkyas watum ro *Tuhan* reto k'raa Kristen ro mhau mam rabin weto sor to, tibyo bosmot wana mrok matak ye.

16

Timotius kro Paulus ysa Silas

¹ Paulus yasen yamo't remo ro Derbe tna fo yamo't remo ro Listra ye. Mam weto ait fri ku ro sme sait yasom Timotius. Timotius ja smot Yesus. Ait yme, fnya mbam fnya mana ro Yahudi. Tna fai au reto smot Yesus ye. Timotius, ait yaja ybam raa mana ro Yunani.

² Raa ro ja smot Yesus ro mhau mam Litra msya Ikonium to, ana ksoh Timotius, mawe ait raa ro ja yno bo moof ye.

³ Paulus ksoh yawe Timotius kro ait mamoyo ye. Menohe raa mbam raa mana ro Yahudi ana mhar mawe Timotius yaja tait, ybam raa mana ro Yunani. Tna ana mhar mawe soh Timotius ynan anya ysya raa ro Yahudi, raa ro Yahudi kbe ksoh mari bo ro ana mkyas. Feto tibyo Paulus *sunat* Timotius wia.

Paulus yamo't provinsi ro Makedonia

⁴ Tna Paulus, Silas, ysya Timotius masen mamoyo't kota makin. Mamoyomat raa ro smot Yesus. Ana mbo aam raabis (*rasul*) ro Yesus msya *majelis* tiwya mkom mam Yerusalem. Tna mkyas aam reto k'raa *jemaat* weto mawe, "Ana mbis mawe anu kro bo mafa raa ro Yahudi ja mno beta ma, kro bo ro raa mkom mam aam refo sai tna nbo nno ye."

⁵ Tibyo raa ro smot Yesus sor fo, bosmot wana mrok matak. Tna rabu ti wawa to raa roto taro mama smot Yesus ye.

⁶ Har ro *Tuhan* mkyas k'Paulus, Silas, ysya Timotius mawe, "Nmo nkyas Watum ro Allah mam rabin ro Asia ma!" Feto tibyo ana mamoyotwatsai mkyas Watum ro Allah mam rabin ro Frigia msya *provinsi* ro Galatia sai.

⁷ Ana mama snok mam kitana *provinsi* ro Misia tna ana sik twok mam *provinsi* ro Bitinia ye menohe Har ro Yesus mno wa mawe, "Ntwok mam *provinsi* reto ma!"

⁸ Feto tibyo ana mamoyomiwrek *provinsi* ro Misia iti tna mamoyo'tremo ro Troas.

⁹ Mti reto Paulus ait yjin smi ymat raa ro Makedonia sait yros tna soh-soh ait yawe, “Paulus: Nasen nama’t *provinsi* ro Makedonia nmat amu ye!”

¹⁰ Paulus ymat bo reto, tna amu* srau nwe Allah ybis amu nsen nmo nkyas watum rAit k’raa ro Makedonia ye. Feto tna amu siwyan bo wamu tna nsen nmo’t Makedonia.

¹¹ Amu sikba remo ro Troas tna nuut *kapal* nhoh nmo’t sato ro Samotrake. Tna rabu ti to amu nmo nuut *kapal* nmo renti nmo’t remo ro Neapolis ye.

¹² Tna nbam Neapolis nsen nmo’t Filipi, *kota* ro mase tinyi mam *provinsi* ro Makedonia reto. (*Kota* ro Filipi to, *pemerintah* Roma mbo.) Amu nhau ti baro mam beto ye.

Paulus mam kota ro Filipi

¹³ Ayō ro raa ntmoh (*hari Sabat*) to, amu nsen nmo’t aya sau ro kene mam *kota* reto makit. Amu nnaut nwe raa ro kro *agama* Yahudi ja mam skabuk su mam yuk reto. Tibyo amu nmo hre su nsya fnya sor ro riwai mam matim tna hre su mam yuk reto wea. Hre tna nkyas bo nsya ana.

¹⁴ Ana weto, sau masom Lidia. Fai au mbam remo ro Tiatira. Au ja mkah bo mtaus hawee ro mkek. Lidia ja smot Allah. Au hre mari Paulus ykyas Yesus yasom. Tna *Tuhan* yno au mrok mhaf smot Yesus ye.

* **16:10** Mam Kisah 16:10-17; 20:5-21; 27:1-28 to, bi Lukas ykom yawe ‘amu.’ Raa mnaut mawe ti aro-aro Lukas kro Paulus ysya yafoh na mam msya ana su.

¹⁵ Lidia msya raa ro amah rau mawe raa *baptis* ana. Tna au mawe k'amu mawe, "Anu nhar nwe jō smot Yesus. Soh fetu to, nma, kbe anu njin mam samu ramu ye, mbau a." Fai au matak sai mawe amu nma. Tibyo amu nmo nhau mam amah rau.

Paulus raa mfot mbu mam bui

¹⁶ Ati sau amu nmo't yuk ro raa skabuk. Tna amu fri ku sau. Ku au reto raa awe. Awe reto ja kabes mbo tna au mkyas bo ro meen btek mai k'raa. Tna ja raa mama mtu tane bo k'au ye. Pitis ro raa moo mee reto, ku au mbo fee, moo mee k'bobot wau. Awe reto ja moo pitis mawat mee k'bobot wau ye.

¹⁷ Ati reto to, awe reto kro Paulus ysya amu mam tis. Tna mmai wer mawe, "Raa wefo fo raabis Allah ro yase wAit! Ana mama merif iso ro kbe raa mamu tna mkai riof ro mase!"

¹⁸ Ti mawat ye oh ku au reto mno fetu yoyo sai. Tna Paulus ynaif fasa yari bo ku au reto mtu fetu. Tna ait haberek yawe kabes ro mbo au reto yawe, "Mkah *Tuhan* Yesus yasom: Jō tikyak nyō tawe nfrok nham ku au reto namo!" Fetu si to kabes reto sikba ku au, frok mamu.

¹⁹ Tna bobot ro ja mtos ku au sor to, kmo mawe, "Nno fyi meto! Wore kbe amu tru pitis aro u fee oh?" Tna ana mfot Paulus ysya Silas mamu't *pasar* msan ana mbewok k'raa ro sbe.

²⁰ Tna ana makah Paulus ysya Silas mamu msan renti k'aban mana ro mbo *kota* reto. Ana sioh maun boun mawe, "Raa ro Yahudi wefo fo mno raa ro befo mrok mnin-nin.

21 Ana sobu mawe anu bno bo mafa wana. Mawe ksoh anu bno bo miwer watum ro Roma, miwer *pemerintah* ja mbis!”

22 Raa ro berur su weto mari fetu tna ana mrok mamus Paulus ysy Silas ye. Tna aban mana ro mbo *kota* reto mbis raa mhah ratan wana mbewok mbam ana metsu tna mbis raa moo too mok-mak ana mbewok ye.

23 Ana mbewok raa mmok-mak mkak. Tna makah mamu mbu mam *bui*. Aban mana ro mbo *kota* mbis raa kmot ana mbewok matak toni.

24 Tibyo raa sbe ro kmot ana ybu ana mbewok mam amah hawar ro mhau masuf susai. Tna make ana mbewok maa ye.

25 Arin masuf to, Paulus ysy Silas mbewok skabuk tna mji howes ye k’Allah. Tna raa taro sor mhau mam *bui* reto ye. Ana weto hre mari bo ana mbewok skabuk tna mji howes fetu si fo

26 iin ro msai frok sin amah reto. Mato beta mrok masoh maa. Tna bo ro raa make to mrok hri-hra beta ye.

27 Raa sbe ro kmot ana yrok yasen. Tna ait ymat he mato ro *bui* reto mrok masoh maa beta. Ait ynaut yawe raa ro ait kmot weto beta frok msam mamu oh. Tibyo yayō tfo rait yawe takoh ait. Ait ynaut yawe yhau ma kbe *raja* Kaisar ybis raa mame ait yajat ye.

28 Menohe Paulus ytu mkah ymai ro mase yawe, “Ntakoh nyō ma! Amu beta nhau fares mefo!”

29 Tna raa sbe retait yayoh tafoh tna ybo yhoh yamo’t *bui* mato. Yamo yo k’Paulus ysy Silas to, ait tetet tna ysit yimna mam tabam.

30 Tna yasen yakah ana mbewok frok mne. Tna

ytu yawe, “Jõ tno bawya re kbe jõ tkai riof ro mase?”

³¹ Paulus ysy Silas mawe, “Smot *Tuhan* Yesus afo re kbe nyõ nkai riof ro mase. Tna raa wonyõ ye: Soh ana smot *Tuhan* to, kbe ana mkai riof ro mase ye.”

³² Tna Paulus ysy Silas betoo Watum ro *Tuhan* k’raa sbe retait ysy ana ro mhau mam amah rait beta.

³³ Mti reto ye ait yyon tna yisoh yaaf wana ye. Tna ait ysy raa wait ro mhau mam amah rait beta mawe ana mbewok *baptis* ana ye.

³⁴ Tna fo bi ait yakah Paulus ysy Silas yamo’t amah rait, tna yasyõ boit yama yee k’ana mbewok mait ye. Ait ysy raa wait smot Yesus tibyo ana simaut mase toni syok.

³⁵ Rabu momo to aban mana *kota* ro Filipi sor mbis raa sbe wana mamot *bui* tna tufrok Paulus ysy Silas re ana mamobana.

³⁶ Tna raa sbe ro kmot ana mbewok retait ykyas bo reto k’Paulus yawe, “Aban mana ro *kota* refo sor riwai mbis mawe raa tufrok anu mbewok nmo. Feto to nmo oh. Tna meen oh k’anu.”

³⁷ Menohe Paulus yawe si k’raa sbe ro riwai mama weto yawe, “Amu mbewok fo raa ro Roma. Nmo nkyas bo reto k’aban mana weto. Nwe ana mesait miwer watum ro *pemerintah* Roma: Taa ana mbis raa mmok-mak amu mam wore raa makin mmat. Tna mbu amu mam *bui* ye. Mno fetomenohe mtu srah ranu mbewok fefares! Bo ro ana mno reto mkair toni! Tna mfo refo ana mawe mbis amu nmo shait sai a? Feto to amu hawe ye. Amu nwe kbe aban mana ro

mbo *kota* refo mesait makah mabo kait mama't befo afo re tufrok amu to saah."

³⁸ Raa sbe weto hah me mammo mkyas bo weto k'aban mana weto. Ana weto mari he Paulus ysa Silas ana *warga negri* Roma, feto tibyo aban mana weto mrok waa.

³⁹ Tna mesait mammo mo k'ana mbewok mam *bui*. Tna makah ana mbewok frok mammo, tna soh-soh ana ye mawe, "Nmo frok nbam *kota* ramu oh!"

⁴⁰ Tna fo Paulus ysa Silas mammo't amah ro fai Lidia rau. Ana fri raa ro smot Yesus taro ye mam beto. Ana mbewok mkyas bo moof k'raa weto. Tna fo mbewok masen mammo renti.

17

Raa ro kota Tesalonika mawat mama smot Yesus

¹ Paulus ysa Silas masen mammo renti naut. Ana mammo iti snok mam remo ro Amfipolis msya remo ro Apolonia. Tna fo ana mbewok snok mam *kota* ro Tesalonika. Samu skabuk raa ro Yahudi sau mhau mam beto ye.

² Mam ayõ ro raa ntmoh (*hari Sabat*) to, Paulus ja yamo't samu skabuk reto, ykyas Bokom ro Allah. Tiwya yno bo reto mfi bo mafa ro ja ait yno sor to, yno muhrin tuuf oh. Tna mam ayõ reto ye Paulus yamo't samu skabuk ye.

³ Ait yasen betoo Watum ro Allah k'raa ro Yahudi weto. Yawe, "Bokom ro Allah mkyas *Mesias*. Mkyas mawe kbe Ait ykai bo ro samyoh: Raa mame Ait yajat. Tna mam ti ro tuuf to, kbe Ait yrok yasen ye." Ykyas Bokom ro Allah ro ana

mhar oh reto. Tna betoo afo re ana srau mawe Yesus tait *Mesias* to.

⁴ Bokyas ro Paulus matak toni. Tibyo raa ro hre mari weto to, taro mama smot Yesus: Raa mbam raa mana ro Yahudi ye, raa ro ja smot Allah mbam raa mana ro Yunani mawat ye, msya fnya manes mawat ye. Ana mama smot Yesus tna kro Paulus ysya Silas ye.

⁵ Menohe raa ro Yahudi ro hawe smot Yesus fee to, ana mmat feto tibyo mrok mhaf mkek. Tna ana mamot *pasar* tna saso raa ro mkair. Saso raa ro ja mira mboh-bah sai. Tna mtu ana ro ja mamot-ama sai mama. Raa ro Yahudi weto mbis ana ro mkair weto mamot mno raa ro *kota* reto beta mrok mnin-nin. Tna fo raa mkbair reto mamot twok mam amah bi sait ro yasom Yason. Ana mawe saso Paulus ysya Silas re mfot tna makah mamot msan k'raa.

⁶ He mfe, ana mbewok marak. Tibyo ana kmo mfot Yason ysya raa ro Kristen mabo baro ye. Mfot tna makah mkuk mamot msan k'aban mana ro ja mbo *kota* ro Tesalonika reto. Raa ro berur su weto maun kair ana. Mkah mai ro mase mawe, "Raa weto ja mno bo ro mkair mam woyōwoya sai! Tna ana mawe mama mno bo ro mkair mam *kota* ranu ye!

⁷ Yason fi ja yiranya ysya ana weto. Tna yoo ana yse mam amah rait ye. Raa ro Kristen ana mno bo ro mkair miwana bo ro *raja* Kaisar yawe. Tna ana mkyas mawe Raa sait ro yasom Yesus yamo *Raja* ro yase."

⁸ Raa ro Yahudi weto mkyas fetot mno raa mrok mnin-nin. Aban mana ro ja mbo *kota* reto kmo ye.

⁹ Tna ana mbis Yason ysy a yafoh wait mabo ewok weto moo pitis aro mam make safo reto. Tna fo raa bitsre ana mam bana.

Paulus ysy Silas mamom't remo ro Berea

¹⁰ Raa ro Kristen waa kbe raa mno bo ro mkair mai k'Paulus ysy Silas. Feto to mti reto ana mberuk ana mbewok, mbis ana masen mamom't remo ro Berea.

Paulus ysy Silas mam snok mam Berea to, mbewok mamom't samu skabuk raa ro Yahudi.

¹¹ Raa ro Berea to ja mno bo ro moof. Ana mfi raa ro Tesalonika to fee. Raa ro Berea ksoh toni mari Paulus ysy Silas mkyas Yesus yasom. Rabu ti wawa to raa weto mmat Bokom ro Allah. Mawe mmat re kbe ana mhar bo ro Paulus ykyas to, mamyt mfi Bokom ro Allah fe mfe a.

¹² Tna raa mbam raa mana ro Yahudi mawat mama smot Yesus. Tna raa manes mbam raa mana ro Yunani msya fnya manes wana taro mawat mama smot Yesus ye.

¹³ Menohe raa Yahudi ro mhau mam Tesalonika mari he Paulus ykyas Watum ro Allah mam remo ro Berea ye. Feto tibyo ana baro masen mamom't remo reto. Snok mam Berea ana mkyas kair Paulus. Ana mno raa kmo Paulus. Tna mawe k'raa makin mawe, "Nri bokyas rait ma!"

¹⁴ Raa mana ro Kristen mari fetu tna sobu Paulus mawe, "Nasen nsam wai namom't Atena wia." (Atena to *kota* sau ro mhau kene mam aya sawan maam.) Silas ysy Timotius mawe ana mbewok mhau akus mam Berea wea.

¹⁵ Tna raa betne Paulus yamo snok *kota* ro Atena tna Paulus yawe k'ana yawe, "Hah ne nmo't Berea nbis Silas ysy Timotius mama srot

mrof jō.” Tna ana ro riwai betne Paulus weto hah me mamō’t Berea.

Paulus ykyas bokyas ro Tuhan mam kota ro Atena

¹⁶ Wore Paulus ste ana wea mam Atena to, ait sraujin toni ymat bo raa ro *kota* reto ja smot *berhala* msis.

¹⁷ Tna re ait yamo’t samu skabuk ykyas bo ysya raa ro Yahudi tna msya raa rabin roto ro ja smot Allah ye to. Tna rabu ti wawa Ait ykyas bo ysya raa ro ait fri mam *pasar* to ye.

¹⁸ Tna ait ykyas bo ysya *guru* ro ja kro bonaut ro bi Epikuros tna ysya *guru* ro ja watum bonaut wana mam samu sau ro masom Stoa ye. Paulus santri bo ysya raa ro kro bonaut weto to tna ana baro mawe kair ait mawe, “Bi ait refi yhar bo bawya ee? Ait yhar bo kebet baro sai menohē ait yasoh mase toni syok!” Ana taro mnaut mawe, “Ait ykyas kabes raa ro rabin roto taro meto.” (Paulus ykyas Yesus k’ana yawe Ait yrok yasen oh mi raa mkyas bo reto.)

¹⁹ Tna raa mfot Paulus makah mamō msan k’raa ro beah srah mam Faut ro Areopagus. Mam weto ana mawe k’ait mawe, “Sik nkyas bokyas ro tna reto k’amu re amu nri ye.

²⁰ Bo ro nyō nkyas reto to, bokyas ro tna fares. Sik betoo maja rau afo re amu nri tna nhar.”

²¹ (Raa ro Atena beta msya raa srim ro mhau mam beto to ana ksoh mari tna mkyas bo ro tna rihō sai.)

²²⁻²³ Paulus yasen yros mam wore raa siret mam Faut ro Areopagus reto yawe, “Anu raa ro Atena; jō tamo te mam *kota* ranu to, tna tmat

berhala msis. Jō trok tawe anu to raa ro murmur smot *dewa* sor. Tna jō tmat wohat mkah bo anu nsan bosan *k'dewa* weto ye. Tna mam wohat sau raa mkom: 'Wohat refo fo mkah raa msan bosan k'allah sau ro ja raa wase.' Allah ro anu smot menohē wase fares retait oh mi mfo refo Jō tkyas k'anū nri mefo.

²⁴ Allah ro yase retait, Ait yase yfen arin aso msya bombra beta, Ait oh mi yase ybo tabam msya ayoh to. Ait yhau mam samu ro raa sgi fee!

²⁵ Bo rAit ro yse to aro mabut fee. Ait yayoh bo k'raa sai fee. Ait oh mi yoo roon yee k'raa. Ait oh mi yoo mafos rana yee k'raa beta. Ait oh mi yoo bombra beta yee to.

²⁶ Tiwya tinyi Allah yfen Adam wia. Tna mbam Adam Ait yfen raa mana beta. Yno ana betru tabam refo beta to. Ait oh mi ybis yawe anu raa sait-sait bhau mam makyon wore wo ait yme mabe ait. Tna yno raa mana mhau mam oo wana hayah-hayah wore ana mhau bo to.

²⁷ Allah yfen raa afo re kbe ana saso Ait. Ait ksoh yawe raa ro saso Ait to. Yawe anu raa bkai Ait saah. Raa tru Ait saah. Ait yros rit fee.

²⁸ Ait oh mi yoo yatak rAit yee tibyo anu baam, anu bnah to. Tna yno re anu bhau bno bo wanu ye bo to. Tiwya raa wanu ro ja sair bomna baro mawe, 'Anu wefo beta ku ro Allah wAit ye.'

²⁹ Anu fo ku ro Allah wAit beta tna anu baam tna bnah-nah ye. Feto to jō tkyas k'anū tawe Allah, ro yare anu to, Ait raa ro yaam ye tu oh. Nnaut nwe Allah tait yfi *berhala* ro raa mfen mbam fraa, *emas*, msya *perak* bo ma.

³⁰ Raa ro tiwya tinyi wase Allah to, ana mno-na bo sai. Tna Allah yros sayõ. Menohe mfo refo Ait ybis raa ro tabam refo beta yawe ana mashana tna smot Ait beta oh.

³¹ Allah ymah oon yawe meen ait yama ytu srah raa ro tabam refo beta. Raa sait ro tiwya Ait ysok to, meen yasen ytu srah yari. Ait retait yhar raa mhaf wana beta tna kbe yno bo rAit moof mnan si. Bi Ait retait tiwya yhau mam tabam refo. Tna raa mame yajat. Menohe Allah yno Ait retait yrok yasen. Yno Ait yrok yasen afo re raa beta kbe mhar mawe Ait retait Raa ro Allah ysok.”

³² Ati ro Paulus yawe raa retait yrok yasen feto, raa taro masah. Menohe ana taro mawe, “Amu ksoh nwe nyõ nama nkyas bo refo k’amu u.”

³³ Tna Paulus sikba ana yamo.

³⁴ Raa ro mari bo ro Paulus ykyas reto, baro kro bonaut rait tna ana mama smot Yesus ye. Ana wefo fo sait yasom Dionisius, (Ait retait raa manes ro ja mtu srah mam Faut ro Areopagus.) ysyfa ai au ro masom Damaris, tna raa baro naut msya ana ye.

18

Paulus yamo't kota ro Korintus

¹ Tna fo Paulus sikba *kota* ro Atena yamo't *kota* ro Korintus.

² Mam weto ait fri raa ro Yahudi sait yasom Akwila. (Ait raa mabe mam *provinsi* ro Pontus.) Akwila ysyfa Priskila raa srim. Ana mama't Korintus mbam *provinsi* ro Italia. (Ati reto to, *raja* yase ro yasom Klaudius ybo Italia. Ait knait

raa ro Yahudi tna ybis ana beta frok mbam *kota* Roma mamō. *Kota* ro Roma mhau mam rabin rait ro Italia ye.) Ti ro Paulus ybam Atena yama to, ait yamo yo k'ana mbewok.

³ Bo ro ja ana mbewok mkah to, ana mfen *kemah* mnan bo ja Paulus ykah ye. Feto to ait yhau ysyā ana mbewok tna ana mkah bo su.

⁴ Tna mam ayō ro raa ntmoh (*hari Sabat*) yoyo to, ja Paulus yamo't samu skabuk ykyas Yesus yasom. Raa ro Yahudi msya raa ro Yunani mama hre mari bo ro ait ykyas. Tna ait tomer yoo ana mhaf afo re ana smot Yesus ye.

⁵ Tna Silas ysyā Timotius mbam Makedonia mama. Tna Paulus yitsre bo ro ja ykah. Yitsre bo yfen *kemah* tna ykyas Yesus yasom rabu ti wawa. Ait ykyas k'raa ro Yahudi yawe, "Yesus tait *Mesias**."

⁶ Menohe ana ro mbam raa mana ro Yahudi hawe mari bokyas ro Yesus. Ana kmo tna mamus Paulus. Feto tibyo ait yasen yamo. Tna ait yitut bohasyaf mbam ratan rait reto. Yno feto re kbe ana mhar mawe ait yitsre yatem k'ana yawe, "Soh bo ro mkair btek mai k'anu to kanyin sai oh! Jō tasom isti reto fee. Mfo refo jō tamo tkyas Yesus yasom k'raa ro mbam raa mana roto makin."

⁷ Tibyo Paulus frok sikba samu skabuk reto tna ykyas bo mam wetō u fee. Tna ait yamo't samu ro Titus-Yustus ro yhau kene mam wetō. Bi Titus-Yustus tait raa ro ja smot Allah. Menohe

* **18:5** Som reto to, "Ait ro Allah ysok tna yawe yamo *Raja*." Mai ro Ibrani mawe *Mesias*, tna mai ro Yunani raa mawe *Kristus*.

ait raa mana ro Yahudi fee. Tna Paulus ykyas Yesus yasom mam samu rait reto.

⁸ Raa ro mhau mam Korintus, taro hawe smot Yesus. Menohe taro mawat ksoh mari bokyas ro Paulus ykyas reto. Ana weto mama smot Yesus tna mawe raa *baptis* ana ye. Ro mrok smot Yesus weto, raa sait yasom Krispus. Ait raa ro Yahudi. Tna ait yamo aban mana ro ja ybo samu skabuk ro *agama* Yahudi mam *kota* ro Korintus reto ye. Ait ysya raa ro mhau mam amah rait to, ana beta mama smot Yesus.

⁹⁻¹⁰ Ti sau fo Paulus yjin smi. Tna ait yari Allah ykyas bo k'ait yawe, "Waa ma. Jō kbe tatam nyō yoyo. Feto to nkyas Yesus yasom renti sai, shait ma. Raa mawat mam *kota* refo fo raa woJō. Feto kbe raa sait bo yno bo ro mkair mai k'nyō fee."

¹¹ Tna re Paulus yhau mam Korintus *tahun* sau hariyah tna ykyas Yesus yasom k'raa.

¹² Tna fo Galio yamo *gubernur* mam *provinsi* ro Akhaya reto. Tna raa ro *agama* Yahudi mawat mkyas bo ro mkair mai k'Paulus. Tna ana makah ait mamot samu ro ja bi Galio ytu srah to.

¹³ Ana makah Paulus mamot mo k'bi Galio tna maun boun k'ait mawe, "Bi ait refi yber safo mai k'amu raa ro *agama* Yahudi! Ait ykyas bosmot roto sau. Ait yno raa mawat miwer Watum ro Musa!"

¹⁴ Paulus yawe yros saak wa ait, menohe bi Galio sbi hri wa, yawe bo k'raa ro Yahudi yawe, "Paulus yno safo fee. Tna ait yiwer *pemerintah* ro Roma fee ye. Fyi re anu nakah ait nma no k'jō fo?"

¹⁵ Bo ro anu santri anya to bo ranu ro *agama* Yahudi sai. Soh ait yiwer Watum ranu meto mi, anu nesait beah srah refo! Jõ hre susai ttu safo ro mnan feto fee!”

¹⁶ Tna fo ait yikyak ana frok mbam samu mato reto wore ja raa hre beah srah.

¹⁷ Tibyo raa ro Yahudi weto kmo. Ana beta haberek saka bi Sostenes to mai ait mam bohra samu reto. (Bi Sostenes fi aban mana ro ybo samu skabuk rana.) Tna bi Galio ymat rof bo raa mafa sai, yno wa bo fee ye.

Paulus hah yamo't kota ro Antiokhia

¹⁸ Paulus yhau ti baro naut mam *kota* ro Korintus. Tna fo ait ymah meen k'raa ro Kristen akus. Tna Paulus, ysy Priskila msya Akwila masen mamot' remo ro Kengkrea. Mam Kengkrea Paulus yawe skabuk yoyo. Feto tna ait ymur yana mawyan. (Yno mamyot bo mafa raa ro Yahudi ja mno soh ati ro ana mawe skabuk kakat.) Tna ana mabo tuuf maut *kapal* mamot' *provinsi* ro Siria.

¹⁹ Ana mamu snok mam *kota* ro Efesus. Mam beto Paulus sikba ana tna ait yesait yamo't samu skabuk ykyas bo ysy raa ro Yahudi.

²⁰ Raa ro Yahudi weto ana ksoh mari bo ro Paulus yawe. Ana mawe mabe ait mawe, “Namo ma! Nhau baro kait mam befo!” Menohe ait yawe, “Mfe, ayõ mkak oh.

²¹ Soh *Tuhan* ybis mi, meen jõ thah te tama to k'anu u to.” Ait ymah meen k'ana akus tna yasen yaut *kapal* sikba Efesus yamo.

²² Tna Paulus yaut *kapal* yamo't *kota* ro Kaisarea. Tna ait yroh mam beto yamo yaa iso

mne yamo yut. Paulus ymah meen raa Kristen ro mhau mam beto sor. Tna fo yasen yamo renti yamo sia *kota* ro Antiokhia.

²³ Ait yhau mam Antiokhia ti baro. Tna fo ait yasen yamo ymat raa Kristen ro mhau mam *provinsi* ro Galatia msya rabin ro Frigia. Yamo ymat *jemaat* sor ykyas bo yno bosmot wana matak.

Apolos ykyas bo mam kota ro Efesus

²⁴ Tna raa ro Yahudi sait yasom Apolos yamo't Efesus. Ait raa mabe mam *kota* ro Aleksandria. Apolos raa ro ykyas bo yasoh mnan-nan tna yhar Watum ro Allah kaket.

²⁵ Tiwya raa mkyas Yesus yasom k'ait. Menohe ait yhar watum ro Yohanes *Pembaptis* sai, yhar bokyas ro Yesus mabut-abat sai fares. Apolos ksoh toni ykyas Yesus yasom. Ait betoo k'raa yawe Yesus tait *Mesias* ro yoo riof ro mase yee k'raa. Ait ykyas bo reto kaket ye.

²⁶ Ti sau Apolos yros ykyas bo mam samu skabuk raa ro *agama* Yahudi. Ait waa fee. Tna Priskila msya Akwila msya raa taro hre mari bo ro ait ykyas. Menohe ana mbewok mawe k'anya mawe, "Bi ait refi yhar bokyas ro Yesus mnan fefares." Tibyo ana mbewok masen sobu ait tna mmen ait ysyana ana mamot amah rana. Mam weto ana mbewok hre mbetoo Iso ro Yesus kaket k'ait. Tna bi Apolos ait hre shait sai, ksoh yari. Ait kmo fee.

²⁷ Tna Apolos yawe ksoh yamo't *provinsi* ro Akhaya. Tna raa Kristen ro mhau mam Efesus fo ana ksoh ye. Feto to ana mkom aam sau k'raa Kristen ro mhau mam Akhaya. Aam reto mkyas

Apolos k'ana mawe ait raa ro yoof. Tna mbis raa *jemaat* mam Akhaya mawe kbe ana mitrah amah wana tna mawe ait yhau ysya ana. Ana mee aam k'Apolos ybo. Tna ait sikba Efesus yamo't Akhaya.

Apolos frok mam Akhaya. Tna ykyas watum ro *Tuhank'jemaat* mam beto. Ykyas bo kaket tna raa weto mari bo ro ait yawe. Mari tibyo mrok mhar boatmof ro Allah tna bosmot wana mo matak renti.

²⁸ Apolos yamo yros mam wore raa makin mmat tna santri bo ysya raa ro *agama* Yahudi ye. Tna ait betoo Bokom ro Allah k'ana kaket afo re ana mhar mawe Yesus tait *Mesias* oh metait.

19

Paulus yamo't kota ro Efesus

¹ Wore wo Apolos yhau mam *kota* ro Korintus fares, Paulus yamo iso safom twat snok mam *kota* ro Efesus. Paulus snok mam Efesus to, ait fri raa ro ja smot Yesus baro.

² Tna ait ytu k'ana yawe, "Anu smot Yesus oh, tna Allah yoo Har rAit yse k'anu ye fe mfefares a?" Menohe ana mawe si mawe, "Fefares. Amu ja nri raa mkyas Har rAit aro k'amu fefares."

³ Tna Paulus ytu k'ana yawe, "Feto tiwya raa *baptis* anu to, anu kro bokyas ro mbam k'awya?" Menohe ana mawe, "Bokyas ro mbam Yohanes *Pembaptis*."

⁴ Tna Paulus betoo makit rau yawe, "Tiwya Yohanes *baptis* raa ro mashana tna smot Raa sait ro kbe yama. Raa retait yasom Yesus."

5 Ana mari feto tibyo mawe raa *baptis* ana mam *Tuhan* Yesus yasom.

6 Tna Paulus yoo yatem ytor abyō k'ana sk-abuk. Tna Har ro Allah mroh mbo ana. Tibyo ana mmai mai ro ana wase fares mkyas bo ro Har merif k'ana tna mkyas watum ro mbam k'Allah ye.

7 Raa sme weto beta mabo trion 12 bo feto.

8 Tna ja Paulus yamo't samu skabuk raa ro *agama* Yahudi tna ykyas bo. Ait waa fee. Ait ykyas raa mana ro Allah yamo *Raja* ybo. Ait yno feto mammo snok snyi trion tuuf. Ait yros santri bo ysya raa ro Yahudi weto, ykyas bo kakat.

9 Menohe ana baro beswan bo ro ait ykyas to. Ana mana mase sai tna hawe bo smot Yesus ye. Ana baro mkyas kair bokyas ro Paulus reto mawe, "Yesus tait *Mesias* fee! Paulus yerif iso ro meen raa mkai riof ro mase meto fee ye!" Ana mno feto tibyo Paulus yasen sikba ana, tna ysya raa Kristen taro mammo't amah ro Tiranus rait. (Amah reto ja raa hre mkom bo ye. Amah reto mase toni.) Rabu ti wawa to ait hre ykyas bokyas ro Yesus mam beto.

10 Paulus yhau yno bo reto mammo snok *tahun* trion ewok. Tibyo raa ro mhau mam rabin ro Asia reto to, ana beta mari bokyas ro Yesus. Raa mbam raa mana ro Yahudi ye msya raa mbam raa mana ro Yunani ye beta mari. Tna taro smot Yesus, tna taro smot fee ye.

11 Allah yoo yatak rAit yee k'Paulus tibyo Paulus yno bo ro msai toni.

12 Tna raa mbo bo mabat ro ja Paulus ybo mam yatem karu yimyoh to, msya bo mabat ro ja ybin

yaka bo sor to, mbo, makah mamoo mee k'raa ro kiyam to mbo. Tna Har ro Allah mno kiyam rana marak. Tna kabes ro mhau k'ana to frok msam sikba ana ye.

Ku ro bi Skewa wait

¹³⁻¹⁵ Raa botkif ro Yahudi mabo ngkrema ja mamoo mam woyō-weya sai. Mamoo miyak kabes frok mbam raa ro kiyam. Ana weto to ku mabo krema ro mao k'anya, ku ro bi Skewa wait. (Bi Skewa tait *imam* yanes ro Yahudi sait.) Ana weto mari he Paulus tkif raa mkah Yesus yatak rait. Tibyo ti sau ana weto mawe ana miyak kabes frok mbam k'raa ro kiyam mkah *Tuhan* Yesus yasom ye. He mfe: Ana mbis kabes sau mawe, "*Tuhan* Yesus ro ja Paulus ykyas tait, mkah yasom rAit amu niyak nyō frok nbam raa retait!" Menohe ana mabo ngkrema weto smot Yesus fefares, tibyo ana mbo tak rAit fee ye. Ana mkyas fetoo menohe kabes reto mhau k'raa retait tna mno raa retait yatak tna safo toni. Tna kabes reto mawe "Jō thar Yesus ysya Paulus. Ana weto matak miyak jō saah. Menohe anu ntak fee!" Tna kabes reto frok fee.

¹⁶ Tibyo ait ro kabes mbo refi thab yfot raa mabo krema ro mao na k'anya wefo. Kabes kmo mukah ana mkah yaaf tna mhah ratan wana ro myum ye. Tna ana nsro raa msam frok mamoo mbam amah reto.

¹⁷ Raa ro Yahudi msya raa ro Yunani ro mhau mam Efesus beta mari bo reto tibyo mrok waa. Tna *Tuhan* Yesus yasom rAit, raa mbo faram yoyo.

18 Raa ro smot Yesus to, ana mawat mama mras iro wana abyõ, mkyas mam wore raa masu makin mmat to mawe, “Mfo refo amu nashana oh. Botkif ro mkair tiwya amu nno to, amu noo mbeak fari. Mfo refo anu smot Yesus.”

19 Tna ana ro tiwya matak mari botkif taro sor fo, makah bokom ro botkif wana ro tiwya mmat. Makah mama mse tna raa mkah mait mam wore raa mawat mros mmat. Botkif ro raa mkah mait weto to, ja mabyoh maut toni, pitis trion 50 *perak* bo feto.

20 Bo weto syohor k’raa beta mari. Tna watum ro *Tuhan* Yesus mrok matak oh meto.

Paulus ykyas bo mam Efesus to yno raa mrok mnin-nin

21 Bo weto mkak tna fo Paulus yawe, “Har ro Allah mbis mawe jõ tasen tamo’t *kota* ro Yerusalem. Jõ tawe tamo iti mam *provinsi* ro Makedonia msya *provinsi* ro Akhaya. Tna fo kbe jõ tamo’t *kota* ro Yerusalem. Kbe thau mam Yerusalem ti baro tna tawe tamo’t *kota* ro Roma ye.

22 Tna jõ ksok tafok ajõ Timotius ysya Erastus mbewok matim wia mammo’t rabin ro Makedonia. Jõ tesait thau akus ti baro naut mam befo.” Tna Paulus yhau ti baro mase mam rabin ro Asia fares.

23 Wore weto raa taro ro mhau mam Efesus mawe ana smot *Tuhan* Yesus. Bosmot ro *Tuhan* reto mno raa ro *kota* reto mrok mnin-nin.

24 Raa sait ro yhau mam *kota* reto yasom bi Demetrius. Ait ja yoo *perak* yfen *patung* mkah bo raa smot. Raa makin ro mhau mam *kota* ro Efesus to ana ja smot *dewi* Artemis. Tibyo bi

Demetrius ysa yafoh na wait ja masim *patung* ro Ait yfen weto to, moo pitis mawat ye.

²⁵ Tna Demetrius ytu yafoh wait sor mama siret su msya raa ro ja mfen bo ro *dewi* Artemis taro sor. Tna ait yawe k'ana yawe, "Tao na: Amu ja fri bomafer mbam bo ro anu bfen refo mawat oh.

²⁶ Menohe Paulus ait beswan yawe, 'Bo ro raa mfen reto to, *dewa* meto, bo ati meto fee! Raa ro smot *dewi* Artemis to wase bo fares!' Tna raa mawat mari bokyas ro Paulus. Ait sioh yno raa ro mhau mam Efesus to mesait aran fee. Raa ro mhau mam rabin ro Asia refo beta mari bokyas rait ye!

²⁷ Kbe meen raa hartu bo ro anu bfen to u fee ye. Kbe raa hawe bo ro amu ja nsim. Tna kbe raa miwana samu sahfra ro *dewi* Artemis reto ye. Raa ro mhau mam rabin ro Asia refo tna raa ro mhau mam arin aso beta ja smot *dewi* Artemis ye. Nno be raa mbaut *dewi* ranu reto u fee. Nno be kbe raa mawe Artemis to *dewi* ro mase fee! Safo refo kbe msai toni!"

²⁸ Raa weto mari bo ro Demetrius yawe, tibyo ana mrok kmo toni. Ana masen hawyōn *dewi* rana mmai wer mawe, "Asik mase k'*dewi* Artemis. Au fo *dewi* raa ro Efesus!"

²⁹ Bo ro raa mno mnin-nin syohor mamno snok raa ro mhau mam *kota* reto beta mari ye. Tna raa mawat mhoh mamno kait yuk ro raa hre siret reto tna mmat. Ana mawe saso Paulus mfot, menohe mkai ait fee. Tibyo ana mfot Gayus ysa Aristarkhus, Paulus yafoh na wait. (Ana mbewok mbam Makedonia kro Paulus mama.) Raa ro Efesus mfot ana mbewok makah mamno't

yuk reto.

³⁰ Paulus yari feto tna yawe yamo yrof ana mbewok mam yuk ro raa siret reto. Menohe yafoh na wait taro mabe ait mawe, “Namo ma!”

³¹ Raa mase ro mammo aban mana mam rabin ro Asia to mabo baro ja miranya msya Paulus ye. Ana mawe k’raa sait mawe, “Namo nawe wa k’Paulus, nawe kbe yamo’t yuk ro raa siret reto ma.”

³² Raa ro siret weto to mmai mnin: Taro mmai wer mawe fefo, tna taro mmai wer mawe fno. Raa ro mama siret mam weto taro wase bo masmair rau ro misti re ana mammo siret sor mam yuk reto to ye.

³³ Tna raa ro Yahudi baro mama siret mam yuk reto ye. Ana baro myum bi Aleksander yatim to, mbis bo k’ait mawe, “Nasen saak anu wa afo re raa mhar mawe anu, raa ro Yahudi to bisti bo refo fee!” Tna Aleksander yasen yros tna yawe raa makin shait beta, re kbe ana mari bo ro ait yawe. Menohe raa taro mmat ait yasen yros to, ana mnaut mawe ait oh mi yisti safo reto.

³⁴ Raa makin weto mrok mhar he ait fi raa ro *agama* Yahudi. Fetu tibyo ana masen mtu mkah mmai ro mase mawe, “Asik mase k’*dewi* Artemis! Au oh mi *dewi* raa ro Efesus to!” Ana mtu baro kait fetu ye oh.

³⁵ Tna raa mase ro mbo *kota* Efesus sait yasen yros yawe, “Tao na; shait oh! Waa ma. Raa beta mhar mawe anu ro bhau mam Efesus fo, ja kmot sahfra ro *dewi* Artemis. Raa mhar mawe fraa ro mhau mam sahfra ramu to, fraa ro mbau. Fraa reto mfi *dewi* Artemis, tiwya btek mbam ayoh.

³⁶ Tna raa sait bo kbe ywaar bo reto fee ye. Feto to, knar oh! Nno bo mnin-nin toni ma!

³⁷ Anu nbo raa mabo ewok reto nkah nma't befo nno fyi! Ana mbewok riwai mawe kair *dewi* ranu fee. Tna ana msyōf bo mbam sahfra ro *dewi* Artemis aro bo fee ye."

³⁸ Tna bi yabi retait yawe k'Demetrius ysyaa raa wait ro mfen *patung* yawe, "Soh anu nwe nuun boun raa to, nmo't samu ro ja raa mtu srah! Raa ro ja mtu srah to, ana huwya mari safo ro raa makah mamō mkyas k'ana. Kbe ana hre susai mtu safo refo mari ye.

³⁹ Soh anu nwe nkyas safo roto taro to, nmo nkyas mam siret ro raa beta hre mari ye.

⁴⁰ Soh nyō nisti re raa mrok mnin-nin fefo, kbe raa maun anu mawe anu besait oh mi bno bo ro mkair. Kbe anu huwya saak wa anu bwe bawya no? Bo ro kbe anu bwe aro fee ye!"

⁴¹ Raa ro yase retait ykyas bo wetō mkak. Tna ybis raa wetō mamō bana.

20

Paulus yamo't provinsi ro Makedonia

¹ Raa ro mnin-nin to mrok mnem. Tna Paulus ytu raa Kristen ro mhau mam *kota* ro Efesus yawe ana mama siret su. Tna ait ykyas bo k'ana yawe, "Jō ksoh anu beroh smot *Tuhan* kaket!" Paulus ykyas bo mkak tna ymah meen k'ana akus. Tna ait yasen yamo't *provinsi* ro Makedonia.

² Paulus yamo yur ytan mam rabin ro Makedonia tna ykyas bo k'raa Kristen ro mhau mam

beto sor. Yawe ana bito smot *Tuhan* Yesus matak sai. Tna fo ait yasen yamo't rabin ro Yunani.

³ Paulus yhau mam rabin reto snyi trion tuuf. Tna ait siwyan yawe yaut *kapal* yamo't *provinsi* ro Siria, he mfe. Ait yari he raa ro Yahudi saim bo mawe mame ait. Feto tibyo ait yamo yaut *kapal* reto fee. Ynaut yawe yamo iso mne sai. Feto tibyo ait yhah ye yamo yur mam Makedonia wia tna fo snok mam Siria.

⁴ Menohe yafoh na wait taro beroh maut *kapal* reto mamō. Ana wetō oh mi: Sopater ro ybam remo ro Berea (ait ku ro bi Pirus yare), Aristarkhus ysyā Sekundus (ana mbewok mbam *kota* ro Tesalonika), Gayus (ait ybam remo ro Derbe), Timotius, tna Tikhikus ysyā Trofimus ye (ana mbewok mbam rabin ro Asia).

⁵ Ana mabo krema reto maut *kapal* matim wia. Tna ana ste amu* ro nmo iso mne wea mam remo ro Troas.

⁶ Tna amu fo nmo naa sai nmo snok mam Filipi. Amu nhau mam beto nkyō Korat *Roti* ro *Ragi* Marak. Tna fo amu nsen nuut *kapal* nmo renti. Amu nmo mam aya sawan ti trion maat tna snok mam Troas. Mam Troas amu fri amu nfoh wamu mabo krema ro matim wia tna ste amu mam beto. Tna amu nhau mam *kota* reto ti trion krema naut.

⁷ Mam ayō ro *Minggu* amu raa ro Kristen nmo siret su. Amu nkyō Korat ro Niit *Roti* afo re amu nnaut Yesus ro tiwya raa mame yajat. Tna Paulus yawe menrabu rabu ait yamo. Feto to amu nhau

* **20:5** Mam Kisah 16:10-17, 20:5-21, 27:1-28 to, bi Lukas ykom yawe 'amu.' Raa mnaut mawe ti aro-aro Lukas kro Paulus ysyā yafoh na mamō msya ana su.

tna nri ait ykyas bo kait. Ykyas bo mamō snok mti reto arin masuf.

⁸ Tna raa mno tafoh mawat mse mait ye. Amu hre mam amah reto ntakor ro tuuf.

⁹ Tna mere sait yasom Eutikhus hre mam hroh ro amah kri-kri fo. Paulus ykyas bo miyō toni. Tibyo mere retait yut yjin maka fee. Ait yrok yjin tu sorni ait tibyo ytek ybam hroh reto, yamo yai mte tibyo yajat. Raa tubat mere retait he ait yajat oh.

¹⁰ Tna Paulus yroh yamo mam te tna yaka ybo mere retait. Yaka ybo tibyo ait yrok yasen. Tna Paulus yawe, “Waa ma. Ait yhai fee.”

¹¹ Paulus hah ye yaut u yamo’t amah hawar reto. Ait haber *roti* ftah aro rau-rau tna yee k’ana beta mait. Korat reto mkak tna Paulus ykyas bo naut u k’ana mamō snok nyah msan. Tna ait yasen yamo.

¹² Tna raa mamō bana beta, msya mere ro riwai yhai tna yrok yasen ye. Ana tne mere retait yamo’t amah rait ye. Tna raa wetō sraujin u fee, ana simaut mase sai.

Paulus ysya raa wait mamō’t remo ro Miletus

¹³ Amu nesait nuut *kapal* ntim joh ro Asos ste Paulus wea. Taa ait yawe ait yesait yamo iso mne, tna yawe k’amu yawe amu kbe nryot nsio ait mam wetō.

¹⁴ Ait yama snok si k’amu mam Asos to, yaut *kapal* ramu tna amu beta nmo’t joh ro Metilene.

¹⁵ Tna *kapal* reto mhoh renti. Rabu ti fo amu snok si mam sato ro Khios. Rabu ti naut to, amu nhoh nmo kene kait mam sato ro Samos, tna rabu ti naut to, amu snok mam remo ro Miletus.

¹⁶ Tna Paulus yawe k'amu yawe, "Anu bmo tkia iti mam Efesus ma. Soh bwe tkia iti mam Efesus to, kbe ti mkak sai mam Asia. Anu bmo fooh sai afo re kbe bmo snok wia mam Yerusalem mam ati ro raa makyō Korat ro Pentakosta."

Paulus ykyas bo k'majelis ro jemaat Efesus

¹⁷ Mam joh ro Miletus to, Paulus ybis raa sait yamo ytu *majelis* ro *jemaat* Efesus mama mo k'ait.

¹⁸ Ana mama tna Paulus yawe k'ana yawe, "Tao na; tiwya jō thau tsya anu ooh-oh. Tna anu nhar jō kaket.

¹⁹ Anu nhar nwe ja jō tno bo ro *Tuhan* ybis mkah thaf ro sneh yoyo. Tna jō tukan btek yoyo ye. Tna jō tkai bo ro samyoh mbam raa ro Yahudi ro saim mame jō tajat ye.

²⁰ Menohe jō beroh tkyas watum ro Yesus k'anu kaket. Jō tber kait bo maja taro fee ye. Jō terif bo k'anu mam woyō-woya sai tna mam amah wanu bo ye.

²¹ Wore weto to, tkyas bo k'raa ro Yahudi msya raa ro Yunani ye. Ja rabu ti wawa jō tkyas bo k'ana to, tawe ana mashana, tna mama mo k'Allah, tna smot *Tuhan* Yesus ye.

²² Tna mfo refo Har ro Allah mbis jō tamo't Yerusalem. Tna jō wase bo bawya ro kbe btek mai k'jō mam beto ye.

²³ Menohe woyō-woya sai jō tamo to, Har ro Allah mkyas k'jō wia mawe kbe meen raa mfot jō tna mbu mam *bui*. Tna kbe bo ro mkair roto taro btek mai k'jō ye.

²⁴ Menohe jō te tnaut tetsu ajō bo fee ye. Tna jō waa fee ye. Bo ro ati to, jō beroh tkyas Bokyas Moof ro Yesus (*Injil*). Beroh tkyas tawe Allah yatmof raa tibyo yoo riof ro mase yee k'ana. Au oh mi bo ro *Tuhan* Yesus ybis Jō tno mamō snok tabi thai si fo.

²⁵ Ja jō thau tsya anu tkyas raa mana ro Allah yamo *Raja* ybo. Tna mfo refo jō thar tawe meen anu nmat jō tasu u fee.

²⁶ Feto to jō thar tna tawe k'anu tawe soh meen anu aro nkai riof ro mase fee, jō wase ye. Jō tasom isti reto fee.

²⁷ Tiwya jō beroh tkyas Watum ro Allah k'anu. Jō haweboh fee. Jō tber kait bo maja taro fee ye.

²⁸ Nhau kmot netsu wanu kaket. Tna kmot raa *jemaat* ranu ro mhau mam Efesus kaket ye. Ana oh mi tiwya Har ro Allah mee k'anu mkah bo anu kmot ana to. Feto to, kmot ana kaket mfi bo ja raa kmot *domba* wana kaket ye to. Allah kwiyat ana mkah mees ro Ku rAit *Tuhan* Yesus oh.

²⁹ Jō tamo. Tna thar tawe raa ro mno bo mkairkar kbe mama. Ana weto meen mno bo ro mkair k'anu, mfi mtah rbyoh ro ja mafit *domba* to.

³⁰ Raa weto mesait fee: Anu nkin wefo taro meen nsen nkyas bokyas ro mkair, bokyas ro ntrot fee. Ana taro mam *jemaat* ranu mesait kbe moo raa mhaf afo re ana mari tna kro Yesus u to fee. Raa weto ksoh mawe kbe raa mari tna kro ana mesait.

³¹ Bo reto jō tkyas k'anu tawe matim wia afo re kbe anu nhar tna nnaut kaket kmot anu. Tna nnaut nwe ro tiwya *tahun* trion tuuf muuf to, rabu-reha to jō tkyas bo wefo k'anu yoyo. Ti aro-

aro jō sraujin tna tawia ye.

³² Tna mfo refo jō skabuk tsan anu *k'Tuhan*. Jō skabuk re kbe Ait yatam anu, tna yno bosmot wanu mrok matak mkah watum rAit. Anu nri watum rAit to, kbe Ait yoo bouum ysan k'anu. Bouum reto Ait yuumto k'anu nkin wefo nesait fee. Meen Ait yuumto bouum reto k'raa ro Ait ysok mammo raa wAit beta.

³³ Anu nhar nwe ja jō taam bo raa fee. Jō tasu mase saso *perak,emas* msya ratan bo fee ye.

³⁴ Menohe jō tesait tkah bo wojō afo re bo ro tse to mabut fee. Feto tna raa ro ja kro jō to, bo wana ro mse to mabut fee ye.

³⁵ Bo ro tno to, weto beta Jō tno afo re anu nmat tna re nhar bo moof re kbe anu nesait nbo nno feto ye. Feto to, nkah bo wonyō nesait kaket ye. Nno kaket afo re kbe anu ntai natmof raa ro kinyah ye. Nnaut bokyas ro Yesus: Tiwya Ait yawe, 'Ro moof to anu noo bo nee k'raa anya. Nmo nyoh bo yoyo ma.' "

³⁶ Paulus ykyas bo mkak. Tna ana beta maka ntmi mimna tabam tna skabuk.

³⁷ Ana beta sraujin saku Paulus mawia tna mmah meen k'ait yamo oh.

³⁸ Ana sraujin toni mnaut bo ro Paulus yawe k'ana; yawe ana meen me mfri ait u fee. Tna ana makah Paulus mammo betne yaut *kapal* yamo.

21

Paulus yawe yamo't Yerusalem

¹ Amu nmah meen tna bitsre ana. Amu nuut *kapal* reto nhoh nmo't sato sau ro masom Kos. Rabu ti fo amu snok mam sato ro Rodos, tna

nbam Rodos to amu nmo renti mam remo ro Patara.

² Mam Patara to amu nroh nbam *kapal* reto tna fri *kapal* sau ro mamot' ati jaro. Mamot' rabin ro Fenisia. Tna amu nuut *kapal* reto nmo.

³ *Kapal* reto mamot' tna amu nmat sato ro Siprus mhau mam ati ro ntem taa, tna amu niwrek iti sai nmo't *provinsi* ro Siria. Amu nmo feto tibyo snok mam *kota* ro Tirus. Tna raa ro mkah bo mam *kapal* reto mwia bosatoh ro masyō mamot' mkah bo kbe raa masim mam beto.

⁴ Mam Tirus amu nroh tna nmo nurer raa Kristen ro mhau mam beto. Amu nhau mam beto ye ti trion krema. Har ro Allah mkyas bo k'raa Kristen ro mhau mam beto, □mawe kbe bo ro mkair mbtek mai k'Paulus mam Yerusalem.□ Feto to ana mawe wa k'Paulus mawe, "Namot' Yerusalem ma."

⁵ Ti weto mkak. Tna amu nwe nuut *kapal* reto nmo renti. Raa Kristen ro mhau mam beto, fnya wana msya kukek wana, ana beta ye masen mama betne amu mam *kota* makit. Tna mam aya sawan maam fo amu beta nka tmi nimna tabam tna skabuk su.

⁶ Tna amu nuut *kapal*, tna ana hah me mamot' si bana.

⁷ Amu nbam Tirus nuut *kapal* nmo snok mam *kota* ro Ptolemais. Amu nroh mam beto nmah meen nsya raa Kristen ro mhau mam beto sor. Tna amu njin nsya ana ti sau mam beto ye.

⁸ Tna rabu ti fo amu nsen nuut *kapal* nmo renti tna snok mam *kota* ro Kaisarea. Mam beto amu nmo't samu ro Filipus tna nhau nsya ait. Filipus fi raa ro ja yamo ykyas Yesus yasom k'raa ro mari bokyas rAit fefares. Ait sait ybam k'ana

mabo krema ro tiwya raabis ro Yesus msok mam Yerusalem.

⁹ Filipus ku wait ro fnya fain mabo jiit. *Tuhan* yuumto bouum k'ana tna re ana ja mari mai ro mbam *Tuhan* tna mkyas bokyas rAit reto k'raa mfi raa ro *nabi*.

¹⁰ Amu nhau mam Kaisarea ti baro ye. Tna Allah ybis *nabi* sait yasom Agabus ybam *provinsi* ro Yudea yama.

¹¹ Ait yama snok k'amu tna yoo hotom ro Paulus rait tna yesait yake ait yaa oo yatem bo tna yawe, "Har ro *Tuhan* mawe fefo: 'Raa ro hotom rait refi fi, kbe raa mbam raa mana ro Yahudi huwya make ait mam Yerusalem tna mawah msan k'raa ro mbam raa mana roto.' "

¹² Amu nri fetu tibyo amu nsya raa Kristen ro mhau mam beto to, nwe nbe Paulus. Amu soh-soh ait nwe, "Namo't Yerusalem ma!"

¹³ Tna Paulus yhaf hri yawe, "Mkah bawya re anu nwia tna nno jō thaf roon toni fo. Jō tawe tno bo ro *Tuhan* ybis k'jō yoyo sai. Soh raa mfot mbu jō tna mame jō tajat ye, bo weto moof beta ye. Jō beroh tamo't Yerusalem."

¹⁴ Paulus yari bo ro amu nkyas fee. Tibyo amu soh-soh ait u fee, nwe k'anya nwe, "Anu bsan ait k'*Tuhan* sai oh."

Paulus ykyas bo su ysya Yakobus mam Yerusalem

¹⁵ Amu nhau ti baro mase mam *kota* ro Kaisarea. Tna amu nsen siwyan bo wamu mkah bo nmo't Yerusalem.

¹⁶ Raa ro Kristen mabo baro mbam Kaisarea msya amu nmo ye. Amu nmo tna raa ro Kaisarea weto mawe amu njin nsya ana mafoh sait. Ait

retait yasom Manason. Ait raa mabe mam sato ro Siprus tna ait smot Yesus ooh-oh. Tna amu nhau iti nsya ait mam samu rait.

¹⁷ Amu snok mam Yerusalem to, tna raa Kristen ro mhau mam beto mmah meen k'amu mkah mhaf ro moof toni.

¹⁸ Rabu ti to, Paulus ysyas amu nmo nmat Yakobus. Tna *majelis* taro beta mama siret su ye.

¹⁹ Paulus ymah meen k'ana tna fo betoo bo maja sau bitsre-bitsre beta k'ana. Ait ykyas bo ro Allah yno wore ait yamo ykyas Yesus yasom k'raa ro mbam raa mana roto.

²⁰ Ana mari feto tibyo mawe, "Tao; amu nri feto ksoh toni tibyo nyoh asik mase k'Allah. Menohe raa wamu ro Yahudi taro mari feto to, kbe ana mrok kmo! Mam Yerusalem fo, raa ro Kristen msis-sas mbo Watum ro Musa ykom to, matak fares ye.

²¹ Ana mhar mawe nyō ja nkyas bo k'raa ro mhau mam rabin roto makin. Nkyas bo k'raa mana makin to, nkyas k'raa mana ranu ro Yahudi ye. Tna ana weto baro mamus nyō. Ana sioh mawe, 'Paulus ybis raa wanu weto, yamo yawe k'ana yawe, "Kro Watum ro Musa to ma. Nbo nno ma. *Sunat* kukek wanu ma. Tna kro bo mafa wanu ja bno soo to, ma ye."'

²² Tna mfo refo fyi? Ana mari bo nyō nama't befo fo, kbe ana mama mfot nyō! Kbe anu bno bo bawya afo re bno wa ana?"

Paulus yno bo mafa ro Yahudi fares.

²³ Tibyo *majelis* weto mnaut bo reto mamome tna mawe k'Paulus mawe, "Raa ro Yahudi mabo

jiit ro smot Yesus mros ye wefo fo. Ana mawe kbe ana myon metsu rana mamyt bo mafa ranu mkah bo skabuk *Tuhan* kaket. Amu nwe nyõ nno fefo:

²⁴ Nyõ kro ana nmo nyon netsu wanu. Tna nmur nana mawyan ye. Tna noo pitis nee k'ana mabo jiit kbe maren raa ro ymur ana mana mawyan wana to. Nno fetu re kbe raa beta mmat tna mhar mawe bo ro riwai ana mari to, mabo fee. Kbe ana mhar mawe nyõ ja kro Watum ro Musa matak fares.

²⁵ Tiwya amu nkom aam sau nee k'raa Kristen ro mbam raa mana roto oh. Amu nkom bobis baro k'ana wetu. Amu nwe kbe ana kro bo mafa raa mana ro Yahudi beta ma, mhau sai. Aam reto mkyas mawe:

1. Sohmaam boit ro raa moo msan *k'berhala* oh to ma.
2. Nta mees ro kak raa ktan to ma.
3. Nbo kak kwiyan ro mees mhau fares to ma.
4. Tna nwyah bo to ma ye."

Ana mkyas bo wetu mkak tna ana mamu bana.

²⁶ Paulus yari bo ro *majelis* wetu mawe. Rabu ti naut tna ait yakah raa mabo jiit wetu. Tna ana mabo maat myon metsu wana. Tna raa mmur mana mawyan wana ye. Ana mno mamyt bo mafa raa ro Yahudi ja mno. Mno bo wetu afo re ana moof mnan si skabuk Allah. Ana mno bo wetu mkak tna mamu twok mam Samu ro Allah tna mawe *k'imam* mawe, "Ti baro naut tna bo ro amu nno refo mkak. Tna fo amu sait-sait kbe nkah bosan nma nee k'Allah."

Paulus Raa Mfot

27 Ti trion krema to, Paulus yno bo reto kene wore mkak oh tna yhau mam Samu ro Allah. Tna raa ro *agama* Yahudi baro mbam rabin ro Asia mmatait. Ana weto kmo tna masen mfotait. Ana mawe k'raa makin mawe,

28 "Raa ro Israel: Nma bfot Paulus! Ait fi ja yamo woyō-woya sai ykyas bo k'raa yno re ana mber hasyoh anu. Yno ana miwer Watum ro Musa ykom. Yno re raa miwana Samu ro Allah refo ye. Bi ait mefi! Mfo wefo ait yakah raa mbam raa mana ro Yunani baro twok mam Samu ro Allah mato ye. Bo reto anu bbau, kbe mno Samu ranu refo mkair!"

29 (Taa ana mmatait Paulus yiranya ysyia Trofimius, raa ro mbam Efesus. Feto to ana mnaut mawe Paulus yakah ait yamo twok mam Samu ro Allah mato ye.)

30 Mari fetoto raa mrok kmo Paulus. Ana beta mhoh mama. Mama mfotait tna mikyakait frok mbam Samu ro Allah. Tna raa muut mato Samu ro *Tuhan* reto wa ye.

31 Raa ro Yahudi hre saim bo mawe mame Paulus yajat. Menohe raa mamomkyas k'raa sbe ro Roma. Mkyas k'aban mana raa ro sbe mawe *kota* ro Yerusalem to, raa mmai mnin-nin toni oh.

32 Aban mana yari fetoto tna yasen ybis raa sbe ro mase yawe, "Ntu raa kinyah wonyō baro. Nma, anu bsen broh bmo't *kota* fooh! Raa makin mam weto mnin-nin!" Raa makin ro mnin-nin weto mmatait raa sbe weto mama fo, tna bitsre mai Paulus fee.

33 Tna aban mana retait yamo yfot Paulus tna ybis raa sbe wait moo *rantai* ewok makeait yatem. Tna ytu k'Paulus yawe, "Nyō awya? Bo

ro nyō nno fo bawya mefo?”

³⁴ Menohe raa msis-sas weto taro kmo mmai wer mawe, “Ait yno bo rno!” Tna taro mmai wer mawe, “Ait yno bo rau!” Raa mnin-nin feto tibyo aban mana retait yari bo masmair rau kaket fee ye. Tibyo ait ybis raa sbe makah Paulus mamō’t snek rana.

³⁵ Ana makah ait mamō snok si mam barit fo raa mawat mJOR beak-ak anya tibyo raa ro sbe wefo tubat Paulus katar abyō.

³⁶ Raa mawat ro hyu kro ait kmo mmai wer mawe, “Nno ait retait yasu marak to!”

Paulus saak ait k’raa ro Yahudi

³⁷ Paulus raa makah twok mamō’t snek raa sbe. Tna ait ytu bo k’aban mana retait mkah mai ro Yunani yawe, “Nbis jō tkyas bo k’nyō kebet baro wia, mbau a?” Tna bi refi yrok ktak yawe, “Nyō nhar mai ro Yunani ye oh a?”

³⁸ Feto nyō fi raa ro Mesir fe mfe a? Riwai jō trok tawe nyō fi raa ro Mesir ro taa yno safo tait. Ait retait taa ysya raa wait mabo trion 4000 mama. Ana weto mbo sbe ymok ana mafa msya raa wamu. Tnafo ana msam mamō’t yuk ro riamo!”

³⁹ Paulus yawe, “Mfe, jō fi raa ro Yahudi. Kota ajō to Tarsus, ro ja masom ye mam *provinsi* ro Kilikia. Jō soh-soh nyō nbis jō tkyas bo k’raa wefo sor.”

⁴⁰ Bi ait ybis. Tna Paulus yros mam barit reto tna yawe raa makin shait beta, re kbe ana mari bo ro ait yawe. Tna ait ykyas bo k’ana mkah mai ro Ibrani yawe,

22

Paulus saak ait wa

¹ “Tao msya taja na; nri ro jō tkyas saak jō wa refo wia.”

² Raa msis-sas weto mari Paulus ykyas bo mkah mai rana ro Ibrani. Feto tibyo ana mrok mnem beta. Tna ait yawe,

³ “Jō fi raa ro Yahudi. Tna fnya mabe mam *kota* ro Tarsus ro mhau mam rabin ro Kilikia to. Menohe jō raa mtos thau tabi mam *kota* refo. Tiwya *guru* ajō bi Gamaliel. Ait yber jō kaket. Ait ykyas Watum ro Musa k’jō msya bo mafa anu hohos wanu ja mno ye. Tna bo weto mame k’jō thaf. Jō raa ro mur-mur kro Watum ro Allah. Tiwya tkyas tna mno mnan mfi bo mfo refo anu nbo nkyas ye fo.

⁴ Tiwya jō sikowah raa ro kro Iso ro *Tuhan* Yesus ye. Bo ro tno misti re raa Kristen baro mhai. Jō tfot raa sme msya fnya ye tawah tbu mam *bui* ye.

⁵ Bo weto to, *imam agama* Yahudi ro yase ysya raa wait ro ja mtu safo raa ro Yahudi sor to, ana mmat mkah masu rana oh. Ana mhar mawe jō sioh fee. Tiwya ana oh mi mkom aam baro mee k’jō tbo. Tbo aam weto tamo’t *kota* ro Damsyik tawe tfot raa Kristen ro mhau mam beto. Tawe tfot tna tbo takah ana nmo’t Yerusalem fo, tna raa mtu srah tna mmit safo k’ana ye.

⁶ Ati reto baas fares tna tamo mam iso, kene mam Damsyik to, tna bo sau mfi naar mkek mait mbam ayoh btek mama mame mur mtan mam wore jō tros.

⁷ Tna jō btek tawe tai tabam tna jō tari mai sau mame k'jō timara mawe, 'Saulus; nyō sikowah Jō nno fyi?'

⁸ Jō te ttu si tawe, '*Tuhan*; Nyō awya metait?' Ait yawe, 'Jō fi Yesus raa ro Nasaret, ro ja nyō sikowah.'

⁹ Raa ro kro jō nmo su mmat nar reto. Menohe mai ro mkyas to, ana mari fee.

¹⁰ Tna fo jō ttu k'*Tuhan* tawe, '*Tuhan*; kbe jō tno bawya?' Ait yawe k'jō yawe, 'Nasen oh! Tna namo't Damsyik. Mam beto to, kbe raa sait yama ykyas k'nyō. Ykyas bombra ro meen nyō nasom beta.'

¹¹ Riwai naar btek mame mam wore jō tros. Tna kek mawyah rau mno tasu mti. Tmat bo fee. Tibyo ana ro kro jō nmo to, mbo jō tatem makah nmo't Damsyik.

¹² Mam Damsyik raa sait yasom Ananias yama yo k'jō. Ait refi ja waa Allah tna kro Watum ro Musa yoyo. Tibyo raa Yahudi ro mhau mam beto to, ana beta ja hartu bi ait.

¹³ Ait yama yros kait k'jō tna yawe, 'Saulus; tao ajō: Nasu mrok maah oh!' Mam weto si fo jō tasu maah tna tmat Ananias ye.

¹⁴ Tna ait yawe, 'Allah ro tiwya anu hohos wanu smot tait, yawe ysok nyō mkah nno bo ro Ait yawe. Tna yno re nyō nmat Yesus tna nari bo ro Ait ykyas ye. Yesus tait raa ro yato mboh.

¹⁵ Ait yawe kbe nyō namo nkyas bo ro riwai nyō nmat, tna bo ro nyō nari reto ye.

¹⁶ Bawya re nyō ntane mamome to? Nasen oh! Nawe raa *baptis* nyō. Tna kbe *Tuhan* yyon iro wonyō ye.'

17 Tno bo weto tna fo Jō thah tamo't Yerusalem. Tna ati sau jō skabuk mam Samu ro Allah kri-kri to Har ro Allah mber beroh-roh msya jō tamos ajō.

18 Tna jō tmat *Tuhan* ro ykyas bo k'jō. Ait yawe, 'Nasen sikba Yerusalem fook tna frok namo! Ja nyō nkyas bo ro Jō tno k'nyō. Tna raa hawe. Ana, mawe bo reto mabo fee, mawe nyō sioh sai.'

19 Menohe Jō tawe, '*Tuhan*; raa ro Yerusalem ja mhar oh, mawe jō fi tiwya tamo't samu ro skabuk aro-aro tna tfot raa ro smot Nyō. Ana mhar mawe ja tfot ana tna tawah tbu mam *bui* tna sikowah ana ye.

20 Tiwya Stefanus ykyas Nyō nasom. Tna raa kmo tna mame ait yajat to. Ati reto to, jō srau sau tsya ana tna tros kmot ratan raa ro mame ait to ye.'

21 Menohe Allah beroh yawe, 'Namo oh! Mfo refo Jō t'bis nyō frok namo fari. Namo nkyas Jō tasom k'raa ro mhau mam rabin roto.' "

22 Raa ro Yahudi mari bo ro Paulus ykyas mammo snok mam bokyas tis refo. Ait yawe Allah ybis ait yamo ykyas Yesus yasom k'raa ro mhau mam rabin roto; k'raa ro Yahudi fee weto. Ana mari feto tna kmo mmai tis. Raa mawat weto beswan bo ro ait yawe. Ana mawe, "Nme ait yajat! Paulus ye yhau kait mam tabam refo ma!"

23 Raa weto mmai mnin fares sai tna mrus ratan wana ro ja ana myum mne to, mai maut tna mabah bohasyaf beak maut mam uu ye.

24 Feto tibyo aban mana raa sbe retait ybis raa wait makah Paulus twok mam snek rana. Aban mana ro sbe retait, ait wase bo ro Paulus yno re

raa ro Yahudi kmo mmai wer mamus ait. Tibyo ybis raa mtu bo k'Paulus tna sie ait afo re kbe ait yasbrah safo ro ait yber reto.

²⁵ Raa sbe baro make Paulus yatem mkak tna mawe mmok ait. Menohe Paulus yawe bo k'raa sbe ro yase sait yawe, "Fyi, watum ro Roma ja mbis raa ranu mmok raa ro Roma wia matim menohe raa mtu srah rait fefares a?"

²⁶ Raa sbe ro yase retait yari feto tibyo yawe k'raa wait yawe, "Nros wia!" Tna yamo yo k'aban mana raa sbe retait tna yawe, "Bo refo oh kbe nyõ nno meto a? Paulus yawe ait *warga negri* Roma: Raa ro bi Kaisar ja ybo kmot!"

²⁷ Tibyo aban mana retait yamo yo k'Paulus ytu yawe, "Nawe kaket, nyõ fi raa ro Roma tu a?" Menohe Paulus yawe, "Ae, mabo oh!"

²⁸ Tna ait yawe, "Jõ tiwya twok tamo raa ro Roma to, jõ too pitis namabyoh ro mase toni tee *k'raja* Kaisar!" Menohe Paulus yawe, "Jõ tno bo ro mfi feto fee! Jõ fi raa manat. Jõ fi raa ro Roma yum. Jõ taja ait raa ro Roma!"

²⁹ Ana mari feto si fo raa sbe weto bitsre ait tna mayõ ana fooh mamu. Tna bi yabi refi simbyar yrok yhar yawe riwai ait ybis sre raa make Paulus yatem fo tibyo ait yrok waa ye.

Raa manes ro Yahudi hre mtu srah ro Paulus

³⁰ Aban mana retait yawe yhar bo ro raa Yahudi mkyas mai k'Paulus. Rabu to, ait ytu raa mabi ro *agama* Yahudi mama siret su. Ana ro mama to, *imam* manes msya raa manes ro ja mtu safo raa wana sor to. Tna ait ybis raa wait yawe, "Namo tufrok Paulus ybam *bui*. Tna nakah ait nama re kbe amu nkyas bo ro ait yno!"

23

¹ Paulus yasu yrom raa manes ro Yahudi weto sor tna saak ait wa yawe, “Tao na: Allah yhar yawe jō fi raa ro ja tno bo ro Ait yawe to, tno mkah thaf ro moof sai yoyo.”

² Paulus ykyas bo feto tibyo *imam* ro yase ybis raa ro mros kene mam Paulus to, yawe mai ait yasoh. *Imam* ro yase retait yasom Ananias.

³ Tna Paulus yawe k’Ananias yawe, “Allah kbe yai nyō ska riryōn! Nyō hre mam befo beah srah ajō mkah Watum ro Musa ykom. Menohe nyō nesait niwana Watum reto mkah bo nbis raa mai jō. Nyō namo sroyō sai meto!”

⁴ Raa ro mros mam weto mawe k’Paulus mawe, “Ait retait *imam* yase ro Allah ysok! Nawe kair ait ma!”

⁵ Tna Paulus yawe, “Kmo ma; jō wase. Jō thar tawe bi ait yamo *imam* ro yase fee. Bokom ro Allah mawe,

‘Nmus aban mana ro ja ybo anu to ma.’ ”

Keluaran 22:28

⁶ Paulus yhar yawe raa ro hre ytu srah rait weto, bonaut wana to hayah-hayah. Ana taro mbo bonaut raa ro *Saduki* tna ana taro mbo bonaut raa ro *Farisi*. Tna ait yhar yawe ja ana miranya fee. Feto to ait yawe, “Tao na wojō; jō fi raa ro *Farisi* tna jō taja tait raa ro *Farisi* ye. Jō tkyas bo tawe raa ro mhai to meen me mrok masen. Bonaut reto oh mi raa mfot jō mtu srah fo!”

⁷ Ait yawe bo feto si fo raa ro *Farisi* msya raa ro *Saduki* mayō mafa anya. Tibyo raa makin wefo mrok mitwat mkbair ewok ye.

⁸ (Raa ro *Saduki* matak sai mawe raa ro mhai to meen mrok masen fee. Tna mawe ja *malaikat* aro fee ye. Tna mkyas mawe ja kabes aro msya har aro bo fee ye. Menohe raa ro *Farisi*, ana mawe bo weto beta mabo ye.)

⁹ Ana santri bo weto mno mmai mnin-nin toni. Tna raa *Farisi* mabo baro ro mammo *guru agama* ro Yahudi ye to, masen mros. Tna mkyas bo matak k'ana ro mtu srah mawe, "Bi ait refi yno bo ro mkair aro fee! Nno be har soh mfe, *malaikat* bo aro mkyas bo k'ait!"

¹⁰ Raa masen mmak msai toni tibyo aban mana raa sbe retait yrok waa ynaut yawe, "Ayoh ee! Kbe raa mai-a Paulus bo ye." Tibyo ybis raa sbe yawe, "Nmo nbo Paulus nkah ait nmo truk snek mato oh!"

¹¹ Rabu ti naut *Tuhan* Yesus frok nenat yros mam Paulus yajoh jaro. Tna yawe, "Waa ma. Tiwya nyō nkyas Jō tasom mam Yerusalem. Tna kbe nyō namo nkyas Jō tasom mam Roma ye."

¹² Rabu ti to raa ro Yahudi baro saim bo mawe, "Nma, anu bme Paulus yajat. Tna anu beta bhau bo biit ye. Bhau bo biit mammo snok ati ro anu bme ait. Tna fo anu biit bo msya bta aya bo u."

¹³ Ana ro saim bo su weto mabo 40 bo fetu.

¹⁴ Ana masen mammo mo *k'imam* manes ro *agama* Yahudi, msya raa mabi wana mawe, "Amu saim bo nwe nme Paulus yajat. Tna amu beta nwe kbe amu niit bo aro fee tna nta aya fee ye. Kbe amu nyas bo niit mammo snok ati ro amu nme ait yajat.

¹⁵ Fetu to amu nwe anu nsya raa manes ro ja mtu safo raa Yahudi to, anu nkom aam sau ntim mammo't aban mana raa sbe. Nkom nwe ait yakah

Paulus yama yo k'anu u. Nwe anu niso h nmat srah reto kaket. Nkom fetu tna amu huwya mam iso ro mamu't snek rana reto. Tna kbe raa makah Paulus mama mbam snek. Ana snok mam befo fefares, amu huwya nme ait yajat wia."

¹⁶ Menohe Paulus yamu ro yano mabe sait yari bo raa ro Yahudi saim fetu. Tna ku retait yamo't tok raa ro sbe reto tna ykyas bo reto k'yamu Paulus.

¹⁷ Paulus yari fetu tibyo ytu raa sbe ro yase sait yama tna yawe k'ait yawe, "Nakah ku refi namo no k'aban mana ranu. Ku ait refi yawe ykyas bo k'bi ait."

¹⁸ Raa sbe retait yakah ku ait yamo yo k'aban mana raa ro sbe tna yawe, "Paulus ro yhau mam *bui* yawe jō takah ku refi tama to k'nyō re yber kait bo aro k'nyō."

¹⁹ Aban mana retait ybo ku retait yatem yakah yamo't amah majoh jaro tna ytu bo k'ait yawe, "Nyō nawe nkyas bo bawya k'jō?"

²⁰ Ku retait yawe, "Raa ro Yahudi saim bo mawe kbe mame Paulus yajat. Mawe kbe mama mayoh k'nyō re menrabu nyō nbis raa makah Paulus mamu sia no k'raa manes wana ro ja mtu srah. Ana sioh mawe mtu ait yamo mkah bo mtu srah rait reto kaket ye.

²¹ Menohe ana mabo 40 saim bo mawe mmyōt mam iso maka huwya mame Paulus meto. Fetu nari bo ro raa wetu mawe ma! Ana beta saim bo mawe soh ana mame Paulus fefares to, masi mawe ana mait bo fee ye. Mfo wefo ana siwyan wea oh, huwya mari bo k'nyō sai."

²² Aban mana retait yawe ku tna retait yawe,

“Nkyas bo refo k’raa aro ma. Tna nkyas nawe bo nyō nama mam befo tna nber kait bo refo k’jō oh to ma.” Tna aban mana retait ybis ku retait hah ye yamo bait.

Paulus raa makah mamō mo k’gubernur Feliks

²³ Tna fo aban mana raa sbe retait ytu raa sbe ro mase mabo ewok yawe mama. Ana mama tna ait ybis ana yawe, “Nmo nbis raa sbe wanu mabo trion 270 siwyan ana. Nbis ana weto mabo 200 moo sawya wana mbo. Tna nbis ana mabo 70 maut *kuda*. Nbis ana siwyan bo wana fooh mkah bo anu nsen nmo. Tna mti refo mam ayō ro krenjiit to, nmo’t *kota* ro Kaisarea.

²⁴ Nkah Paulus nmo kaket. Nkah ait nmo no *k’gubernur* Feliks mam Kaisarea. Tna noo *kuda* sau mkah bo kbe Paulus yaut ye.”

²⁵ Aban mana raa ro sbe retait yasom Klaudius Lisias. Tna ait ykom aam sau mawe fefo:

²⁶ “*Gubernur* Feliks ro yase: Jō tmah meen k’nyō.

²⁷ Raa refi yasom Paulus. Ait refi fi raa ro Yahudi saim mfot tna mawe mame. He mfe. Jō tari he ait raa ro Roma. Feto tibyo jō tsya raa sbe ro jō tbis to, nmo nno wa.

²⁸ Jō tawe saso thar safo masmaid ro raa maun ait kaket. Tna re jō takah ait tamo to k’raa manes ro ja mtu srah raa ro Yahudi weto to.

²⁹ Jō hre tari bo ana mtu srah rait. Ana maun Paulus mawe yiwer Watum ro *agama* rana sai. Tnaut tawe ait yiwana watum ro Roma aro fee. Ana mawe jō tbis raa mno bo ro mkair mai k’ait. Mawe jō tbu ait mam *bui* tna tbis raa mame ait yajat. Menohe jō tkai safo aro re tmit k’ait fee.

³⁰ Tna fo jō tari raa ro Yahudi saim mawe mame ait yajat. Au oh mi jō too ait beruk yama yo k'nyō fo. Tna jō tbis ana ro maun boun k'ait weto mama mkyas bo k'nyō ye."

³¹ Aban mana raa sbe ykom aam reto mkak. Tna mam wore wo mamur, ait ybis raa ro sbe masen makah Paulus mamō mno bo riwai ait ybis k'ana. Mti reto ana mamō snok si remo ro Antipatris.

³² Tna rabu ti fo, raa sbe ro mamō maa sai mhah mamō't snek raa ro sbe. Tna raa sbe ro maut *kuda* msya Paulus mamō renti mamō.

³³ Ana wefo mamō snok si mam Kaisarea. Tna moo aam reto mee *k'Gubernur* Feliks tna moo Paulus msan k'ait ye.

³⁴ *Gubernur* Feliks ymat aam reto mkak. Tna ytu k'Paulus yawe, "Nyō ja nhau mam oo ro hayo?" Tna Paulus yawe, "Jō fi raa ro Kilikia."

³⁵ Tna Feliks yawe, "Feto kbe soh raa ro maun boun k'nyō mama snok si mam befo to, kbe jō ttu srah anyō." Tna ait ybis raa sbe wait makah Paulus mamō kmot ait mam amah mase ro *raja* Herodes.

24

Raa ro Yahudi maun Paulus

¹ Ti ro maat tna raa *agama* Yahudi ro maun baun k'Paulus mbam Yerusalem mamō sia tna snok mam Kaisarea. Ana weto oh mi *imam* rana ro yase tait yasom Ananias, ysya raa mabi ro Yahudi taro sor, msya raa sait ro yasom Tertulus. Ait yamo raa ro ja ykyas bo soko raa mabi ro Yahudi. Snok mam Kaisarea tna ana beta mamō

mo *k'gubernur* Feliks. Ana mkyas bo ro ana maun boun k'Paulus.

² Bi Feliks hre ytu sas safo to, tna ait ybis raa mamō mmen Paulus makah mama. Tna fo Tertulus yasen yaun Paulus yawe k'bi Feliks yawe, "Bi *gubernur* ro anu hartu; nyō nbo rabin refo moof toni. Rabin refo kbum sai: Raa ro mamō byoh mama mame anya msya anu fee. Tna ja nyō nbis raa misoh remo wanu sor to, reto moof toni ye.

³ Bo wetō beta to ro nyō nisoh mam woyō-woya to, amu nyoh asik mase toni k'nyō.

⁴ Jō tkyas bo miyō fee. Jō soh-soh nyō re nari bo ro jō betoo k'nyō to baro rere.

⁵ Amu nnaut nwe Paulus refi yno bo ro mkair toni. Mam woyō-woya sai ait yamo to, ait yno raa ro Yahudi mrok kmo. Tna ait yamo aban mana raa mkbair sau ro kro Yesus ye. Yesus, Ait raa ro ybam remo ro Nasaret.

⁶ Tna ait yawe yber hasyoh Samu Allah ro mbau reto ye. He mfe amu nfot ait fooh. Tna amu nwe ntu srah rait mamyot watum ramu raa ro Yahudi.

⁷ Menohe mfe, aban mana raa sbe ro yasom Lisias yno wa. Ait ytak Paulus tna ybis amu ro nuun boun k'ait to, yawe nma no k'nyō mam befo.

⁸ Mfo refo amu ksoh nyō nesait ntu safo ro amu nuun boun k'ait to, nari. Tna kbe nyō nhar bo mabo ye."

⁹ Raa Yahudi taro ro hre mam beto to masen tna mkyas bo maun Paulus ye. Tna ana mawe bo ro Tertulus riwai ykyas to, mabo oh.

¹⁰ Raa ro *agama* Yahudi wetō mkyas bo mkak.

Tna bi Feliks yawe Paulus ykyas bo riryōn. Tna Paulus yawe, "Taja; jō thar tawe nyō namo raa ro ja hre susai ntu srah mam rabin refo fo, tii ooh-oh. Feto oh jō ksoh bo saak ajō tama betoo k'nyō fo.

¹¹ Nyō nhar nawe tiwya ti trion 12 wia to, jō tamo't Yerusalem tawe skabuk.

¹² Tna raa ro Yahudi wefo ana sait bo fri jō tno bo ro mkair aro fee ye: Jō santri bo tsya raa fee. Tna jō tno re raa mno mnin-nin bo fee ye. Ana mmat jō tno bo ro mkair mam Samu ro Allah fee ye. Tna tno raa mam samu watum kmo fee ye. Thau mam Yerusalem iti to, tna tno raa mnin-nin mam woyō-woya sai aro fee ye.

¹³ Ana maun jō menohe ana mmat tna mhar mawe bombra ro ana mkyas mai k'jō weto to, sau mabo fee ye!

¹⁴ Jō tawe k'nyō abyō tawe, jō smot Allah ro amu hohos ramu ja smot ye. Menohe Jō kro iso ro bi Yesus tiwya yerif. Reto oh mi mno ana kmo. Raa ro Yahudi wefo mawe jō tno mkair meto. Menohe jō kro Watum ro Musa beta kakat tna tari bokom ro Allah ybis *nabi wAit* mama mkom beta to, tbo tno kakat fares ye.

¹⁵ Jō smot Allah mnan anya ye mfi ana wefo ye. Jō tsya ana beta ninaut nwe raa beta ro mhai to, meen Allah yno re anu be brok bsen: Raa ro mno bo mkair ye, msya raa ro ja mno bo moof ye.

¹⁶ Feto oh mi ja jō thau tisoj jō kakat afo re thaf moof tsya Allah yoyo tna thaf moof k'raa anya yoyo bo ye.

¹⁷ Tii ooh-oh jō tamo't Yerusalem fee. Tna fo jō

tamo't beto mkah bo takah pitis baro tee k'raa Yahudi ro kinyah. Tna tawe tamo tsan bosan k'Allah ye.

¹⁸ Feto to jō twok mam Samu ro Allah. Mam wore jō tno bo weto kri-kri to, raa ro Yahudi baro mama. Ana mama mfri jō mam Samu ro Allah. Tno bo wojō mam Samu ro Allah reto to, riwai jō tyon tetsu ajō mamyot bo mafa ramu raa ro Yahudi oh to. Tna mam weto ye tesait thau kar. Raa aro makin msya jō bo fee. Tna raa aro mno mmai bo fee ye. Tna tnaut tawe raa ro Yahudi mabo baro mbam rabin ro Asia mama mam ati reto ye. Ana weto mamus jō saah. Bokyas rana oh mi misti re raa mmai to.

¹⁹ Soh ana weto mama't befo mi, ana oh mi kbe maun jō tna mkyas bo k'nyō.

²⁰ Menohe ana weto mama fee. Feto nbis raa ro hre mam befo mesait mkyas safo bawya ro tber mai k'ana meto! Taa wore raa manes ro Yahudi ytu srah to, ana mkai safo makan aro fee!

²¹ Tnaut tawe ana kmo bo sau ro jō tkyas k'ana tawe, 'Jō smot tawe raa ro mhai to, meen me mrok masen.' Au oh mi raa maun boun k'jō fo. Bokyas reto mno re ana kmo anya tibyo ana mesait mrok mkyas mnin-nin!"

²² Tiwya bi Feliks yari Yesus yasom oh. Tna ait yyum srah reto matim tna yawe, "Srah ro jō ttu fo mnan oh. Jō ksoh tawe bi Lisias ro yamo aban mana raa sbe kbe yesait yama ybam Yerusalem. Tna fo jō tkyas srah refo mkak oh."

²³ Tna ait ybis raa sbe ro yase sait yawe, "Nabe Paulus menohe nbu ait mnan-nan sai. Tna raa ro mama moo bo mee k'ait to, nno wa ana ma."

²⁴ Ti baro firwas tna bi Feliks yama ysyā yfain. Au masom rau Drusila. Tna au to fnya ro Yahudi. Feliks ybis raa sait yamo ytu Paulus yama. Paulus yama tna ykyas Yesus *Kristus* yasom rAit. Paulus ykyas bosmot rait reto tna Feliks hre yari.

²⁵ Tna Paulus betoo iso ro Allah yno raa mamō mato mboh. Tna yawe Allah yawe raa misoh ana kaket tna re mno-na bo ma. Tna ykyas wore meen Allah beah srah k'raa beta. Yari bo weto to, Feliks yrok waa yawe, "Mnan oh, namo oh. Ti aro tna kbe jō ttu nyō hah nama nkyas bo k'jō u."

²⁶ Mam weto ye Feliks ait srau ynaut yawe, "Kbe Paulus yoo pitis aro yee k'jō fe mfe a?" Feto oh mi yhau ysuk ytu Paulus yama ysyā ait mkyas bo to.

²⁷ Paulus raa mbu *tahun* trion ewok oh. Tna fo Perkius Festus yamo *gubernur* mam rabin ro Kaisarea shauk yuk ro Feliks riryōn. Feliks yawe yoo raa ro Yahudi mhaf rana. Feto to ait sayō Paulus yhau sai mam *bui*.

25

Paulus yawe yakah srah rait yaut yamo't samu srah ro uu naut

¹ *Gubernur* Festus snok mam *provinsi* reto. Ait yhau ti tuuf tna ait ybam *kota* ro Kaisarea yamo yut *kota* ro Yerusalem.

² Mam weto to *imam* manes ro *agama* Yahudi msya raa mabi wana sor mama mo k'bi ait tna mkyas Paulus. Ana maun boun Paulus tna mayoh k'Festus mawe,

³ “Bi yabi: Amu ksoh nyō nbis Paulus raa makah mama’t Yerusalem.” (Raa weto ana saim bo mawe kbe raa huwya mame Paulus yajat iti mam iso maka).

⁴ Menohe Festus yawe, “Mfe, Paulus mfo refo raa mbu mam Kaisarea. Kbe jō tesait hah te tamo’t beto ye.

⁵ Feto to, nbis raa manes wanu baro kro jō. Tna bmo sia Kaisarea btu srah refo k’Paulus mam beto. Soh ait yber safo to, kbe too safo mana tmit k’ait.”

⁶ Festus yhau mam Yerusalem ti baro krentuuf *atau* saa bo feto. Tna ait hah ye yamo’t Kaisarea. Rabu ti fo ait ytu srah tna ybis raa mam mmen Paulus makah mama’t samu ro srah reto.

⁷ Ati ro Paulus yama snok mam beto to, raa Yahudi ro mama mbam Yerusalem sor to, mros mur mtan kait tna maun boun ro fanes mawat mai k’ait. Menohe ana aro mtai mros merif boun mabo sau kaket bo fee ye.

⁸ Tna Paulus saak ait wa yawe, “Jō tno bo ro mkair aro tber hasyoh Watum ro Musa fee. Jō tiwana Samu ro Allah aro fee. Tna tiwana bi Kaisar fee ye.”

⁹ Menohe Festus yawe yayoh raa ro Yahudi mhaf tibyo ait ytu k’Paulus yawe, “Fyi, nyō ksoh namo’t Yerusalem tna kbe jō beah srah anyō mam tno fe mfe a?”

¹⁰ Menohe Paulus yawe si yawe, “Mfe, jō fi *warga negri* Roma: Raa ro bi Kaisar ja ybo kmot. Feto to yuk refo oh mi mnan oh mkah bo raa mtu srah ro k’jō to; tabam raa ro Yahudi fee. Taja, nyō nesait nhar oh jō tno bo ro mkair aro mai k’raa ro Yahudi fee.

11 Soh jō tber safo ro mkair afo saah feto ee, jō too tetsu ajō tsan k'raa mame tajat rof fea! Menohe boun ro raa maun jō to, mabo aro fee. Feto kbe raa mbis jō kbik-kbak msan k'raa ro Yahudi to ma, re kbe ana mtu srah ro k'jō fee saut ye. Jō tayoh *k'raja* Kaisar ro yase afo re kbe ait yesait ytu srah refo."

12 Bi Festus ykyas bo su ysya raa manes wait. Tna ait yawe k'Paulus yawe, "Nyō nayoh nawe bi Kaisar yesait oh kbe ytu srah anyō to, feto to jō tbis nyō namo't Roma afo kbe bi Kaisar ytu srah refo."

13 Ti baro naut fo *raja* Agripa ysya yfain fai Bernike mbewok mama't Kaisarea tna mmah meen *gubernur* Festus.

14 Ana mbewok mhau ti baro mam beto. Tna Festus ykyas srah ro Paulus k'ana yawe, "Raa ro tiwya *gubernur* Feliks ybu sait yhau mam *bui* fares.

15 Ati ro jō tamo thau mam Yerusalem to, *imam* manes ro *agama* Yahudi msya raa mabi wana maun ait. Tna mawe jō tno bo ro samyoh mai k'ait ye.

16 Menohe jō tawe k'ana tawe, 'Amu raa ro Roma ja nno feto fee. Raa mtu srah raa retait wia. Tna kbe ait retait saak ait wa re kbe raa ro maun ait mari wia. Tna fo raa moo safo mana mmit. Ana mno bo weto mkak wia. Tna fo ana moo raa retait msan k'raa ro maun boun to, sikowah ait.'

17 Tawe feto, tna raa manes ro Yahudi weto mawe kro jō mama't befo. Tna rabu ti fo jō tbis raa mammo mmen Paulus makah mama yros saak ait wa wore amu beta hre nri.

18 Jō trok tawe kbe ana maun ait retait mkah safo ro samyoh toni, menohe mfe.

19 Raa mros maun ait to, mkyas bosmot rana sai; bonaut Paulus ysa ana to hayah sai. Tna ana mkyas bi sait ro yasom Yesus ye. Raa retait tiwya yajat oh. Menohe Paulus yatak sai yawe bi retait yhai tibyo fee. Yawe Ait ye yrok yasen oh.

20 Jō tnaut mamome ye tawe, 'Fyi re kbe jō ttu safo refo thar fo?' Tibyo jō ttu k'Paulus tawe, 'Nyō ksoh namo't Yerusalem tna kbe jō beah srah anyō mam kota reto fe mfe a?'

21 Menohe Paulus yayoh yawe safo reto ait yakah yaut yamo't samu srah ro uu naut. Tna yawe ait yhau mam bui mam befo wea ste raja Kaisar ro yabi ytu srah rait. Feto jō tthis ait twok bui tna jō saso wore mre aro afo re tthis ait yamo yo k'bi Kaisar mam Roma."

22 Tna raja Agripa yawe k'gubernur Festus yawe, "Jō ksoh tari bo ro bi retait ykyas ye." Tna Festus yawe, "Menrabu jō ttu ait yama ykyas bo k'nyō nari."

23 Rabu ti fo raja Agripa ysa yfain fai Bernike myum bosnyam wana. Tna bewok masen mamot amah ro raa mtu srah reto mato. Tna raa manes ro kota Kaisarea msya raa sbe ro mase to, mama ye. Ana beta hre. Tna bi Festus ybis raa makah Paulus mama ye.

24 Tna Festus yawe, "Raja Agripa ysa raa ro mama siret mam befo msya amu sor fo: Nmat bi ait refi. Raa ro Yahudi beta kmo ait. Raa Yahudi ro mhau mam Yerusalem msya raa ro mhau mam befo ye; ana mama mo k'jō tna mtutu mkah mai ro mase mawe, 'Kbe Paulus yhau

kait mam tabam refo ma! Nme ait yajat to!’

²⁵ Menohe jō tkai safo makan ro misti re ait yasu marak to, aro fee. Tna fo ait yesait yayoh yawe safo rait refo ait yakah yaut yamo yo *k’raja* Kaisar ro yase. Feto to, tawe kbe tbis raa makah ait mamō’t Roma.

²⁶ *Raja* Agripa, rabu refo jō takah Paulus tama befo fo; sik nyō nsya raa ro hre mam wefo beta ntu bo k’ait. Jō tawe tkom aam sau tiim bi Kaisar to, kbe betoo safo refo maja rau k’ait. Menohe jō srau tnaut safo makan rau ro kbe jō tkom to aro kaket fefares ye.

²⁷ Soh jō tiim Paulus yamo yo k’bi Kaisar ytu srah rait, menohe jō tkom aam ro maun ait aro fee, kbe raa masah jō sai.”

26

Paulus saak ait wa k’raja Agripa

¹ *Raja* Agripa yawe bo k’Paulus yawe, “Nasen nkyas bo saak nyō wa.” Tna Paulus yros yawe,

²⁻³ “Taja; nyō nno bo moof. Jō simaut mase tesait tkyas bo k’nyō kait. Jō saak jō wa boun ro raa Yahudi maun jō refo. Nyō nhar *agama* ro Yahudi tna nhar bo mafa wamu ro nno soo oh. Nyō nhar bo weto kaket tna nhar bo mabo rau ro ja amu nno santri anya bo ye oh. Jō soh-soh k’nyō tawe hre wia nari bo ro jō saak wa jō refo. Hrowyō ma.

⁴ Tiwya tinyi jō thau tsya raa mana wojō mam Yerusalem. Feto to raa Yahudi beta mhar jō, tna mhar bo ro ja jō tno taban tkek ye oh.

⁵ Ana tiwya mhar jō ooh-oh. Mhar mawe jō kro bonaut raa ro *Farisi* ye. Tna amu, raa ro *Farisi*

to, ja nhau nbo *agama* wamu ro Yahudi matak toni. Tna soh ana ksoh to, kbe ana mkyas bo weto k'nyõ ye, mawe mabo.

⁶ Jõ tinaut tawe bo ro Allah tiwya ysi k'amu hohos wamu akus to, meen Ait ybo yno. Bosi* reto to, tbo tna tnaut yoyo. Tna au oh mi jõ tasen tros tasom srah refo fo.

⁷ Raa mana wamu 12 beta ja mnaut bosu reto ye. Amu ja skabuk baas mti yoyo. Amu samyoh wer nno bo ro Allah yawe. *Raja* Agripa, jõ tinaut tawe bosu reto to, bo ro ati. Tna au oh mi raa wojõ ro Yahudi masen kmo jõ.

⁸ Tao na; fyi re anu ntu sioh ye nwe, 'Allah yatak re yno raa ro mhai mrok masen fee!' "

⁹ Tna Paulus yawe, "Tiwya jõ knait raa ro Kristen tawe tno bo ro mkair mai k'ana. Tiwya jõ takit, srau tna thaf mnan anya msya anu nkit tna nhaf wanu sor fetu ye.

¹⁰ Reto oh mi tiwya jõ tamo't Yerusalem to. Tna *imam* manes wanu mkom aam sau moo matak wana mee k'jõ. Ana mbis tna tamo tfot raa ro Allah wAit. Tna takah ana mawat tbu mam *bui*. Tna jõ tsya raa roto su tawe raa mame ana majat ye.

¹¹ Ti aro-aro jõ sikowah ana. Tamo't woyõ-woya sai saso raa ro Kristen. Jõ saso ana mam

* **26:6** Tiwya Allah ysi bo k'Abraham msya hohos wait. (Au oh mi raa ro Yahudi: Nmat Kejadian *pasal* 17.) Allah ysi yawe meen ana mhau mam wore wo Ait yamo *Raja* tna ybo ana. (Nmat Yeremia 31:31-34.) Tna yawe meen *Mesias* yama. Yawe *Mesias* retait kbe yamo Raa Sotak rana. (Yehezkiel 37:21- 27; Matius 26:28; Ibrani *pasal* 9.) Tna Allah ykyas yawe raa ro mhai to, meen mrok masen u ye. (2 Korintus *pasal* 3.)

samu skabuk sor ye. Soh tkai aro to, tfot tna tbis raa sikowah ana. Jõ tawe tno re ana mwaar Yesus tna beak bosmot wana makus. Jõ kmo ana msai toni tibyo jõ tasen tamo't rabin roto ye tna sikowah raa ro Kristen mawat."

¹² Paulus yawe *k'raja* Agripa yawe, "Ati sau to, *imam* manes mbis jõ tamo't *kota* ro Damsyik saka sikowah raa ro Kristen.

¹³ Tna wore baas ayõ mros susai bo feto to, jõ tamo mam iso maka kri-kri fo, jõ tmat naar ro kren mroh. Naar reto mawyah toni syok miwrek ayõ ro mafit to ye. Naar reto mroh mame mur mtan wore wo jõ tros msya raa ro kro jõ mros to ye.

¹⁴ Amu beta ntek nwe ni mam tabam. Tna jõ tari mai sau mame k'jõ timara mkah mai ro Ibrani mawe, 'Saulus, Saulus; fyi re rabu ti wawa nyõ nno bo ro mkair sikowah jõ yoyo sai feto to? Nyõ nno feto to nyõ nesait nari nyõ nham ai ye meto.'

¹⁵ Tna jõ ttu si tawe, 'Nyõ fi awya?' Menohe *Tuhan* yawe, 'Jõ fi Yesus ro ja rabu wawa nyõ sikowah.

¹⁶ Nasen oh! Jõ terif Jõ k'nyõ tawe tsok nyõ namo sryan aJõ. Kbe nyõ nno bo woJõ. Jõ tsok nyõ mkah namo nkyas bo ro riwai nyõ nmat wefo msya bo ro meen Jõ terif k'nyõ naut ye.

¹⁷ Jõ tbis nyõ namo nkyas Jõ tasom k'raa ro Yahudi msya raa mana roto ye. Meen ana mfot tna sikowah nyõ ye. Menohe Jõ kbe titsre nyõ nbam ana matem, tno riof k'nyõ.

¹⁸ Namu nkyas Jõ tasom k'ana feto tna kbe ana masu maah. Mbam wore wo mamur to, kbe ana mamu mhau mam arin ro moof. Tna kbe kabes

yabi (Iblis) yase ybo ana u fee. Tna kbe ana mamoo raa ro Allah ybo riryõn. Namo nkyas Jõ tasom k'ana afo re ana smot Jõ. Mkah bosmot reto kbe Allah yyon iro wana. Tna meen Ait yoo riof ro mase ysan k'ana ye. Ysan k'ana ysyaa raa ro Ait ysok mamoo raa wAit beta ye.' "

¹⁹ Tna Paulus yawe *k'Raja* Agripa yawe, "Bo ro tiwya Allah ybis jõ tno reto oh mi jõ tari tna tbo tno sai.

²⁰ Feto to tinyi rau to, jõ tasen tamo tkyas Yesus yasom k'raa Yahudi ro mhau mam *kota* ro Damsyik. Tna fo tamo to k'ana ro mhau mam Yerusalem, msya ana ro mhau mam *provinsi* ro Yudea beta. Ana beta to mbam raa mana ro Yahudi. Tna fo jõ tamo tkyas bo k'raa ro mbam raa mana roto makin ye. Jõ tkyas k'ana beta tawe, 'Nashana oh! Nma no k'Allah. Nno bo ro moof sai tna kbe raa taro mmat mhar mawe anu weto nashana tna nmo no k'Allah oh.'

²¹ Tkyas feto oh mi raa ro Yahudi taro hawe. Ana mfot jõ mam Samu ro Allah mawe mame jõ tajat.

²² Menohe Allah yatmof jõ re jõ thau fares fo. Tibyo jõ thau tkyas Ait yasom k'raa beta. Tkyas k'raa kinyah ye tna k'raa ro mase ye. Tna bo ro jõ tkyas wefo fo mamoo mamyo bokyas ro tiwya Allah ybis *nabi* na msya Musa mama mkyas wia ye. Tiwya ana mawe,

²³ 'Meen *Mesias* yama. Tna kbe raa sikowah Ait tna mame Ait yajat ye. Tna fo kbe Ait yrok yasen. Ait tait Raa ro kbe yrok yasen to, tinyi wia yatim. Kbe yakah kek ro *Tuhan* yama. Tna raa mana rAit ro Yahudi msya

raa mana roto ye kbe mmat kek reto.' "

Yesaya 42:6, 49:6

²⁴ Paulus betoo bo weto saak wa ait kri-kri fo, tna Festus yawe mkah ymai ro mase yawe, "Paulus; nyō nker meto a? Ja nyō nkom bo wer. Tna bohar mawat ro nhar weto mno re nyō nker meto a?"

²⁵ Menohe Paulus yawe, "Taja ro yase, jō takit ajō moof sai. Bo ro jō tkyas fo mabo tu oh.

²⁶ *Raja* Agripa ait yhar bo ro jō tkyas refo ye oh. Feto tna tkyas bo refo abyō k'bi ait fo. Bo wefo tiwya raa mno wai fee. Raa beta mmat tna mhar oh. Bi ait yari bo weto ye oh.

²⁷ *Raja* Agripa; fyi: Ja nyō nari bo ro tiwya Allah ybis *nabi* wAit mama mkyas fe mfe a? Jō thar tawe nyō niwana bokyas wana weto fee."

²⁸ *Raja* Agripa yawe k'Paulus yawe, "Nyō nnaut nawe bo ro nyō nkyas fo, kbe mno jō tawe smot tna kro Yesus ye a?"

²⁹ Paulus yawe, "Jō skabuk Allah afo re nyō haberek namo raa ro Kristen. Tna raa ro mari bokyas ajō fo ye. Soh ana mammo raa ro Kristen mam mfō wefo moof ye. Tna soh ana mammo mnan jō meen rere bo to moof ye. Menohe jō hawe bo ana raa mfot mbu mfi jō tiwya raa mfot mbu to."

³⁰ Paulus ykyas bo weto mkak. Tna *raja* Agripa, *gubernur* Festus ysya Bernike msya raa makin ro hre msya ana su weto beta masen mammo.

³¹ Wore ana frok kri-kri to, ana mkyas bo k'anya mawe, "Paulus retait yno bo ro mkair fee. Bo ro yno to safo fee. Nno be raa moo safo mmit k'ait ma. Nno be kbe raa mame ait yajat ma!"

³² Tna *raja* Agripa yawe k'*gubernur* Festus

yawe, “Paulus yno bo ro safo aro fee. Feto to, jō ksoh bitsre ait yamo sai bait. Menohe mfe, ait yawe yakah safo refo yaut oh. Soh feto to bi Kaisar yesait aran ro yatak bitsre ait sai.”

27

Paulus yaut kapal yamo't Roma

¹ *Gubernur* Festus ysan Paulus k'raa sbe sait ro yasom Yulius mkah kmot ait. Yulius tait raa sbe ro yase sait ro mbam raa sbe mkbair ro *raja* Kaisar ja ybo. Bi Festus ybis Yulius yawe ait ybo Paulus ysyra raa ro mhau mam *bui* baro to, kmot ana. Kmot ana tna yakah ana mamō't *provinsi* ro Italia. □Tna meen raa mmit safo wana weto mam *kota* ro Roma.□ Feto to, ti baro naut amu* nsen nmo nuut *kapal*.

² Amu nuut *kapal* sau ro mbam joh ro Adramitium mama. Tna kbe mamō't joh aro ititi mam rabin ro Asia to mamō. Bi sait ro yasom Aristarkhus ysyra amu nmo ye. Ait tait raa *provinsi* ro Makedonia sait ybam *kota* ro Tesalonika. *Kapal* reto masen mamō masyō amu.

³ Tna rabu ti fo, amu snok mam joh ro Sidon. Yulius fi yno bo moof k'Paulus: Ati ro *kapal* reto mros mam beto to, ait bitsre Paulus yroh yamo ymat yafoh na wait wea. Tna yafoh wait weto moo bo mee k'ait. Tna Paulus hah ye yamo't *kapal*.

* **27:1** Mam Kisah 16:10-17, 20:5-21, 27:1-28 to, bi Lukas ykom yawe 'amu.' Raa mnaut mawe ti aro-aro Lukas kro Paulus ysyra yafoh na mamō msya ana su.

⁴ Tna *kapal* reto masyõ amu nbam Sidon nmo fo, foos mase mfi mama. Tibyo raa ro mbo *kapal* reto makah amu nmo nwyang sato ro Siprus afo re figyõm ro sawan mai *kapal* fee.

⁵ Tna fo amu nhoh nmo sawan maam *provinsi* ro Kilikia msya rabin ro Pamfilia to nmo tna snok mam joh ro Mira mam *provinsi* ro Likia.

⁶ Amu nroh mam remo Mira. Tna raa sbe ro mbo amu ykai *kapal* sau mbam *kota* ro Aleksandria kbe mamõ't rabin ro Italia. Ait ybis amu nmo nuut mam *kapal* reto.

⁷ *Kapal* ro masyõ amu nmo rere sai. Amu nmo, nmo. Tna raa ro mbo *kapal* reto mawe nmo kene mam *joh* ro Knidus. He mfe. Foos mase mfi msai toni tibyo amu nmo to hrowyõ nhai. Tna ana makah *kapal* mamõ iso ro ana mawe mamõ reto tu fee: Amu nmo twat aya mastu ro Salmone afo kbe sato ro Kreta burut wa foos.

⁸ Amu hrowyõ oh nmo niwrek tabam makit reto tna nmo snok mam yuk ro masom 'Joh ro Moof' to kene mam remo ro Lasea.

⁹ Amu nhau mam beto ste foos mnem wia. Amu nhau, nhau tna ti ro Korat ro *Puasa* firwas. Tna amu nhau mam joh reto fares. Mam snyi reto to, ja foos msya figyõm mase toni. Tna Paulus yawe k'raa ro mbo *kapal* reto yawe,

¹⁰ "Tao na; soh anu beroh bmo renti to, kbe anu bkai bo ro msai toni mam sawan. Kbe figyõm ro mase refo mno bosatoh msya *kapal* refo surun marak. Tna kbe anu bsu bkak ye!"

¹¹ Menohe raa sbe ro ybo ana tait, yari Paulus fee. Ait yari ana mbo *kapal* reto mkyas sai.

¹² *Snyi* reto foos msya figyõm mase toni. Tna

ana mhar mawe joh reto mnan fee. Feto to ana makin ro mbo *kapal* reto mawe, “Kbe anu bito bmo renti tna snok mam remo ro Feniks tna bhau mam beto mam wore nsoo ro foos mfi to.” Remo ro Feniks mhau mam sato ro Kreta mam ati ro burut wa foos.

¹³ Tibyo ati ro foos mfi mbam ati ro *selatan* to ana mawe, “Nbis raa skur too ro *kapal*! Anu bsen bhoh bmo naut!” Feto tibyo amu nsen nhoh sawan maam ro sato Kreta to nmo.

¹⁴ Ana mammo baro kait fee, tna oof ro mase toni syok mfi mbam tabam ati ro *timur* to frok mama.

¹⁵ Oof mfi mbam ati ro *kapal* mammo to. Oof reto mai *kapal* tibyo amu bito nmo fee ye. Feto to amu bitsre *kapal* reto mhau soso mammo-me sai.

¹⁶ Amu soso nmo kene mam sato maku sau ro masom Kauda. Sato reto burut wa foos. Tna raa hrowyō mhai tubat *sekoci* ro raa make mne to, tubat maut mse mam *kapal* mato refo.

¹⁷ Ana tubat *sekoci* reto mse mam *kapal* mato. Tna fo ana moo too make *kapal* mne reto kaket matak afo re kbe figyōm mai renti habah ma. Tna ana waa mawe kbe *kapal* soso mammo tna mai habah mam snik mana ro Sirtis. Ana smyoh bo mabat ro mi *kapal* reto tna mitsre, afo re foos mai *kapal* reto soso mammo rere baro sai.

¹⁸ Figyōm reto mai amu msai toni. Tna rabu ti fo raa masen tubat bosatoh ro *kapal* reto masyō. Bosatoh weto mkah kbe raa masim fo, raa tubat beak mam aya afo re *kapal* mnan-nan.

¹⁹ Tna ti ro tuuf fo ana tubat *kapal* mtai-ta taro beak mam aya ye.

²⁰ Amu nhau ti baro mase ye oh to, snyi mboh

fee ye, tna sken mkek fee ye. Foos aya msya figyōm to mai tu feto oh. Amu nrok nwyān marak nwe kbe amu nsu nkak bamu sai oh.

Kapal mako mam fraa

²¹ Ti baro ye oh raa weto mait boit fee. Tna Paulus yros susai k'ana yawe, "Tao na; taa anu nri bo ro jō tawe mi anu bsen bhoh bbam Kreta bmo bkai bo ro msai toni mam sawan fefo fe kbe *kapal* refo mkai bo msya bosatoh wanu surun marak oh.

²² Menohe waa ma, kbe anu sait bo ysu fee, soh *kapal* refo saah.

²³ Allah ja ybo jō tna jō tari tno bo rAit. Ti sai Ait ybis *malaikat* sau mama mo k'jō mawe,

²⁴ 'Paulus; waa ma. Nyō kbe namo no *k'raja* Kaisar. Allah yatmof yno re nyō nsya raa wefo beta kbe nkai riof ye.'

²⁵ Feto to, waa ma. Jō smot Allah tna thar tawe bo ro yawe to, kbe mabo.

²⁶ Anu beta kbe nkai riof. Menohe *kapal* refo kbe foos mai mso mamō't sato sau tna kbe mako mam fraa."

²⁷ Figyōm mai amu ti trion 14 mkak oh. Tna amu soso nmo-ne sai mam sawan ro Adria to fares. Tna mam arin masuf raa ro mbo *kapal* reto mari he ana mamō snok kene mam mne oh.

²⁸ Tibyo ana moo too mi fraa tna mbero mam aya, mawe mnit uun rau. Tna ana mmat he aya sawan mam yuk reto to, uun 40 *meter* sai. Ana hre baro tna masen moo fraa ro mi too reto mbero mnit aya naut u. Tna mmat he aya uun rau 30 *meter* bo feto.

²⁹ Ana waa mawe nno be *kapal* reto mamō mako mam fraa. Tibyo ana tubat *jangkar* trion

jiit mam *kapal* tis, mruk mam aya. Tna ana hre mnaut mawe bo mno re reen fooh ee a.

³⁰ Tna raa ro ja mkah bo ro *kapal* reto to, baro saim mawe msyōf *sekoci* reto masen msam wai sikba *kapal* reto mamō. Ana tubat *sekoci* reto mse mam aya tna sioh mawe, “Amu nuut *sekoci* refo nmo bero *jangkar* mbam *kapal* mana wia.”

³¹ Menohe Paulus yawe bo k’bi Yulius ysysa raa sbe wait yawe, “Soh raa ro mbo *sekoci* reto masen msam mamō to, kbe anu raa ro bhau mam *kapal* refo fo sait bo ykai riof fee ye.”

³² Feto to, raa ro sbe ofo masen sbi too ro *sekoci* reto afo re *sekoci* reto mso mamō makus.

³³ Rabu konok to, Paulus yawe k’ana yawe, “Niit boit oh! Ti trion 14 mkak oh anu nhau waa yoyo sai, tibyo anu niit bo aro kaket fee ye.

³⁴ Tawe anu niit boit kebet baro afo re kbe ntak. Tna waa ma. Anu bsu marak bo fee ye.”

³⁵ Paulus ykyas bo wetō mkak si fo yasen yoo *roti* tna yayoh asik mawat k’*Tuhan* mam wore ana masu mmat beta. Tna ait haber *roti* reto yait.

³⁶ Ana mmat fetō mrok simaut baro tna hre mait boit ye.

³⁷ Amu ro nhau mam *kapal* mato reto nbo trion 276.

³⁸ Ana mait boit mhaf matu oh. Tna fo raa masen tubat *gandum* ro mhau fares mkah kbe raa masim to, beak mam aya afo re *kapal* reto mnan-nan mamō.

³⁹ Rabu momo to, ana mmat sawan maam ro snyik mana kene oh. Menohe ana wase rabin reto fares. Ana mawe makah *kapal* reto mamō’t mne reto.

⁴⁰ Raa wetō masen sbi too ro *jangkar* fo, tibyo *jangkar* sruf akus mam aya. Mam wetō ye ana

misoh miin *kapal* reto, mno re mamō trot. Tna moo too make bo mabat ro *kapal* reto (*layar*) mros abyō afo re foos moo *kapal* refo beak mamō't mne.

⁴¹ Menohe *kapal* reto mamō mako mam snik mana sau. *Kapal* mana rau mako tibyo mnah baro bo fee ye, tna figyōm mai *kapal* tis fo habah.

⁴² Raa ro sbe wetō masen saim bo mawe k'anya mawe, "Anu bsen bme raa ro frok mbam *bui* wetō beta majat! Bi yabi retait ybis amu kmot ana kakēt, re kbe ana aro msam mamō fee. Soh ana sait bo yasen kni yamō to, kbe bi ait yame anu bjat ska riryōn!"

⁴³ Menohe Yulius ksoh Paulus tna yawe, "Nno fetō ma!" Tna ait ybis yawe, "Awya ro yhar bo kni to, busyok yame aya kni yatim wia yaut mne.

⁴⁴ Tna anu taro nbo *kapal* ftah kni nrof." Tibyo ana kni beta mamō maut mam mne mkah riof beta.

28

Raa beta mkai riof mam sato ro Malta

¹ Amu beta nmo snok mne nkai riof oh. Tna amu nrok nhar nwe sato reto to, sato ro masom Malta oh meto.

² Raa ro mhau mam sato reto mno bo moof toni syok k'amu. Ana huwya mtar amu tna misoh amu kakēt ye. Arin mkair re amu nfos toni. Tna ana mko tafoh re kbe amu nmo nni foos ye.

³ Paulus soo roko thauk tna yamō yawah roko wetō yko abyō mam tafoh. Ait yno fetō kri-kri fo, tafoh mafit aban sau ro mhau mato fo tibyo mham frok, tna mafit Paulus yatem.

⁴ Raa ro sato reto mmat aban reto mafit Paulus yatem kro feto, tibyo mawe bo k'anya mawe, "Tnaut tawe raa refi fi ja yame raa majat, menohe ait ykai riof sai mam sawan sai. Tna kabes sayō ait yhau yaam fee."

⁵ Paulus bes-baas aban reto mamō mait mam tafoh, tna Paulus yari ait yham bo baro fee tum.

⁶ Raa ro sato refo mnaut mawe rere baro feto Paulus yatem mrok mtun mase, tna kbe ait yatu btek yai mam tabam yajat. Ana mhau mwof baro kait oh. Menohe yatem moof sai; bo ro ana mnaut reto to, mabo aro fee. Tibyo ana me mnaut mawe, "Nno be bi ait retait kabes sait!"

⁷ Raa ro yase mam sato reto yasom Publius. Tna tabam rait mhau kene mam beto. Ait yitrah amah rait k'amu tna yno bo moof k'amu ti trion tuuf.

⁸ Mam ati reto to, Publius yaja kiyam. Ait yetsu mbe tna ysyō ksoh ye. Paulus yamo ymat raa ro kiyam retait. Tna skabuk yatem ytor abyō k'bi ait. Tibyo bi ait yrok kiyam marak ye.

⁹ Paulus skabuk raa retait yrok bros feto, tna bokyas reto raa mari faram ye. Tna raa kiyam taro beta mamō mo k'Paulus tna ait skabuk ana mrok bros beta ye.

¹⁰⁻¹¹ Tibyo raa ro Malta mno bo moof toni k'amu tna mayoh asik mase k'amu ye. Amu nhau mam sato reto snyi tuuf. Tna mam wore amu siwyan nuut *kapal* roto to, raa ro sato reto makah boit msya bo roto taro ye mama mee k'amu niit mam *kapal*.

Kapal sau ro tiwya mama mbam kota ro Aleksandria soso mam sato reto mam soo ro foos mfi reto ye. *Kapal* reto tiwya raa mfen mana

rau mfi *dewa* wana mabo ewok mawyan rana. *Dewa* mabo ewok ro ja ana smot weto to, masom Dioskuri. Tna amu nsen nmo nuut *kapal* nmo renti.

¹² *Kapal* reto nhoh nmo snok mam joh ro Sirakusa tna soso nhau ti trion tuuf mam beto.

¹³ Amu nbam beto nsen nmo renti nmo nwyang tabam reto snok mam joh ro Regium. Rabu ti fo, foos mfi mbam ati ro *selatan* tna ti ro ewok to amu snok mam joh ro Putioli.

¹⁴ Mam Putioli to, amu nroh tna nkai raa Kristen baro ye. Ana mabe amu nhau nsya ana mam beto ti trion krema. Tna fo amu nsen nmo iso mne nmo't *kota* ro Roma.

¹⁵ Raa Kristen ro mhau mam Roma mari bo amu nma kri-kri fo, tna baro masen mama't remo ro Apius (yuk reto ja raa mama masim bo) mkah bo mtar amu. Tna raa Kristen taro mama't remo ro Tres Taberne mkah bo mtar amu ye. Paulus ymat raa weto mama to, ait simaut mam yhaf mato tna yayoh asik mawat k'Allah ye.

Paulus yhau mam kota ro Roma ste raa mtu srah rait

¹⁶ Amu nmo snok mam *kota* ro Roma to raa ro *pemerintah* matmof Paulus mbis ait yhau mam amah sau ysya raa sbe sait ro kmot ait. Mbis ait yhau mam *bui* fee.

¹⁷ Paulus yhau masno tuuf tna ait ytu raa manes ro Yahudi mama siret su. Tna Paulus yawe k'ana yawe, "Raa wojō sor: Jō to tno bo ro mkair aro mai k'raa wanu fee. Tna tber kait bo mafa ranu ja hohos wanu mno soo bo to fee ye. Menohe raa mfot jō mam Yerusalem msan k'raa ro Roma. Tna makah jō mama't befo.

18 Raa mase mtu srah ajõ tna mkai safo mabo ro ana maun boun k'jõ to, aro fee ye. Tibyo ana mawe bitsre jõ tamo. He mfe.

19 Raa ro Yahudi matak wa sai. Feto oh mi jõ te takah srah refo taut tamo to *k'raja* Kaisar tna kbe ait ytu srah ajõ fo. Menohe jõ tawe abyõ tawe jõ tama't befo taun boun anu raa ro Yahudi fee.

20 Feto oh mi riwai jõ ttu anu nma no k'jõ fo. Tawe betoo bo refo k'anu. Anu raa ro Israel ja bwe *Mesias* ro Allah ysok yoo riof yee k'raa to, kbe yama. Jõ tnaut tawe fetu ye. Tna au oh mi raa mfot jõ makah mama't befo fo."

21 Tna raa ro Yahudi wetu mawe, "Amu nkai aam ro mbam rabin ro Yudea mkyas bo mkair ro nyõ nno bo aro fee ye. Tna raa sait ybam raa wamu wefi bo yama ykyas bo mkair ro nyõ nno bo to fee ye.

22 Menohe amu nri raa beta mawe kair bosmot raa ro Kristen oh. Tna amu huwya nri bo ro nyõ nesait nkyas."

23 Tna ana mmah oon mawe ti aro ana mama siret su u.

Tna mam rabu ro oon sboh to, raa msis-sas mama't amah ro Paulus yhau. Paulus huwya betoo bo k'ana. Ait ykyas wore wo Allah yamo *Raja* ybo raa mana rAit. Ait ykyas bo k'ana mamu snok hreha. Tna ait ykyas Yesus k'ana ye. Yawe Ait *Mesias* ro tiwya Watum ro Musa msya *nabi* na mkyas ye.

24 Tna ana taro mari bo ro ait ykyas to, smot bokyas reto mawe mabo oh. Tna ana taro to, hawe smot bokyas reto ye.

25-27 Ana mhaf wana hayah-hayah sai. Tna

santri anya. Tibyo Paulus yasen ykyas bo ro tiwya Allah ykyas *k'nabi* Yesaya:

“Nasen namo no k'raa wefo. Tna nawe k'ana nawe, 'Anu ja nri bo menohé anu srau nnaut bo ro anu nri reto fee. Anu nmat bo menohé mfi bo anu nhar bo reto fee. Anu hawe bo smot Jõ. Tna anu nimara mtuk, hawe nri Jõ fee. Tna nsu wanu mti, wase bo ye. Menohé mfi bo anu hah nma no k'Jõ to, soh anu nhaf smot Jõ to, kbe tno re anu nrok noof; kbe anu nimara nri bo, tna nsu wanu to, kbe nmat bo tna nhar ye.' ”

Yesaya 6:9 - 10

Paulus yawe, “Tiwya Har ro *Tuhan* mkyas bokyas reto *k'nabi* Yesaya. Ait ykom bo reto tna ykyas k'anu hohos na wanu ye. Tna bokyas mbam k'Har ro *Tuhan* reto mabo oh mefo!” Paulus ykyas bo reto mam tis tna raa mbam raa mana ro Yahudi masen mbrir-brar mbam siret refo mamo.

²⁸ Tna ait yawe k'ana yawe, “Nri oh! Nhar oh: Riof ro Allah yoo yee reto to, mfo refo Ait yoo yee k'raa ro mbam raa mana roto makin ye. Tna ana weto to, kbe mari tna moo riof rAit reto mse k'ana to.” [

²⁹ Paulus yawe bo weto mkak. Tna raa ro Yahudi weto taro mrok kmo. Ana beta masen mamo tna santri bo k'anya iti ye.]

³⁰ Tna Paulus yhau *tahun* trion ewok muuf mam samu ro ait kwiyat reto. Ja ait ksoh huwya ykyas bo ysya awya sai ro yama yo k'ait.

³¹ Yhau to, ait ykyas bo abyõ sai ykyas wore wo Allah yamo *Raja* ybo raa mana rAit. Tna ait

ykyas *Tuhan Yesus Kristus* yasom rAit ykah yatak
tna raa aro mno wa bo fee ye.

**Watum ro Tuhan Bosi ro Tna
Mai Brat: Watum ro Tuhan Bosi ro Tna (New
Testament+)**

copyright © 2005 Wycliffe Bible Translators, Inc.

Language: Mai Brat

Contributor: Wycliffe Bible Translators, Inc.

All rights reserved.

2025-04-26

PDF generated using Haiola and XeLaTeX on 25 Apr 2025 from source
files dated 26 Apr 2025

71146407-c883-5cc1-b1e8-017c229bf3fa